

義

縣

志

五十九



三十

卷中

第十五冊

藝文志
上

133536

藝文志

義縣志中卷

題藝文志第十一

游藝與道德並重後文而器識爲先古人已有明言所以一代之藝文一邑即有一邑之藝文首列誥勅疏奏爲帝王臣宰之詞章尾紀著作名稱爲學士大夫之表見吾義藝文一志由東晉而迄民國或爲大單于之書表或爲大皇帝之諭制或爲大總統之褒揚或爲大元帥之命令或爲地方官之佈告或爲鄉賢之書簡或爲族譜之引序或爲表誌

墓表墓誌

或爲詩賦或爲叙跋或爲辭歌或爲碑記或爲傳述舉有關國家

有關民物有關公益有關孝節有關世道人心有關學務實業有關儒流筆墨者無不求之書史訪之鄉耆濟以搜括參以見聞彙成巨帙不厭多不憚繁揭古昔之遺留作

來今之感觸於吾邑競進前途則未必無小補云志藝文

十七年一月四日鶴識

義縣志中卷

藝文志

總目次

上卷
共十七類

誥
清明

勅
清明

詔
北朝魏
金

諭
清元

訓
清

策令
清
民國

褒揚
民國

告示
清
民國

表
晉北
朝魏

諫言
晉北
朝魏

疏
晉明

奏
清

議
清

檄
晉

序
明
清
民國

叙
明
清
民國

碑
北朝魏
清
遼
金
元
民國

下卷
共二十四類

詩
北朝魏
清
遼
金
元
民國

賦
清

銘

明

聯

明清
民國

制藝

清

贊

唐明清
民國

行述

清

書

晉北朝魏
清

簡明

文明

清
民國

引

清

墓誌

遼明清
民國

墓表

清

記

明

集

明

辭

清
民國

歌

晉
民國

傳

清

跋

清
民國

論

清
民國

策

民國

說

明
民國

啓

清
民國

著述

北朝魏元明
清
民國

義縣志中卷

藝文志上卷

目次

誥 共三十
二篇

明

誥封賀欽之父母

誥封賀欽本身妻室

誥封金德容本身

誥封賀欽之父母

誥贈許進本身

誥授許誥本身

誥授許讚本身

誥授許論本身

清

誥封辛珠之父母

誥封伯爾和圖本身妻室

誥贈王猷之祖父母

誥贈王猷之父母

誥授王士昕本身妻室

誥贈王仲之祖父母

誥贈王仲之父母

誥贈王仲之兄嫂

誥贈劉文雄之祖父母

誥贈劉文雄之父母

誥授劉廣澍本身妻室

誥贈劉廣澍之祖父母

誥贈劉廣澍之父母

誥封李鶴年之叔父母

誥贈愛辛保之祖父母

誥贈愛辛保之父母

誥贈義州佐嶺福徵之祖父母

誥封義州佐領福徵之父母

誥贈胡錫綸之祖父母

誥贈胡錫綸之父母

誥封愛辛保之祖父母

誥封愛辛保之父母

誥封夏景泉之祖父母

誥封夏景泉之父母

勅共十
一篇

明

勅授王誼本身

勅張翰巡撫山西

清

勅封梁文炳本身妻室

勅贈王景旭之祖父母

勅封王景旭之父母

勅封王景昇之父母

勅封王景昇本身妻室

勅贈劉廣澍之父母

勅授王旭齡本身

勅贈李芝齡之祖父母

勅封李芝齡之祖父

詔共七篇

北朝魏

詔慕容白曜

金

太祖詔宜錦乾顯成川豪懿等州典兵官
太祖詔招諭宜州

元

世祖詔王榮祖詣闕撫尉之
成宗加號大成至聖文宣王詔

成宗加封五鎮詔

明

太祖正神名號詔

諭共四十七篇

元

太祖親諭王榮祖
太祖遣使諭榮祖

清

諭禮部

諭理藩院

其二

諭察哈爾親王布爾尼等

諭滾濟斯扎布

諭撫遠大將軍信郡王鄂扎等啓行

諭察哈爾布爾尼

諭布爾尼弟羅不藏

諭察哈爾部衆

諭扎什

諭理藩院

諭鎮大同察哈爾兵衆

諭遠大將軍信郡王鄂扎等

諭兵部

諭議政王大臣等

諭撫遠大將軍信郡王鄂扎等

諭理藩院

聖祖諭戶刑二部

聖祖諭十六條

聖祖特恩通獨直隸各省等處錢糧諭

世宗諭領侍衛內大臣等

世宗諭知府

世宗諭老農

世宗諭州縣

世宗諭教士子責成學臣教職

世宗諭學政保舉生員

世宗諭耕藉

世宗諭重農

世宗欽定訓飭州縣規條諭

世宗諭禁火化並勸除堪輿

世宗諭內閣

世宗諭內閣

世宗特恩寬免以前積欠錢糧諭

高宗諭內閣

其二

其三

其四

其五

其六

其七

其八

其九

其十

其十一

高宗恩賞五世同堂諭

仁宗特恩命查民欠以豁免諭

宣宗特恩蠲免錢糧諭

訓共二篇

清

世祖訓飭士子臥碑文

世宗上諭訓飭士子碑

策令共二篇

晉

令記室封裕

民國

大總統策令蒙藏僉事李芳春

褒揚 共一篇

民國

大總統題褒義縣蘇慶榮

告示 共三篇

清

曉諭糧行

民國

勸民購買內國公債示

佈告禁烟各種證費

表 共六篇

晉

勸進元帝表

上晉帝表

上西秦苻堅表

上表理慕容白曜

上魏世祖表

上表陳時務

諫言 共十
二篇

晉

上燕王言

諫燕王

對晉帝言

上燕國王言

其二

北朝魏

上高祖言

其二

其三

其四

其五

上書魏主陳四事

上魏主言

疏 共八
篇

晉

上燕國王疏

其二

上後燕國王疏

上南燕王疏

其二

明

應天以實疏

辭職陳言疏

開義州木市疏

奏共九篇

清

理藩院郎中馬喇奏

撫遠大將軍信郡王鄂扎奏

撫遠大將軍信郡王鄂扎等奏

議政王大臣奏

撫遠大將軍信郡王鄂扎等奏

其二

議政王大臣等奏

奏請順天鄉試房考官閱卷仍應迴避

奉請河工漕運變通辦法

議共三篇

清

理藩院遵諭議覆

議政王大臣等議

遵旨會查奉天各屬應修城垣議

檄共一篇

晉

檄青州諸郡

序共三十篇

明

贈金德容之任石州序

重刻醫閭賀先生稿序

許氏家譜原序

清

梁氏族譜序

其二

梁氏譜續序

汝寧府志序

梁氏增修族譜序

許氏家譜序

重刻許氏家譜序

趙氏家譜序

其二

義州王氏宗譜序

王氏年庚譜序

王氏宗譜序

麟見亭先生鴻雪因緣圖記序

趙氏家譜序

其二

趙心泉先生石琴鐵硯軒餘稿序

其二

懷芳閣留刪小草序

學竹山房詩草自序

李氏世譜序

李氏宗譜序

李氏家傳序

民國

張仲景傷寒論正解序

雙城縣鄉土志序

義縣立師範學校全校同學錄序

其二

其二

其四

敘共三篇

明

醫問先生集敘

清

知不足草堂敘

民國

三字經註釋會纂敘

目錄終

義縣志中卷

藝文志誥勅弁言

國家崇重循良封贈之典上及三代父及祖會下逮身本室妻由來久矣而封贈之制言登

諸邑乘則自臨城縣志見之起明洪熙元年南京工部右侍郎楊和父及祖會迄崇禎三年吏部主事喬若雲本身元配繼室等誥勅我邑名登仕版榮邀

璽書者代不乏人起明清迄民國或為文官或為武職其間膺君主之封贈必功德可

勛而可彰受民主之榮典亦勳行可表而可敬本志仿臨城而特採錄焉用誌君主民

主之時代同為旌善而崇庸藉告今世後世之邑人俱當盡忠而報國十七年二月二十一日鶴識

義縣志中卷

藝文志上卷

誥

明

誥封賀欽之父母成化三年

制曰國家量德授任弼成治功推恩之典視其子孫祿職以為差所以勸忠於孝也戶科給事中賀欽故父孟員積善於躬慶流於後厥有賢子顯於家邦揆厥所原宜有褒贈是用贈爾為朝請大夫戶科給事中顯秩榮名永賁泉壤

制曰國家登進賢能用圖治化褒封之典及其萱堂勸忠於孝厥有舊章戶科給事中賀欽故妣郭氏婦德姆道垂裕於家乃有賢嗣顯庸於國是用贈爾為恭人尚啓爾後克諧厥終

誥封賀欽本身妻室成化三年

制曰爾賀欽登名進士擢職戶科給事中既遷今官克勤且慎苟非得人奚稱任使是用進爾階朝請大夫賜之誥命以為爾榮爾其敢諫直言以勵志節尚圖後效稱此茂恩欽哉

制曰夫婦人之大倫故朝廷推恩羣臣命必及之爾戶科給事中賀欽之妻席氏克勤內助特封爲宜人祇服榮恩永光閨闈

制曰詩人有鷄鳴雜佩之詠士君子獲聞達於時又必有閨闈儆戒之助故綸命每並及之此令典也爾陝西布政司右參議賀欽之妻席氏出自閨闈歸於德門勤儉敬恭壺儀允協爾夫服官於外而私家罔念惟爾實能相之爰錫寵命以彰化本茲特封爾爲淑人匪惟頒從爵之榮亦以表宜家之則

誥封金德容本身

成化三年

制曰環數百里之廣而有州州有長上承省郡下倡諸邑俾牧其民而安輯之任亦重矣乃茲素號衝劇土瘠民慄匪有治才詎可輕畀爾石州知州金德容蔚以文學擢茂鄉闈知爾敏修授以州牧乃能闢田野興學校恤流移輕徭役愛民若子德政久著於輿評處國如家才譽屢馳於薦牘庶幾國之循良民之父母也茲以覃恩特授爾階奉直大夫賜之誥命於戲居官以盡職爲忠已徵善績保譽以令終爲善勿替初心茲懋勳庸嗣膺顯擢欽哉

誥封賀欽之父母

弘治元年

制曰朕惟積善在躬慶垂於後效庸於世寵及其先蓋天之報施由本達支國家褒崇

沂流而源也陝西布政司右參議賀欽故父孟員潛德弗耀爲時善人篤生令子任職言官茲特贈爾爲奉議大夫陝西布政司右參議尙其欽承永光世祚

制曰朕惟賢才效庸於國亦宜視子孫之祿秩所以隆恩禮昭善教也陝西布政司右參議賀欽故母郭氏恆德宜家篤生令子顯用於時宜有褒贈是用爾爲淑人服此恩榮昭於永世

誥贈許進本身

正德五年

武宗朱厚照

制曰臣惟盡節貴望實之相符國有褒恩奚存亡之有間矧乎耆俊位冠卿曹爰舉彝章肆頒茂渥故太子少保吏部尙書許進性稟剛方心存忠義由甲科而擢司風紀歷郡臬而聿佐都臺能聲每著於不容素志愈堅於屢謫邊關出撫恩敵愾以揚威民部升華欲裕財而足國中緣邊事暫聽里居迨朕嗣位之初復起懸車之老斗台是踐文武兼資地重本兵飭戎備於恬嬉之日望尊太宰肅人心於進退之間惟權任之既專亦強直而至遂邪正固難於盡合功名常保於知幾譽屢黜而愈隆亟當圖任人云亡而可歎胡不憇遺眷往勸之難忘故殫恩之宜厚茲特贈太子太保錫之誥命嗚呼官秩崇高已上躋於一品家聲赫奕庶遠播於千齡惟爾明靈服予嘉命

誥授許誥本身

嘉靖十二年十一月初一日

世宗朱厚熜

制曰朕以元良衍慶覃恩萬方凡厥羣工咸霑褒典矧乎股肱大臣夙所簡注者咨爾南京戶部尙書許誥乃故太子少保吏部尙書贈太子太保諡襄毅進之子今戶部尙書讚之兄早稱才俊濟美甲科簡列言官改居史職砥行修業令譽聞於先朝頃朕讚承之始采諸時論起擢留都旣而勸講經緯育才胄監遂由銓佐正位司徒顧其忠慎弗渝勲勞並著凡所論列皆於政教有裨惟爾之學能體道志在立言自信不疑罔諧流俗朕甚嘉焉茲特進爾階資政大夫錫之誥命於戲尙書天下之政本責重地隆百僚承式爾父子兄弟乃並居是位求之當代實鮮厥倫爾其益加懋懋用垂休於簡冊以副我命詞欽哉

誥授許讚本身

嘉靖二十四年八月二十四日

制曰鼎台重位寅亮攸資殿閣親臣平章是托乃兼諸輔再領銓卿斯人臣之眷寵至矣苟非偉望宏才爲重所推服者曷克勝茲畀哉咨爾少傅兼太子太傅吏部尙書文淵閣大學士許讚乃太子少保吏部尙書累贈少保兼太子太保諡襄毅進之子南京戶部尙書贈太子太保諡莊敏誥之弟都察院右副都御史論之兄醇正風成直追往哲忠亮素著蔚作是宗蚤以儒科之彥佐政名邦爰晉伸臺再遷史局令猷旣茂勁節尤堅觸忤權璫遂遭擯抑及罪人之旣得屬正士之獲伸乃歷籓臬則威德交孚乃陟

庖卿則廉能持正掌邦禁而時無冤獄掌邦賦而蓄有羨財朕乃簡置天曹俾統官士藻鑑平明選銓允當檢回爲之黜伏賢雋賴以登庸歷歲滋多碩膚沔積朕益嘉悅特進揆司爾乃正色決樞機之務啓心陳帷幄之謀憂勤罔間於初終丞弼不違於旦夕豈不誠良佐也哉頃建闕宮之禮實籍鈞衡之咨既有以交於神明宜與之共其福祿茲授爾階光祿大夫勳柱國於戲予欲守在四方以爾爲備邊之姚宋予欲安於百姓以爾爲息民之蕭曹益崇夾輔之勛庸副仰成之願欽哉

誥授許論本身

嘉靖三十九年

制曰朕撫有方夏紹昔大猷治制保邦以綏厥兆民邇者寇盜數犯邊鄙亦賴不二心之臣爲國屏翰奮揚威武用能保乂王家弼成休績疇咨有位非忠貞耆舊孰能勝此隆奇哉咨爾總督薊遼保定等處軍務兼理糧餉太子太保兵部尙書兼都察院左副都御史許論乃太子少保吏部尙書累贈少傅兼太子太傅文淵閣大學士諡襄毅進之子南京戶部尙書贈太子太保諡莊敏誥少傅兼太子太傅吏部尙書文淵閣大學士贈少師諡文簡讚之弟剛明而敏達閎廓而深沉忠亮得於性成才猷濟其世美自昔列職夏曹卽已究心圖畧比秉鉞畿晉入理克營出總邊務更剔中外功望茂隆乃晉躋宮保正位本兵翊算飭成恭勤夙夜已雖投間釋柄而往勩實係予衷故還爾舊

職授以專闔之權俾司北門之鑰而爾志切報國保障宣勞頃以褒賚示寵嘉矣所司復以年闕來聞特進階光祿大夫錫之誥命在昔周詩所稱方叔壯猷皇父世功以佐中興勝治朕甚慕之惟爾膚功偉望克嗣前休而遠畧沉謀精於歷試朕固以方叔皇父倚之矣其尙益勵忠貞用綏寧邊鄙以稱予比隆先王之意則爾亦有無窮之聞欽哉

清

誥贈辛珠之父母

康熙二十年十月二十四日

制曰揚名顯親爲子者願以令德歸之父考績褒賢教孝者宜以高爵作之忠是用推思特申休命爾薩蘭乃盛京義州城守尉二等阿達哈哈番加一級辛珠之父義方有訓式穀無慚念爾嗣之勤勞旣克家而報國俾爾澤之昌大爰錫類以昭仁茲以覃恩贈爾爲資政大夫盛京義州城守尉二等阿達哈哈番加一級錫之誥命於戲教誨爾子永無忝於家聲聿修厥德尙無負於國恩欽承寵命慰爾幽靈

制曰國體勞臣必溯源而沛澤家崇喆嗣爰歸善於厥生盛典維新壺儀愈著爾盛京義州城守尉二等阿達哈哈番加一級辛珠之母查哈忒氏幃範克端胎教居身教之先慈訓惟勤能愛任能勞之後宜沛貺封用昭母德茲以覃恩贈爾爲夫人於戲子情

罔極感顧復而敦孝國綸普被念劬勞以疏榮嘉乃恩勤褒其遺範

誥封伯爾和圖本身妻室

乾隆六年歲次辛酉二月

高弘曆

制曰賞懋酬庸特重元戎之任恩隆錫爵並昭協策之勛惟翊贊之弘宣自勸揚之不
及爾管理錦州等處地方兼管山海關外莊屯捕牲驛站大凌河馬羣事務副都統加
二級紀錄六次伯爾和圖謀勇兼優干城是寄比肩推轂壁壘恃以增雄陳力佐籌旌
旄爲之動色簡蒐軍實時勤報國之忱諳諫戎韜克副統軍之重爰煩寵命茂獎成勞
茲以覃恩特授爾階光祿大夫錫之誥命於戲勤宣偉略受繁錫於旂常祇副休光奏
膚功於軍旅尙欽譽問益勵弘猷

制曰樹威望於朝家固賴干城之佐采休聲於房幃尤需女士之賢特煥綸音用昭恩
眷爾管錦州等處地方兼管山海關外莊屯捕牲驛站大凌河馬羣事務副都統加二
級記錄六次博爾和圖之妻高氏敬以持躬勤能主饋風規雍肅曾無踰梱之言宵旦
箴規特勗從王之義慶流策府寵溢深閨茲以覃恩封爾爲一品夫人於戲魚軒藻麗
識內助之賢明鸞誥輝光荷天恩之汪濊承茲顯命毋替素心

誥贈王猷之祖母

乾隆四十二年五月初二日

制曰沛酬庸之慶典茂對皇庥宏錫類之殊榮曲成臣孝爾王乾吉乃工科掌印給事

中加三級王猷之祖父箕裘緒遠詩禮聲宏詔厥孫謀樹芳規於珂里繩其祖武奏茂績於彤廷茲以覃恩賙贈爾爲中憲大夫工科掌印給事中加三級錫之誥命於戲開堂構以宏基德鍾家慶沛絲綸而錫命澤渥泉臺

制曰德門衍慶淵源早裕夫孫謀盛世推恩綸綍載揚夫母範爾張氏乃工科掌印給事中加三級王猷之祖母高門毓德華閥傳芳有穀貽孫賴同心於內助自天申命表異數於中閨茲以覃恩賙贈爾爲恭人於戲光生榆翟常昭彤管之輝德媿瓊璜永著徽章之色

誥贈王猷之父母

乾隆四十二年五月初二日

制曰誼篤靖共入官必資於敬功歸誨迪能仕而教之忠爰沛國恩用揚庭訓爾王有文乃工科掌印給事中加三級王猷之父躬脩士行代啓儒風抱璞自珍克毓珪璋之秀析薪能荷彌彰杞梓之良茲以覃恩贈爾爲中憲大夫工科掌印給事中加三級錫之誥命於戲貽令問於經籙義方久著佩徽章於策府禮秩加優茂典丕承湛恩永荷制曰移孝作忠懋簡勞臣之績推恩錫類式揚賢母之名載賁榮綸用宣懿範爾陳氏乃工科掌印給事中加三級王猷之母早嫻典則夙著規型敬以從夫宜室聿徵其順德勤於訓子備官一本於慈祥茲以覃恩贈爾爲恭人於戲荷探翟之天章徽音益暢

披彤毫之仙藻惠間常流祇服寵光永綏福履

誥授王士昕本身妻室

乾隆五十二年十二月

制曰分符百里必遴出宰之材報最三年爰重懋官之典爾原任浙江湖州府歸安縣知縣加四級王士昕雅擅才能克宣茲惠撫綏有要常深疾痛在己之心懷保無窮不忘顧復斯民之責茲以爾克襄王事授爾爲奉政大夫錫之誥命於戲前勞已茂用褒製錦之能來軫方邁益勵飲冰之操

制曰良臣宣力於外効厥勤勞賢媛襄職於中膺茲寵錫爾原任浙江湖州府歸安縣知縣加四級王士昕之妻劉氏終溫且惠既靜而專綦縞從夫克贊素絲之節蘋蘩主饋爰流彤管之輝茲以爾夫克襄王事封爾爲宜人於戲敬爾有官著肅雍而並美職思其內迪黽勉以同心

誥贈王仲之祖父母

乾隆五十五年正月初一日

制曰考績報循良之最用獎臣勞推恩溯積累之遺載揚祖澤爾王自強迺直隸天津府滄州知州王仲之祖父錫光有慶樹德務茲嗣清白之芳聲澤留再世衍弓裘之令緒祜篤一堂茲以覃恩賙贈爾爲奉直大夫直隸天津府滄州知州錫之誥命於戲聿修念祖膺茂典而益勵新猷有穀貽孫發幽光而不彰潛德

制曰册府酬庸聿著人臣之懋績德門輯慶式昭大母之芳徽爾汪氏迺直隸天津府

滄州知州王仲之祖母箴誠揚芬珩璜表德職勤內助宜家久著其賢聲澤裕後昆錫

類式承乎嘉命茲以覃恩賜贈爾為宜人於戲播徽音於彤管壺範彌光膺異數於紫

泥天庥永劭

誥贈王仲之父母乾隆五十五年正月朔一日

制曰求治在親民之吏端重循良教忠勵資敬之忱聿隆褒獎爾王義明迺直隸天津

府滄州知州王仲之父禔躬淳厚垂訓端嚴業可開先式穀乃宣猷之本澤堪啓後貽

謀裕作牧之方茲以覃恩贈爾為奉直大夫直隸天津府滄州知州錫之誥命於戲克

承清白之風嘉茲報政用慰顯揚之志昭乃遺謀

制曰朝廷重民社之司功推循吏臣子凜冰淵之操教本慈幃爾張氏迺直隸天津府

滄州知州王仲之母淑慎其儀柔嘉維則宣訓詞於朝夕不忘育子之勤集慶澤於門

閭式被自天之寵茲以覃恩贈爾為宜人於戲仰酬顧復之恩勉思撫字載煥絲綸之

色永賁幽潛

誥贈王仲之兄嫂嘉慶元年正月初一日

仁顯 琰

制曰委質策名榮既膺夫簪紱克家績緒光必逮乎門閭爾貢生王佑乃直隸正定府

同知王仲之兄道足持躬情殷訓弟經傳詩禮青湘揚雁序之輝慶篤芝蘭丹綉煥龍章之麗芳徽允懋新典宜頒茲以覃恩賤贈爾爲奉政大夫直隸正定府同知錫之誥命於戲被章服以增榮聿顯友恭之義承絲綸而無黍彌彰善慶之風

制曰教佐義方內則允彰夫懿範榮敷閨闈朝恩宜體乎私情爾齊氏乃直隸正定府同知王仲之嫂貞淑性成徽柔道協身嫺姆訓聿儲卓犖之材志稟慈徽用衍熾昌之緒丕昭淑慎特賁絲綸茲以覃恩賤贈爾爲宜人於戲龍章式煥令儀著美於當時象服欽承名德益彰於奕葉

誥贈劉文雄之祖父母

嘉慶元年正月初一日

制曰策勳疆圉昭大父之恩勤錫賚絲綸表皇朝之需澤爾劉起肖廼貴陽城守營中軍守備劉文雄之祖父以敬持躬忠能啓後威宣闔外家傳韜略之書澤沛天邊國有旂常之典茲以覃恩贈爾爲武德騎尉錫之誥命於戲我武維揚時起孫枝之秀賞延於世益徵遺緒之長

制曰樹豐功於行陳夔著聞孫錫介福於廷幃恩推大母爾馮氏廼貴陽城守營中軍守備劉文雄之祖母壺儀足式令問攸昭表劍珮之家聲輝流奕世播絲綸之國典慶衍再傳茲以覃恩贈爾爲宜人於戲翟弗用光膺宏庥於天闈龍章載煥被大惠於重

泉

誥贈劉文雄之父母

嘉慶元年正月
初一日

制曰寵綏國爵式嘉閱閱之勞蔚起門風用表庭闈之訓爾劉彥君乃貴州貴陽城守營中軍守備劉文雄之父義方啓後毅似光前積善在躬樹良型於弓冶克家有子拓令緒於韜鈴茲以覃恩贈爾爲武略佐騎尉錫之誥命於戲錫策府之徽章洵承恩澤荷天家之庥命永賁泉壚

制曰怙恃同恩人子勤思於將母赴桓著績王朝錫類以榮親爾趙氏乃貴州貴陽城守營中軍守備劉文雄之母七誠嫻明三遷勤篤令儀不忒早流珩瑀之聲茲教有成果見干城之器茲以覃恩贈爾爲安人於戲錫龍綸而煥采用答劬勞被象服以承庥

永光泉壤

誥授劉廣澍本身妻室

嘉慶二十二年
十二月十三日

制曰分符百里必遴出宰之材報最三年爰重懋官之典爾現任河南陳州府淮寧縣知縣加四級劉廣澍雅擅才能克宣慈惠撫綏有要常深疾痛在己之心懷保無窮不忘顧復斯民之責茲以爾克襄王事授爾爲奉政大夫錫之誥命於戲前勞已茂有褒製錦之能來軫方適益免飲冰之操

制曰良臣宣力於外効厥勤勞賢媛襄職於中膺茲寵爾現任河南陳州府淮寧縣知縣加四級劉廣澍之妻王氏終溫且惠既靜而專綦縞從夫克贊素絲之節蘋蘩主饋爰流彤管之輝茲以爾夫克襄王事封爾爲宜人於戲敬爾有官著肅雍而並美職恩其內迪黽勉以同心

誥贈劉廣澍之祖父母

道光八年十一月九日

宜旻 寧

制曰考績報循良之最用獎臣勞推恩溯積累之遺載揚祖澤爾歲貢原任訓導劉捷乃陝西邠州直隸州知州劉廣澍之祖父錫光有慶樹德務滋嗣清白之芳聲澤留再世衍弓裘之令緒祐篤一堂茲以覃恩賜贈爾爲奉政大夫陝西邠州直隸州知州錫之誥命於戲聿修念祖膺茂典而益勵新猷有穀貽孫發幽光而不彰潛德

制曰册府酬庸聿著人臣之懋績德門輯慶式昭大母之芳徽爾趙氏乃陝西邠州直隸州知縣劉廣澍之祖母箴誠揚芬珩璜表德職勤內助宜家久著其賢聲澤裕後昆錫類式承乎嘉命茲以覃恩賜贈爾爲宜人於戲播徽音於彤管壺範彌光膺異數於紫泥天庥永邵

誥贈劉廣澍之父母

道光八年十一月初九日

制曰求治在親民之吏端重循良教忠勵資敬之忱聿隆褒獎爾劉文莊廼陝西邠州

直隸州知州劉廣澍之父禔躬淳厚垂訓端嚴業可開先式穀乃宣猷之本澤堪啓後
貽謀裕作牧之方茲以覃恩贈爾爲奉政大夫陝西邠州直隸州知州錫之誥命於戲
克承清白之風嘉茲報政用慰顯揚之志昭乃遺謨

制曰朝廷重民社之司功推循吏臣子凜冰淵之操訓本慈幃爾王氏迺陝西邠州直
隸州知州劉廣澍之母淑慎其儀柔嘉維則宣訓詞於朝夕不忘鞠育之勤集慶澤於
門閭式被自天之寵茲以覃恩封爾爲宜人於戲仰酬顧復之恩勉思撫字載煥絲綸
之色用慰劬勞

誥封李鶴年之叔父母

同治十一年
十月初九日

程載 淳
宗載

制曰誼篤靖共入官必資於敬功歸誨迪猶子亦教以忠爰沛國恩用揚家訓爾李維
屏迺頭品頂戴兵部尙書兼都察院右都御史總督閩浙等處地方提督軍務兼理糧
餉李鶴年之胞叔父躬修士行代啓儒風抱璞自珍克發圭璋之秀儲材足用聿昭杞
梓之良茲以覃恩賜封爾爲光祿大夫賜之誥命於戲昭令關於經籙書遺刻鵠佩徽
章於策府寵賁迴鸞茂典丕承榮名益劬

制曰家有孝慈之範美以相濟而成國崇褒錫之文恩以茲推而厚爾趙氏迺頭品頂
戴兵部云云之胞叔母德可相夫教能啓後一堂環佩和音克著其慈祥五夜機絲內

治聿昭其柔順茲以覃恩賤封爾爲一品夫人於戲普一體之榮施鸞章賁彩表同心於訓迪象服分光

誥贈愛辛保之祖父母

同治十二年二月初十日

制曰德厚流光溯淵源之自始功多延賞錫褒襲以攸宣應沛殊施用揚前烈爾永慶迺盛京雲騎尉愛辛保之祖父性資醇茂行誼恪純啓門祚之繁昌華簪衍慶廓韜鈴之緒業奕葉揚休鉅典式逢崇階宜涉茲以覃恩賤贈爾爲武德騎尉錫之誥命於戲三世聲華實人倫之盛事五章服采洵天室之隆恩顯命其承令名克荷

制曰天朝行慶必推本於前徽家世貽謀遂承庥於再世彝章宜錫寵命載揚爾郭氏迺盛京雲騎尉愛辛保之祖母壺範示型母儀著媿惠風肆好旣比德於珩璜餘慶綿延自邀恩於翟茀特頒渥典用表芳規茲以覃恩賤封爾爲宜人於戲綏帶輕裘挺孫枝之材武高文典冊賤大母之顯榮祇服寵綏益彰令善

誥封愛辛保之父母

同治十二年二月初十日

制曰秩分介胄克杼報國之忱教始庭闈誕啓析薪之祚爾阿查那迺盛京雲騎尉愛辛保之父禔躬篤行訓子義方燕翼維勤殫深心於韜略象賢能繼廓大業於弓裘茲以覃恩封爾爲武德騎尉錫之誥命於戲恩光上逮式膺殊渥之施惠澤下流用慰顯

揚之志

制曰家法嚴明獎教忠之舊德壺儀純備嘉徙宅之前勞爾王氏迺盛京雲騎尉愛辛保之母早習規箴夙嫻訓典相夫以禮式彰聚敬之風教子有成茂展策勳之志茲以覃恩封爾爲宜人於戲錫翟弗以揚徽休聲益著賁鸞函而煥采惠問彌昭

誥贈義州佐領福徵之祖父母

光緒十五年
二月十七日

德戴 滌

制曰德厚流光溯淵源之自始功多延賞錫褒寵以攸宜應沛殊施用揚前烈爾姚太福迺義州佐領福徵之祖父性資純茂行誼恪醇啓門祚之繁昌華簪衍慶廓韜鈴於緒業奕葉揚休鉅典式逢崇階宜陟茲以覃恩賙贈爾爲昭武都尉錫之誥命於戲三世聲華實人倫之盛事五章服采洵天寶之隆恩顯命其承令名允荷

制曰天朝行慶必推本於前徵家世貽謀必承休於再起彝章宜錫寵命載揚爾關氏乃義州佐領福徵之祖母壺範示型著母儀美惠風肆好既比德於衍璜餘慶綿延自邀恩於翟弗特頒渥典用表芳規茲以覃恩賙贈爾爲恭人於戲綏帶輕裘挺孫枝之材武高文典冊馳大母之顯榮祇報寵綏長昭良軌

誥封義州佐領福徵之父母

光緒十五年
二月十七日

制曰治軍命將朝廷崇燹伐之猷移孝作忠臣子著折衝之烈爾姚慶義迺義州佐領

福徵之父禔躬醇謹課子義方戎務夙嫻克啓箕裘之緒天休申錫用敷車服之榮茲以覃恩封爾爲昭武都尉錫之誥命於戲勵榮名於天上祇受國恩邀令譽於師中長遺家慶

制曰國重千城之寄宣威允賴乎武臣典隆綸綍之施錫類必加夫賢母爾

石關

氏迺義

州佐領福徵之母內則素嫻令儀久著愛勞兼至用昭利戟之光誨育彌勤每聽鷄鳴之唱茲以覃恩贈爾爲恭人於戲勵榮名於蘭綺懿範克彰荷嘉祉於芝函殊恩益播

誥贈胡錫綸之祖父母

光緒十五年
二月十七日

制曰沛酬庸之慶典茂對皇庥敷錫類之殊榮曲成臣孝爾胡醇迺戶部主事加四級胡錫綸之祖父箕裘紹緒詩禮垂聲貽厥孫謀樹芳規於珂里繩其祖武奏茂績於彤庭茲以覃恩賜贈爾爲中憲大夫錫之誥命於戲開堂構以培基德鐘家慶沛絲綸而錫命光曜泉台

制曰德門衍慶淵源早裕夫孫謀盛世推恩綸綍載揚夫母範爾曹氏迺戶部主事加四級胡錫綸之祖母高門毓德華閭傳芳有穀貽孫賴同心於內助自天申命表異數於中閨茲以覃恩賜贈爾爲恭人於戲光生禴翟常昭彤管之輝德媿珩璜允著徽章之色

誥贈胡錫綸之父

光緒十五年
二月十七日

制曰考績疏庸特重推恩之典服官資敬聿推式穀之功爾胡玉振乃戶部主事加四級胡錫綸之父世擅清門代傳素葉家風渟厚垂弓冶之良謀庭訓方嚴啓詩書之令緒茲以覃恩贈爾爲中憲大夫錫之告命於戲薄贏金而示誨世澤常延錫鬢帶以加榮天休弗替

制曰官學方成讀父書而繼業愛勞交備稟母訓以揚名爾

劉張

氏迺戶部主事加四級

胡錫綸之母克樹芳型尤多慈教著成筐之推範早知率禮無愆寓徙宅之深心果見克家有子茲以覃恩贈爾爲恭人於戲彤毫灑潤爰推顧復之恩彩翟流芳允荷寵綏之典

制曰惠流及下先錫慶於親闈誼篤所生必推恩於母氏爾林氏迺戶部主事加四級胡錫綸之庶母才堪造室範可宜家執素業以效功時親蠶績殫勞心而訓子果綴鴛行茲以覃恩贈爾爲恭人錫之誥命於戲素絲修潔久形淑慎之風彤管注華式振賢名之譽

誥封愛辛保之祖父母

光緒三十年
正月十五日

制曰德厚流方溯淵源之自始功多延賞錫褒寵以攸宜應沛殊施用揚前烈爾永慶

迺盛京熊岳防守尉愛辛保之祖父性資醇茂行誼恪純啓門祚之繁昌華簪衍慶廓
韜鈴之緒業奕葉揚休鉅典式逢崇階宜涉茲以覃恩賜封爾爲武義都尉錫之誥命
於戲三世聲華實人倫之盛事五章服采詢天室之隆恩顯命其承令聞彌播

制曰天朝行慶必推本於前徽家世貽謀遂承休於再世彝章宜錫寵命載揚爾富察
氏迺盛京熊岳防守尉愛辛保之祖母壺範示型母儀著媿惠風肆好旣比德於瓊璜
餘慶綿延自邀恩於翟茀特頒渥典用表芳規茲以覃恩賜封爾爲淑人於戲綏帶輕
裘挺孫枝之材武高文典冊勗大母之顯榮祇服寵綏益彰令善

誥封愛辛保之父母

光緒三十年
正月十五日

制曰秩分介胄克杼報國之忱教始庭闈誕啟析薪之祚爾阿察納迺盛京熊岳防守
尉愛辛保之父禔躬篤行訓子義方燕翼維勤殫深心於韜略象服能繼廓大業於弓
裘茲以覃恩封爾爲武義都尉錫之誥命於戲恩光上逮式膺殊類之施惠澤下流用
慰顯揚之志

制曰家法嚴明獎教忠之舊德壺儀純備嘉徙宅之前勞爾王氏迺盛京熊岳防守尉
愛辛保之母早習箴規夙嫻訓典相夫以禮式彰聚敬之風教子有成茂展策勳之志
茲以覃恩封爾爲淑人於戲錫翟茀以揚輝休聲益著賁鸞函而煥采惠問彌昭

誥封夏景泉之祖父母

光緒三十四年十一月初九日

制曰德厚流光溯淵源之自始功多延賞錫褒寵以攸宜膺沛殊施用揚前烈爾國祥
廼義州鑲黃旗包衣佐領景泉之祖父性資醇茂行誼恪純啓門祚之繁昌華簪衍慶
廓韜鈴於緒業奕葉揚庥鉅典式逢崇階宜陟茲以覃恩賚封爾爲宣武都尉錫之誥
命於戲三世聲華實人倫之盛事五章服采洵天室之隆恩顯命其承令名允荷

制曰天朝衍慶必推本於前徽家世貽謀遂承庥於再世彝章宜錫寵命載揚爾張氏
廼義州鑲黃旗包衣佐領景泉之祖母壺範示型母儀著徽惠風肆好旣比德於珩璜
餘慶綿延自邀恩於翟弗特頒渥典用表芳規茲以覃恩賚封爾爲恭人於戲綏帶輕
裘挺孫枝之材武高文典冊賙大母之顯榮祇服寵綏長昭良軌

誥封夏景泉之父母

光緒三十四年十一月初九日

制曰治軍命將朝廷崇燹伐之猷移孝作忠臣子著折衝之烈爾永奇廼義州鑲黃旗
包衣佐領景泉之父禔躬醇謹課子義方戎務夙嫻克啓箕裘之緒天庥申錫用敷車
服之榮茲以覃恩封爾爲宣武都尉錫之誥命於戲播徽章於天上祇受國恩邀令譽
於師中益昭遠略

制曰國重干城之寄宣武允賴乎武臣典隆綸綍之施錫類必加夫賢母爾周氏廼義

州鑲黃旗包衣佐領景泉之母內則素嫻令儀久著愛勞兼至用昭利戟之光誨育彌勤每聽鳴機之響茲以覃恩封爾爲恭人於戲勵榮名於蘭綺懿範克彰荷嘉祉於芝蘭芳規勿替

右誥 共三十
二編

勅

明

勅授王誼本身

正德
三年

武宗朱厚照

勅曰朕嘉與四方長吏茂臻康又之效有能奉職循理績叙登聞者特下璽書褒顯之爾浙江龍游縣知縣王誼出身弘治己酉鄉進士器資端雅才識練明撫字澤翔於百里廉平聲著於一方茲授爾爲文林郎錫之勅命朕覽古良吏想見其人爾在事有聲庶幾踵其芳蹤光於往喆尙益懋乃猷崇乃績朝廷將有不次之擢焉欽哉

勅張翰巡撫山西

嘉靖
九年

世宗朱厚熹

勅都察院右僉都御史張翰騰驤右衛軍籍登弘治乙丑進士今特命爾巡撫山西等處地方操練兵馬撫安軍民修理城池防禦賊寇保障地方禁革姦弊一應戰守兵糧悉聽便宜區畫布按三司副參游守坐營等官並境內所屬土司衛所漢土官兵俱聽

節制調度凡事有應興應革宜會議者會議停當而行其所轄□□□負固梗化讐
殺搆亂及妄信姦徒撥置不□□惟酌量重輕或征勦或處置一切事機務要□□□
□□□□地方爾爲憲臣受茲重任宜□□□□□□□□□□□□地方寧
謐以□□□□□□□□□□□□□□□□因循怠緩目貽□爾其欽承之故勅

清

勅封梁文炳本身妻室

康熙二十三年九月二十四日

聖祖玄燁

制曰分符百里必遴出宰之材報最三年爰重懋官之典爾江南徐州沛縣知縣梁文
炳雅擅才能克宣慈惠撫綏有要常深疾痛在己之心懷保無窮不忘顧復斯民之責
茲以覃恩授爾爲文林郎錫之勅命於戲前勞已茂用褒製錦之能來軫方邁益勵飲
冰之操

制曰良臣宣力於外勉效勤勞賢媛襄職於中膺茲寵錫爾江南徐州沛縣知縣梁文
炳妻王氏終溫且惠既靜而專綦縞從夫克贊素絲之節蘋蘩主饋爰流彤管之輝茲
以覃恩贈爾爲孺人於戲敬爾有官著肅雍而並美職思其內昭淑慎之遺徽

制曰在公必敬臣心每待助於閨闈齊體維均國典必疏榮於繼續爾江南徐州沛縣
知縣梁文炳繼妻任氏以順爲正無成有終柔嘉克踵乎前徽瓊璜流譽慶澤用昭其

嗣美翟緯增光茲以覃恩封爾爲孺人於戲如綸如綍勿忘象服之榮宜室宜家允副鸞書之錫

勅贈王景旭之祖父母

嘉慶元年十一月十二日

仁願 琰

制曰考績報循良之最用獎臣勞推恩溯積累之遺載揚祖澤爾王鐸乃捐職布政司經歷王景旭之祖父錫光有自樹德務滋嗣清白之芳聲澤留再世衍弓裘之令緒祐篤一堂茲以爾孫遵例急公貶贈爾爲儒林郎錫之勅命於戲聿修念祖膺茂典而益勵新猷有穀貽孫發幽光而不彰潛德

制曰册府酌庸聿著人臣之懋積德門輯慶式昭大母之芳徽爾周氏乃捐職布政司經歷王景旭之祖母箴誠協芬珩璜表德職勤內助宜家久著其賢聲澤裕後昆錫類式承乎嘉命茲以爾孫遵例急公貶贈爾爲安人於戲播徽音於彤管壺範彌光膺異數於紫泥天庥永劭

勅封王景旭之父母

嘉慶元年十一月十二日

制曰資父事君臣子篤匪躬之誼作忠以孝國家宏錫類之恩爾王起祥乃捐職布政司經歷王景旭之父積善于身祥開厥後教子著義方之訓傳家裕堂構之遺茲以爾子遵例急公封爾爲儒林郎錫之勅命於戲殊榮必逮于所親寵命用光夫有子尙宏

佑啓益勵忱恂

制曰奉職在公嘉教勞之有自推恩將母宜錫典之攸隆爾鄭氏乃捐職布政司經歷王景旭之母壺範宜家夙協承筐之媿母儀貽穀載昭晝荻之芳茲以爾子遵例急公贈爾爲安人於戲彰淑德於不瑕式榮象服膺寵命之有赫永賁泉壚

勅封王景昇之父母

嘉慶九年十月十三日

制曰寵綏國爵式嘉閱閱之勞蔚起門風用表庭闈之訓爾王起瑞乃捐職營千總王景昇之父義方啓後毅似光前積善在躬樹良型於弓冶克家有子拓令緒於韜鈴茲以爾子遵例急公封爾爲武略騎尉錫之勅命於戲錫策府之徽章洵承恩澤荷天家之庥命增耀門閭

制曰怙恃同恩人子勤思於將母赴桓著績王朝錫類以榮親爾姚氏乃捐職營千總王景昇之母七誠嫻明三遷勤篤令儀不武早流珩璫之聲慈教有成果見干城之器茲以爾子遵例急公封爾爲安人於戲錫龍綸而煥采用答劬勞被象服以承庥允膺光寵

勅封王景昇本身妻室

嘉慶九年十月十三日

制曰國威覃布尙勤鞶鼓之思武備勤修允重干城之選爾捐職營千總王景昇材勇

著聞韜鈴嫻習戎行振飭具知士伍無譁軍政修明因見拊循有素欣逢慶典宜煥溫
綸茲以爾遵例急公授爾爲武略騎尉錫之勅命於戲策幕府之勳名祇承休命荷天
家之光寵勿替成勞

制曰策府疏勳甄武臣之茂績寢門治業闡賢助之徽音爾捐職營千總王景昇之妻
高氏毓質名閨作嬪右族擷蘋采藻夙彰宜室之風說禮敦詩具見同心之雅茲以爾
夫遵例急公封爾爲安人於戲錫寵章於閨闈惠問常流荷嘉獎於絲綸芳聲彌邵

勅贈劉廣澍之父母

嘉慶十一年
正月初一日

仁頤 琰

制曰求治在親民之吏端重循良教忠勵資敬之忱聿隆褒獎爾劉文莊乃河南衛輝
府汲縣知縣劉廣澍之父禔躬淳厚垂訓端嚴業可開先式穀乃宣猷之本澤堪啓後
貽謀裕作牧之方茲以覃恩贈爾爲文林郎河南衛輝府汲縣知縣錫之勅命於戲克
承清白之風嘉茲報政用慰顯揚之志昭乃遺謨

制曰朝廷重民社之司功推循吏臣子凜冰淵之操教本慈幃爾王民乃河南衛輝府
汲縣知縣劉廣澍之母淑慎其儀柔嘉維則宣訓詞於朝夕不忘育子之勤集慶澤於
門閭式被自天之寵茲以覃恩封爾爲太孺人於戲仰酬顧復之恩勉思撫字載煥絲
綸之色用慰劬勞

勅授王旭齡本身

道光二十年

宣
宗
旻
寧

制曰求治在親民之吏端重循良宣猷為佐治之資覃隆褒獎爾四川雅州府榮經縣知縣王旭令視躬恪慎蒞事精勤詰奸宄而克靖礪廉隅以自持慶典欣逢褒章宜煥茲以覃恩授爾為文林郎錫之勅命於戲撫循是職布雅化以宣猷綸綍式須沐新恩而勵節

勅贈李芝齡之祖父母

光緒二十八年九月十八日

德
宗
載
湑

制曰册府酬庸聿著人臣之茂績德門輯慶式昭大母之芳徽爾郭王氏迺就職直隸州

州判李芝齡之祖母箴誠揚芬珩璜表德職勤內助宜家久著其賢聲澤裕後昆錫類式承乎嘉命茲以覃恩賜贈爾為孺人於戲播徽音於彤管壺範彌光膺異數於紫泥天庥允劭

制曰考績報循良之最用獎臣勞推恩溯積累之遺載揚祖澤爾李有惠迺就職直隸州州判李芝齡之祖父母錫光有慶樹德務滋嗣清白之芳聲澤留再世衍弓裘之令緒枯篤一堂茲以覃恩賜贈爾為徵仕郎於戲錫之勅命聿修念祖膺茂典而益勵新猷有穀貽孫發幽光而還彰潛德

勅封李芝齡之父母

光緒二十八年九月十八日

制曰資父事居臣子篤匪躬之誼作忠以孝國家宏錫類之恩爾李珠迺就職直隸州
州判李芝齡之父善積于身祥開厥後教子著義方之訓傳家裕堂構之遺茲以覃恩
封爾爲徵仕郎錫之勅命於戲殊榮必逮于所親寵命用光夫有子尙宏佑啟益勵忱
恂

制曰奉職在公嘉教勞之有自推恩將母宜錫典之攸降爾

王任張崔

氏迺就職直隸

州州判李芝齡之母壺範宜家風協承筐之媪母儀貽穀載昭畫荻之芳茲以覃恩封
爾爲孺人於戲彰淑德於不瑕式榮象服膺寵命之有赫益賁徽音

右勅 共十
一篇

詔

北朝魏

詔慕容白曜

顯祖獻
皇帝 拓跋弘

卿總率戎旅討除不賓霜戈所向無不摧靡旬日之內剋拔四城韓白之功何以加此
雖升城戍將房崇吉守遠不順危亡已形潰在旦夕宜勉崇威略務存長轡不必窮兵
極武以爲勞頓且伐罪弔民國之令典當招懷以德使來蘇之澤加於百姓

魏書卷五十一
傳第三十八

金

太祖詔宜錦乾顯成川豪懿等州典兵官

天輔七年正月

太祖鐵木真

詔曰諸州部族歸服日淺民心未寧今農事將興可遣分諭典兵之官無縱軍士動擾

人民以廢農事

金史

太祖詔招諭宜州

天輔七年二月

太祖鐵木真

詔閣母曰遼之土地皆為我有

時宜州復叛

彼總復叛終皆吾民可縱其耕稼毋得侵掠

金史

元

世祖詔王榮祖詣闕撫慰之

中統元年夏

世祖忽必烈

詔曰卿父子勤勞於國誠節如一進沿邊招討使兼北京等路征行萬戶賜寶鞍弓矢

元史王榮祖傳

成宗加號大成至聖文宣王詔

成宗大德十一年辛巳加封大成至聖文宣王

成宗鐵木耳

蓋聞先孔子而聖者非孔子無以明後孔子而聖者非孔子無以法所謂祖述堯舜憲

章文武儀範百王師表萬世者也朕纂承丕緒敬仰休風循治古之良規舉追封之盛

典加號大成至聖文宣王遣使闕里祀以太牢於戲父子之親君臣之義永為聖教之

尊天地之大日月之明罄名言之妙尚資神化祚我皇元

此碑現在孔廟櫺星門內東邊

成宗加封五鎮詔

三代以降九州皆有鎮山所以阜民生安地德也五嶽四瀆先朝已賞加封惟五鎮之祀未舉殆非敬恭明神之義其加東鎮沂山爲元德東安王南鎮會稽山爲昭德順應王西鎮吳山爲成德永靖王北鎮醫巫閭山爲貞德廣寧王中鎮霍山爲崇德靈應王仍勅有司歲時與嶽瀆同祀著爲定式

崑山之脊東爲廣寧今爲北鎮西爲義州今爲義縣

明

太祖正神名號詔

太祖
朱元璋

自有元失馭土宇分裂聲教不同朕奮起布衣以安民爲念訓將練兵平安華夏天統以正永爲惟治之道必本於禮考諸祀典知五嶽五鎮四海四瀆皆高山之封起自唐世崇名美號歷代有加在朕思之則有不然夫嶽鎮海瀆皆高山廣水自天地開闢以至於今英靈之氣萃而爲神必皆受命於上帝幽微莫測豈國家封號之所可加黷禮背經莫此爲甚至如忠臣烈士雖可以加封號亦惟當時爲宜夫禮所以明神人正名分不可以僭自今依古定制凡嶽鎮海瀆並去其前代所封名號止以山水本名稱其神郡縣城隍神號一體改正歷代忠臣烈士亦依當時初封以爲實號後世溢美之稱皆與革去其孔子善明先王之要道爲天下師以濟後世非有功於一方一時者可比所有封爵直仍其舊庶幾神人之際名正言順於理爲當因稱朕以禮事神之意所定

各神名號開列於後

一五嶽稱東嶽泰山之神南嶽衡山之神中嶽嵩山之神西嶽華山之神北嶽恆山之
神

一五鎮稱東鎮沂山之神南鎮會稽山之神中鎮霍山之神西鎮吳山之神北鎮醫巫
閭山之神

一四海稱東海之神南海之神西海之神北海之神

一四瀆稱東瀆大淮之神南瀆大江之神西瀆大河之神北瀆大濟之神

一各處府州縣城隍稱某府城隍之神某州城隍之神某縣城隍之神

一歷代忠臣烈士並依當時初封爵名稱之

一大小神祠無功於民不應祀典者即係淫祠有司勿得致祭嗚呼明則有禮樂幽則

有鬼神其理既同其名當正故茲詔示咸使聞知

右詔 共七篇

諭

元

太祖親諭王榮祖

太祖鐵本真

汝父子宣力我家不意為張致所襲歸語汝父善撫其軍自今以往當忍恥蓄銳俟逆黨平彼之族屬城邑人民一以付汝吾不吝也仍免徭賦五年使汝父子世為其官

元史

王榮祖傳

太祖遣使諭王榮祖

彼小國

時榮祖從諸王也忽略地三韓降天龍諸堡破五里山城下豐子城竹林寨苦苦數島

負險自守釜中之魚自死緩急可否卿當熟思

清

諭禮部

康熙八年二月辛卯

聖玄燁

諭曰察哈爾阿布奈親王之妻著停封餘如議阿布奈係出征所獲之人乃尙以固倫大長公主命為親王恩遇優渥較之在內諸王及在外蒙古諸王止有太過並無不及乃在外諸王貝勒等每年俱來問安年節來朝阿布奈竟忘恩養八年以來不一朝請且每年遣人存問公主所生之子頒給恩賜阿布奈猶不親身一問太皇太后及朕躬安公主所生幼子阿布奈理應撫養乃交與已分家之長子更屬何心此等情節著理藩院嚴察議奏

時禮部請封外藩蒙古諸王妃

諭理藩院

康熙八年五月己未

諭曰阿布奈理應依議處死但向經恩遇故從寬免死著革去親王嚴禁盛京

諭理藩院康熙八年九月己未

諭曰昔我太宗皇帝遣發王師獲額哲等以歸念其為察哈爾林丹漢之子乃元朝苗裔不忍廢絕特沛殊恩加封和碩親王迨額哲既歿以其弟阿布奈襲王爵阿布奈宜思世受恩眷竭誠圖報乃上負國家豢養之仁累失外藩朝賀之禮情罪重大理宜削封但念皇祖太宗皇考世祖優容撫恤之意不忍奪其封爵其以阿布奈之子布爾尼仍襲封和碩親王

諭察哈爾親王布爾尼等康熙十二年十二月壬戌

諭曰吳三桂本為流寇所迫勢窮來歸之人朕推置腹心委以重任累進親王子為額駙恩養至此尚行反叛負國已極今已遣大兵進勦吳三桂雖反亦將安往朕與爾等亦同一體如有需用爾等之處可俟春回草青時再聽調遣時察哈爾親王布爾尼等朝正聞吳三桂反爭請獻所攜馬匹助軍復有願率

所部兵隨大兵進討者

諭滾濟斯札布康熙十四年夏四月辛卯

諭曰初長史辛柱首布爾尼負恩背叛朝廷正欲查其情實適貝子遣舍布來奏布爾尼於三月二十五日使獲衛巴米說貝子同叛貝子即遣使奏聞復調兵為擒討計朝廷深為嘉悅今布爾尼逆狀既實貝子等可選良馬速率所部討擒逆渠厥功匪細儻

馬瘦不堪馳騁亦宜各守地方大兵定於四月初六日自京啟行故豫令知之

先是布爾尼既反遣

人求助於土默特貝子滾濟斯札布滾濟斯札布遣其三等護衛舍布來告上厚賚之仍令理藩院作書時察哈爾鄰近部落王貝勒等知布爾尼反先後來人報上命理藩院郡中馬喇貝外郎塞冷赴諸部落調兵又諭理藩院作書如與滾濟斯札布書指

諭撫遠大將軍信郡王鄂札等啟行

康熙十四年夏四月癸巳

諭曰大兵出山海關當宣布累朝待布爾尼厚恩及朕不忍加誅之意彼若悔罪來歸則已否則以敕書付縱還蒙古持往諭之即布爾尼等臨陣來降亦當保全恩養今值

蒙古馬瘦爾等速往毋違

諭察哈爾布爾尼

康熙十四年夏四月癸巳

敕曰長史辛柱奏爾舉動乖戾勢欲為亂朕初未信既而鄰近各旗王貝勒等相繼遣人告變朕猶疑之朕惟察哈爾遭亂覆亡之後爾伯父額哲等受太宗文皇帝殊恩封為親王國家於察哈爾不薄矣誠望爾子孫報效於世世不應及爾身而負恩叛國也朕雖不據以為實但告變者接踵而至念爾在惑於奸宄之言抑或別有不得已之故耳故發大兵來問如有別情爾可明白奏聞朕必赦爾罪愆仍敦夙好爾受累朝恩養又為公主所生以至戚不忍遽滅故屢行曉諭若仍執迷恐貽後悔

諭布爾尼弟羅不藏

康熙十四年夏四月癸巳

敕曰爾當開諭爾兄布爾尼令其悔罪歸誠爾等以及子孫庶不失榮貴若布爾尼不

悟恐以爾兄之故併累及爾爾果能率屬來者仍待以親親之道即以王爵封之必不食言爾爲公主子於國爲至戚故行曉諭其於大兵未至時向爾兄開陳利害速令請罪以副朕不忍遽滅之意

諭察哈爾部衆康熙十四年夏四月癸巳

勅曰爾等當向布爾尼申明利害彼若悔罪歸誠爾等亦獲福多矣朕以爾等爲太宗文皇帝世祖章懷柔之國不忍以布爾尼一人之故遽加剿滅因此反復申諭若布爾尼拒諫不悛或擒獻逆渠或自行投降朕錫以官爵俱加恩養斷不食言往時察哈爾大臣來歸者受恩隆重爾等共知勿於太平安樂時自取禍敗

在京曾布爾尼垂札布反悉就拘禁上特釋之令齋敕與大兵同往

諭札什康熙十四年夏四日癸巳

勅曰員外郎圖爾哈圖致王言具見悃誠王可率本旗兵固守地方王又言大兵宜出古北口夫古北口石徑崎嶇大兵多且携有火器恐致稽延今仍出山海關王宜不時

密探凡有動靜即具奏遣騎速奏

時奈曼王札木山附布爾尼遣護衛巴地約喀喇沁多羅杜楞郡王札什同叛誑嚇之云科爾沁十旗及札魯特阿祿科爾沁烏朱行秦高齊忒阿霸垓諸部

落悉起兵相應札什歸其使以無能謝之即具奏陳明心迹遣其護衛達喇世入告迨理藩院員外郎圖爾哈圖奉命至其地札什出迎具述前情且云身蒙主恩爵爲郡王何敢同叛若止二旗爲亂我力可支但恐應彼者果衆耳使臣不可久留宜速回奏若出師宜從古北口行圖爾哈圖詰其故札什曰無事多言但以是奏皇上自能鑒察圖爾哈圖復欲詣款漢部落札什止之遂不果歸復屬曰途中凡訊問者但答云我等奉旨來召札什因其馬瘦不能赴京我等今仍回去圖爾哈圖還具陳如札什指上曰大兵衆

多若由古北口則崎嶇難行且多帶紅衣曠具耽延時日自應由山海關札什既不忘國恩凡得逆渠動靜即令遣騎具奏進邊後馳驛速來於是賜之敕書令達喇世齋往

諭理藩院

康熙十四年夏四月甲辰

奈曼台吉鄂齊爾等不與札木山同謀率屬來歸忠貞可嘉俟事平日札木山王爵可

與諸台吉內承襲諸台吉或暫居敖漢與喀喇沁地方聽自便其奏事黨西喇從優授

為三等達爾漢世襲勿替

時奈曼札木山已附布爾尼使人招台吉鄂齊爾等鄂齊爾等遂率九佐領兵與其妻子奔漢尋復至喀喇沁札什遣護衛黨西喇來奏未幾奈曼二等台吉吳勅木濟同其母率所屬

二佐領兵避居士默特亦遣人來奏上亦優旨答之

諭鎮大同察哈爾兵衆

康熙十四年夏四月丁巳

勅曰昔察哈爾潰散時爾等祖父來歸太宗文皇帝論功賜與世職分隸八旗眷顧撫

養以迄於茲吳三桂造亂調爾駐守地方今參領舒什蘭奏爾等不請所司遽行遁歸

理應治罪但先將爾八旗察哈爾調發同官兵進征今又盡徵餘兵爾等或慮妻子牲

畜無人養育馬又羸瘦難以從征以此亡歸其情可恕今特行寬宥其各返故伍如常

毋生疑畏昔額哲阿布奈被俘不沒入旗下為奴封額哲為親王所部人員亦加撫養

亡國苗裔無功而施大恩若此古所希有阿布奈會有大罪又全其命以其子布爾尼

襲封親王布爾尼不思報效背恩叛逆故命大將軍信郡王兵進討於是月二十二日

大破之於達祿盡殲其衆科爾沁等諸部王貝勒貝子公台吉等俱以布爾尼罪大惡

極起兵會剿恐爾等不知此情妄惑流言陷於罪辜故特賜曉諭

時參領舒什蘭奏奉調宜府左翼四旗察哈爾鎮大同衆

譚毀邊牆私遁上命散秩大臣綽爾濟杜爾麻等率八旗章京侍衛齋救撫之

諭撫遠大將軍信郡王鄂札等康熙十四年五月辛酉

諭曰聞向日所調左翼察哈爾駐紮宣府者今毀邊牆私遁恣為寇鈔直趨獨石口此輩或止知察哈爾變亂不知我兵戰勝察哈爾及額駙沙津射殺布爾尼兄弟之事欲往助彼未可知也其巴林翁牛特敖漢喀喇沁土默特諸路兵皆調征布爾尼其妻子在家儻叛卒經過劫掠深為可虞今察哈爾事平大將軍等可諭令諸王貝勒台吉等率兵速回各守境內叛卒一到即為剿除我兵定於五月初六日速往追剿爾等其傳諭諸部知之

諭兵部康熙十四年五月辛酉

諭曰本月十四日太監劉忠傳奏太皇太后諭旨慈寧宮內庶妃有母九十餘歲同其兄薩林地尙在察哈爾處聞之深為憫惻軍前可弗加擄掠朕欽承諭旨仰見太皇太后仁慈已極敢不敬副聖懷爾部即速行文彼處如伊等陣亡則已或存一二或全未傷殘即行收管其家產亦勿致散失交與內務府所管莊頭解送來京

諭議政王大臣等康熙十四年五月甲子

諭曰昔察哈爾遭亂覆亡太宗文皇帝收集參養編爲整旗歷有年所今布爾尼背恩作亂實僧渾額津噶爾馬色冷輩匪類教之其餘官民毫無干涉此皆太宗文皇帝撫育之人朕甚憫焉凡投歸軍前或投入鄰旗及潰散者其令大將軍鄂札副將軍圖海等議速行收集作何贍養另奏請旨

諭撫遠大將軍信郡王鄂札等

康熙十四年閏五月癸卯

諭曰王將軍諸大臣遠行征討滅察哈爾國建立大功深可嘉悅俱著近前行抱見禮

凱旋大臣章京及冒刃效力軍士以上俱進前坐賜茶

時撫遠大將軍信郡王鄂札副將軍都統大學士圖海等征滅察哈爾班師凱旋上率在京王

貝勒大臣迎勞於南苑之大紅門上御黃幄鄂札等行禮畢上復命副將軍圖海御幄侍坐問以戰陣之事上曰軍士此役奮勇效命遂滅叛國立奏凱旋朕心甚悅八旗冒刃效力軍士以上朕欲面問遂令次第至御幄前一徧問

諭理藩院

康熙十四年九月戊申

諭曰今時屆嚴冬逃散人丁戶口加意移來安插務令得所以副朕柔遠至意

先是布爾尼叛信

郡王鄂札等討滅之餘黨散附各部落者頗多至是遣理藩院侍郎博羅特等於義州錦州等處安插

聖祖諭戶刑二部

康熙二十一年

朕承祖宗丕緒撫御區宇日以育元元爲念自逆賊吳三桂倡亂滇南多方煽動軍興八載中外騷擾仰賴祖宗在天之靈默垂眷佑殄滅兇渠民生又安疆圉底定爰特行徧祀山陵之禮用告成功茲恭詣福陵昭陵謁祭禮竣惟盛京爲國家肇基重地朕躬

親幸宜大沛澤以示殊恩山海關以外及寧古塔等處地方官吏軍民人等除十惡等真正死罪不赦外其餘已結未結一切死罪俱著減等發落軍流徒杖等犯悉准赦免奉天錦州二府屬康熙二十一年地丁正項錢糧著通行蠲豁其官役墊補包賠等項應追銀兩察果家產盡絕亦并豁免用稱朕加惠根本優恤黎民至意

聖祖諭十六條

康熙三
十年

敦孝弟以重人倫篤宗族以昭雍睦和鄉黨以息爭訟重農桑以足衣食尙節儉以惜財用隆學校以端士習黜異端以崇正學講法律以儆愚頑明禮讓以厚風俗務本業以定民志訓子弟以訓非爲息誣告以全良善誡匿逃以免株連完錢糧以省催科聯保甲以弭盜賊解讐忿以重身命

聖祖特恩通蠲直隸各省等處錢糧諭

朕誕膺大統撫育寰區夙夜孜孜不自暇逸反以爲民也勤圖利濟休養生全即無水旱之虞時布寬仁之政蠲租除賦務使遐方率土無不均霑或值雨暘偶愆出帑發粟多方賑恤其有益於吾民者靡弗備舉而亟行之以昭朕愍懇周詳之至意前四十九年所頒諭旨申晰甚明原欲將五十年天下錢糧通行蠲免以諸臣集議恐需用兵餉撥解之際兵民驛遞益煩苦故自五十年爲始三年之內全免一週除將直隸奉天等

九省康熙五十年地丁錢糧一概蠲免及歷年舊欠錢糧一并免徵外山西河南陝西甘肅湖北湖南各撫屬除漕項外五十一年應徵地畝銀共八百四十萬四千兩有奇人丁銀一百二十萬八千壹百兩有奇着察明全免並歷年舊欠共五十四萬二千三百兩有奇亦俱着免徵其五十二年應蠲省分至期候旨行民間舊欠既經豁免嗣後每年額徵錢糧務如數完全不及額或有虧空托稱民欠即責令督撫以下官員償補仍從重治罪該督撫須實心力行期副朕惓惓愛民之意如有指稱事故侵期科派事發之日必嚴行究治諭旨到日遍示城郭鄉村深山窮谷咸使知悉爾部即遵諭行特諭

世宗諭領侍衛內大臣等

雍正元年六月

世胤 禎

奉天地方乃我國家啟祥之所甚屬緊要朕前詣奉天聞地方人言論悉知兵丁差役煩多不能休息之處曾降諭旨令將軍唐保住將無用塘哨悉行撤退唐保住雖將無用塘哨撤退而將軍副都統於定額親隨兵丁之外多帶百餘人省城官員又各帶其子弟因而屬員效尤各多帶兵丁以致應差乏人兵丁仍多勞苦又於鎗手中以選擇熟練之人爲名每城調取二三十人田獵夫省城相隔遙遠往返人馬俱疲再自山海關以至廣寧皇莊頭三百有奇止交筆帖式領催等微末人員駐劄中後所催徵錢糧

辦理事務以致交結匪類糶賣官糧漁利入己且自中前所至錦州義州廣寧等處相隔二三百里詞訟案內干連之莊頭地方官調取抗不赴審即候到案亦抗不遵行以致案內遵行之人每多苦累再人命案件呈報地方官之後雖相距數百里亦必俟筆帖式領催檢驗炎暑日久難以憑信則百方檢驗慘不可言朕之所聞如此從前雖每年派鄉員前往管轄莊頭因不實心辦理於地方並無裨益應遣大臣一員駐劄於寧遠錦州大凌河等處地方令其料理一應公務管轄里長獵戶遇有詞訟事件會同地方官審結此所遣官員應令住劄何處著領侍衛內大臣等兵部總管公同詳議具奏

乾隆四十八年
聖京通志聖製

世宗諭知府

雍正元年

國家親民之官莫先於守令蓋州縣官與民最親而知府又與州縣官最親凡州縣興利除弊之事皆知府有專責焉是知府一官分寄督撫監司之耳目而爲州牧縣令之表率承流於上宣化於下所繫綦重矣漢宣帝有曰太守吏民之本也又曰庶民所以安其田里而無歎息愁恨之心者政平訟理也與我共此者其惟良二千石乎故兩漢循良稱盛而賢守尤多龔黃召杜諸人大都皆廉潔和平正身率屬以與民體養生息史稱其所居民富所去民思此皆彰明較著者也皇考澄肅官方慎簡僚吏知府中有

政績茂異聲名著聞者必優眷數年之間即膺殊擢所以鼓勵循良務令羣黎受福爾等蒙皇考簡用之恩受國家民社之寄地方不甚遼遠則於民間之疾苦可以周知勢分不甚懸殊則於屬下之賢否可以洞悉爾果廉正自持屏絕賄賂則督撫監司必不致肆行需索而州牧縣令亦不敢恣意貪婪近聞州縣火耗任意加增固知顧忌以小民之脂膏飽貪吏之谿壑由爾不能却遺金於暮夜又安能禁屬吏之濫征乎盤查倉庫必須覈實不可視爲故事乃或借盤查之名勒索餽遺是因盤查而虧空愈甚矣爾能時勤勸誡加以體恤則州縣可無虧空之虞能制節謹度淡泊是安則爾亦可免虧空之累勸農課桑以厚風俗禁戢強暴以安善良平情聽斷以清獄訟皆爾職守之所當盡者至於督撫舉劾州縣必由爾之詳揭務須秉公持正勿涉偏私若善於逢迎者從而庇護薦拔之而端方恬靜之人反故爲摧抑下吏皆苟且營私以求容悅地方之事尙可問乎居官者每有初入仕途清操自矢慚登華要頓改初心旣知砥礪廉隅即當始終一節更有巧於仕宦者人每謂其名者在吏治而吏治之本在州縣苟州縣之品行不端猶基不立則室不固庸有濟乎皇考臨御六十一年灼知州縣之重特行引見咨詢明試至詳至慎其有廉能之員每不次超擢以示鼓勵今海內羣黎皆皇考所懷保也朕膺皇考之治功惟爾州縣諸臣具有父母斯民之責其爲朕立之基址以固

邦本焉誠能潔己奉公實心盡職一州一縣之中興仁興讓教孝教忠物阜民安刑清訟簡朕將升之朝宇用作股肱如或罔念民瘼恣意貪婪或朘削肥家或濫刑逞虐或借刻以爲清或恃才而多事或諂媚上司以貪位或任縱胥吏以擾民或徇私逞欲以上虧國帑王章具在豈爾貸歟更有任州縣時私肥已囊而漫云且俟顯要方立名節者其與初市清名晚而改操之人何以異哉至於錢糧關係尤重絲毫顆粒皆百姓之脂膏增一分則民受一分之累減一分則民沾一分之澤前有請暫實兼收朕最不解此語夫名者實之華果能潔己愛民奉公盡職此所謂實也治行稱首民歌輿頌此所謂名也實至而名隨之如本立而華茂焉若弋取虛譽爲名而以封殖多藏爲實此則小人之尤更甚於貪黷彰聞之輩矣朕纘承大統夙夜祇懼惟恐有負皇考付託之重深冀爾等各體此意精白乃心以古循良自勉若徇私納賄不能率屬愛民貽害地方蔑視憲典三尺具在朕不能爲爾等寬也特諭

世宗諭老農

雍正元年

朕惟四民以士爲首農次之工商其下也漢有力田孝弟之科而市井子孫不得仕宦重農抑末之意庶爲近古士子讀書砥行學成世用國家榮之以爵祿而農民勤勞作苦手胼足胝以供租賦養父母育妻子其敦龐淳朴之行豈惟工賈不逮亦非不肖士

人之所能及雖榮寵非其所慕而獎賞要當有加其令州縣有司擇老農之勤勞儉朴身無過舉者歲舉一人

奉天府屬州縣每歲照例舉行七年奉文三歲一舉老農

給以八品頂帶榮身以示鼓勵

清雍正十三年盛京通志典謨

世宗諭州縣

雍正元年

朕惟國家首重吏治爾州牧縣令乃親民之官吏治之始基也貢賦獄訟爾實司之品秩雖卑職任綦重州縣官賢則民受其利州縣官不肖則民先受其害膺茲任者當體朝廷惠養元元之意以愛民爲先務周察鄙屋綏輯鄉里治行果有其實循卓自有其名非內聚賭而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民爲邦本本固邦寧夫所以固邦本者在吏治而吏治之本在州縣苟州縣之品行不端猶基不立則室不固庸有濟乎皇考臨御六十一年灼知州縣之重特行引見咨詢明試至詳至慎其有廉能之員靡不超擢以示鼓勵令海內羣黎皆皇考所懷保也朕膺宗社重寄思繼皇考之治功惟爾州縣諸臣具有父母斯民之責其爲朕立之基址以固邦本焉誠能潔已奉公實心盡職一州一縣之中興讓教孝教忠物阜民安刑清訟簡朕將升之朝宇用作股肱如或罔念民瘼恣意貪婪或朘削肥家或濫刑逞虐或借刻以爲清或恃才而多事或諂媚上司以貪位或在縱胥吏以擾民或徇私逞欲以上虧國帑王章具在豈爾貸歟更有任州縣時私肥己囊

而漫云且俟顯要方立名節者其與初市清名晚而改操之人何以異哉至於錢糧關
係尤重絲毫顆粒皆百姓之脂膏增一分則民受一分之累減一分則民沾一分之澤
前有請暫加火耗抵補焉空帑項者皇考示諭在廷不允其請爾諸臣共聞之矣今州
縣火耗任意加增視爲成例民何以堪乎嗣後斷宜禁止或被上司察核或被科道糾
叅必從重治罪決不寬代夫欲清虧空之源莫如節儉正直節儉則用無不足正直則
上官不可干以私若賸小民之生以飽上官之貪欲冒不測之罪以快一時之奢侈豈
砥礪廉隅爲民父母之道乎爾州縣等官其恪共乃職勿貽罪戾毋謂地遠官卑不及
察其賢否也特諭

世宗諭教士子責成學臣教職

雍正四年

爲士者四民之首一方之望凡屬編氓皆尊之奉之以爲讀聖賢之書列膠庠之選其
所言所行俱可爲鄉人法則也故必敦品勵學謹言慎行不愧端人正士然後以聖賢
詩書之首開示愚民則民必聽從其言服習其教相率而歸於謹厚或小民偶有不善
之事即懷思恥之心相戒勿令某人知之如古人之往事則民風何患不淳世道何患
不復古耶朕觀今日之士子雖不乏閉門勤修讀書立品之輩而蕩檢踰閑不顧名節
者亦復不少出入官署包攬詞訟或武斷鄉曲欺壓平民或違抗錢糧藐視國法或代

民納課私潤身家種種卑污下賤之事難以悉數彼爲民者見士子誦讀聖賢之書而行止尙且如此則必薄待讀書之人而並輕視聖賢之書矣士習不端民風何由而正其間關係極爲重大朕自即位以來加恩學校培養人材所以教育士子者無所不至宜乎天下之士皆鼓舞奮興爭自濯磨盡去其佻達之習矣而內外諸臣條奏中臚列諸生之劣跡請行嚴懲者甚多朕思轉移化導之法當先端其本源教官者多士之儀型也學臣者教官之表率也教官多屬中材又或年齡衰邁貪位竊祿與士子爲朋儔視考課爲故套而學臣又但以衡文爲事任教官之因循怠惰苟且塞責漫不加察所以倡率之本不立無怪乎士習之不端而風俗之未淳也朕孜孜圖治欲四海之大萬民之衆皆響風而慕義革薄而從忠故特簡督學之臣慎重學臣之職欲使自上而下端本澄源以收實效也凡爲學臣者務使持公秉正宣揚風化於教官之稱職者即加薦拔溺職者即行參革爲教官者訓誨士子悉秉誠心如父兄之督課子弟至於分別優劣則至公至當不涉偏私如此各盡其道則士子人人崇尚品詣砥礪廉隅且不但自淑其身而羣黎百姓日聞善言日觀善行以生其感發之念風俗之不變庶幾其可望也特諭

世宗諭學政保舉生員

雍正五年

國家設學校以儲養人材鄉會廷試拔其尤者而用之即古選士造士之遺意也但士子作文有一日之長短縱使主司公明搜羅豈能無遺况去取惟憑文藝其人品之高下才能之優絀無由得知每有出羣拔萃之才屢試不第即或晚得一第而年力衰邁不堪爲國家任用朕思各省學政奉命課士黜劣舉優係其專責嗣後學政三年任滿將生員中實在人品端方有猷有爲有守之士大省舉四五人小省舉二三人送部引見朕親加考試酌量擢用現在報滿各學政即尊照薦舉其到任未久者如有所知亦即舉出夫一省而舉數士不可謂無人學政巡歷各府三年之久日與士子相親考文察行不得謂不知但能虛公衡鑑所舉必得其人且風聲所樹凡讀書士子必皆鼓舞振興立學敦行求爲有用之儒于士習人才大有裨益該學政其各實心奉行毋得苟且塞責如有徇私冒濫等弊必加治罪特諭

世宗諭耕藉

雍正五年

自雍正二年以來朕躬耕藉田而藉田之中每歲必產嘉穀上年自雙穗至於九穗今十三穗在廷諸臣及京都耆庶皆驚訝以爲奇朕之宣示於衆者並非矜詡誇張以爲祥瑞蓋寔有見於天人感召之理捷於影響而朕敬天之心至誠至切願與內外大小臣工其勉之也稼穡爲天地之寶寔生民之命攸關我聖祖仁皇帝臨御六十余年無

刻不以重農力穡爲先務仰觀天時俯察地理辦土性而課人工資雨暘而防旱潦肝食宵衣偶遇雨澤愆期聖心憂勞之切侍側臣子皆惶悚不寧所以爲萬民謀粒食者至矣盡矣朕仰目都者四十餘年今纘承大統竭誠效法念切民依每歲虔視先農躬耕帝藉仰蒙上天眷祐疊錫嘉禾信而可徵纖毫不爽是以特頒諭旨令各省守土官共舉耕藉之禮爲萬方百姓祈禱秋成今見各省督撫奏報前來處處風雨均調春麥秋禾並登豐稔雖邊遠荒僻之地亦慶有秋惟直隸湖廣安徽數州縣近水最依之處常年被潦者略有侵注亦不爲災是今歲可稱大有年矣朕感上天之垂慈慶下民之受福而推求其故良由今年各省初耕藉田各該有司自然小心敬慎齊被虔誠是以感格上蒼而獲此盈寧之錫尙從此益加敬謹不懈初心則歲之屢豐可以預必爾督撫等可通行曉諭所屬官民當凜帝鑒之匪遙勿視耕田爲故事永矢敬恪以迓天和

天下臣民受福斯朕之福也思之慎之毋忽朕言

雍正十年盛
京通志典謨

世宗諭重農

雍正
七年

自古帝王致治誠民莫不以重農爲首務書陳無逸先知稼穡之艱難詩載豳風備叙田家之力作論語云百姓足君孰與不足孟子云民事不可緩也蓋國以民爲本民以食爲天農事者帝王所以承天養人久安長治之本也我國家撫綏寰宇聖祖仁皇帝

臨御六十餘年深仁厚澤休養生息戶口日增生齒日繁而直省之內地不加廣近年以來各省皆有收成其被水歉收也不過州縣數處耳而米價遂各覺漸貴閩廣之間頗有不敷之慮望濟於鄰省良由地土之所產如舊而民間之食指愈多所入不足以供所出是以米少而價昂此亦理勢之必然者也夫米穀爲養命之寶既賴之以生則當加意愛惜而不可存輕棄之心且資之者衆尤當隨時撙節而不可縱口腹之欲每人能省一勺在我不覺其少而積少成多便可多養數人若人人如此則所積豈不更多所養豈不更衆乎養生家以食少爲要訣固所以頤神養和亦所以節用惜福也況脾主以信習貫便成自然每見食少之人其精神氣體未嘗不壯此顯而可見者至於各省地土其不可以種植五穀之處則不妨種他物以取利其可以種植五穀之處則當視之如寶勤加懇治樹藝菽粟安可舍本而逐末棄膏腴之沃壤而變爲果木之場廢饗餐之恆產以倖圖贏餘之利乎至於煙葉一種於生人日用毫無裨益而種植必擇肥饒善地尤爲妨農之甚者也小民較量錙銖且但顧目前而不爲久遠之計故當圖利之時若令其舍多取寡棄重就輕必非其情之所願而地方官遽然繩之以法則勢有所難行轉滋紛擾惟在良有司勲懃懇懇諄切勸諭俾小民豁然醒悟知稼穡爲身命之所關非此不能生活而其他皆不足恃則羣情踴躍不待督課而皆盡力於南

畝矣朕聞江南江西湖廣粵東數省有一歲再熟之稻風俗如此而仍至於乏食者是地土之力有餘而播植之功不足豈非小民習於怠惰而有司化導者有未至耶或者曰米穀大多則價賤而難於糶賣昔人有穀賤傷農之說諺語所謂熟荒者此則不必過慮假若小民勤於耕作收穫豐盈至價賤而難於出糶朕必多發官價以糶買之使重農務本之良民獲利而有餘貲也朕生平愛惜米穀每食之時雖顆粒不肯拋棄以朕玉食萬方豈慮天庾之不給而所以如此撙節愛惜者實出於天性自然之敬慎並不出於免強且於米穀乃上天所錫以生養萬民者朕爲天下生民主惟有敬慎寶重仰冀天心點佑雨暘時若歲獲有秋俾小民家有蓋藏人歌樂土朕旣爲億萬生民計不敢輕忽天貺爾等紳衿百姓獨不自爲一身一家之計乎朝夕生養之需旣受上天之賜若果加意愛惜隨時撙節則天必頻頻賜賚長享盈寧之福若恣情縱欲暴殄天物則必上干天怒不蒙賜賚而水害災祲之事皆所不免其理豈或爽哉又聞江西廣西地方竟有米穀飼養豚豕者試思穀食與肉食孰重孰輕孰急孰緩而乃以上天之所賜小民終歲勤苦之所獲者爲豢養物類之用豈不干天和而輕民命乎朕所以倦倦訓諭者惟期天下之人專務本業以杜浮靡愛惜物力以圖久遠其體朕敬迓天庥勤恤民隱之意則爾等家室必益至於豐饒爾等子孫必永綿其福澤思之毋忽

朕言着將此曉諭內外官民人等並通行遠鄉僻壤咸使聞知特諭

世宗欽定訓飭州縣規條諭

牧令爲親民之官一人之賢否關係萬姓之休戚故自古帝王慎重其選而朕之廣攬旁求訓勉告誡冀其奏循良績以惠我烝黎者亦備極苦心矣惟是地方事務皆發端於州縣頭緒紛繁情僞百出而膺斯任者類皆初登仕籍之人未練習於平時而欲措施於一旦無怪乎徬徨瞻顧心志茫然即探訪咨詢而告之者未必其盡言無隱此古人所以有學製美錦之歎也向大學士朱軾左都御史沈近思外任多年周知地方利弊雍正二年會令二臣商著規則以爲州縣之南車乃書未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛今二臣各抒所見繕錄諸條以進朕親家披覽見其條理詳明言詞剴切民情吏習罔不兼該大綱細目莫不備舉誠新進進之津梁庶官之模範也在二臣各就其所閱歷者而言繁簡同異之間不必一致而慎守官方勤恤民隱害除利興易俗移風其大旨則一而已矣爰就本文付之剗劂頒賜州縣官各一帙俾置之几案間朝夕觀覽省察提撕治效未臻必思所以勉之弊端未革必思所以去之本之以實心行之以實力毋始勤而終怠毋靜言而庸違如此則不但國家得司牧之賢草野有父母之頌而爾等身膺顯擢叨

被榮光福貽子孫名標史冊豈不美歟特諭上全

世宗諭禁火化並勸除堪輿

古之葬者厚衣之以薪葬於中野後世聖人易之以棺槨所以通變宜民而達其仁孝之心也本朝肇迹關東以師兵爲營衛遷徙無常遇父母之喪棄之不忍携之不能故用火化以便隨身捧持聊以遂其不忍相離之願非得已也自定鼎以來八旗蒙古各有寧居祖宗墟墓悉隸鄉土喪葬可依古以盡禮而流俗不察或仍用火化比狃于沿習之舊而不思當年所以不得已而出此之故也朕思人子事親送死最爲大事豈可不因時定制而痛自猛省乎嗣後遠鄉貧人不能扶柩回里不得已携骨歸葬者姑聽不禁外其余一概不許火化倘有犯者按律治罪族長及佐領等隱匿不報一并處分朕又聞漢人多惑於堪輿之說購求風水以致累年停柩漸至子孫貧乏數世不得舉葬愚悖之風至此爲極嗣後守土之官必多方勸導俾得按期葬埋以妥幽靈以盡子職此厚人倫美風俗之要務也各凜遵毋忽欽此

雍正十三年盛京通志典謨

世宗諭內閣

雍正七年十一月三十日

奉天地畝向來多有隱匿每有三四畝報一畝者是以概以上則徵科民力輸將甚爲寬裕後因有隱匿積弊民間互相爭競紛紛計訟官民不便前歲朕遣大臣官員清丈

漸次釐正田畝皆得實數今若按畝俱照舊則徵糧恐小民輸將無力著盛京戶部侍郎會同奉天府尹確查田畝之肥瘠分別上中下三則起科酌定成額永著爲令

乾隆四十八年

盛京通志
聖製六

世宗諭內閣

雍正九年十一月十五日

據奉天府府尹楊超曾奏稱臣查奉天各屬從前一切公務類皆取給於里下總計一歲之科派多於正額之錢糧如遇奏銷丁地驛站大造編審人丁大計考察官吏等項自臣衙門家人書吏以至治中知府州縣衙門均有漏規銀兩名爲造冊使費歲考科試生童自府丞治中知府州縣衙門俱有漏規銀兩名爲考費至大小官員到任則攤派修理衙署鋪設器用銀兩查點保甲換給門牌印捕等官時攤派紙張飯食銀兩以上諸項各州縣每項約攤派銀數十兩至百餘兩不等上司衙門既取給於州縣復取給於百姓更有衙蠹里書從中指一派十侵收包覽弊竇多端臣訪聞之後即嚴飭各屬勒碑永禁并令嗣後如有上司衙門官吏索取前項陋規務使徹底澄清不許絲毫派累等語從來地方科派陋規甚爲擾累該府尹楊超曾通行查禁辦理甚是恐相沿已久官吏人等尚有陽奉陰違者又恐日久法弛將來接任之員或有仍襲從前之陋習者用是將楊超曾新奏宣示於外令奉天官吏人等永遠遵行以除積弊而惠閭閻

乾隆四十八年盛
京通志聖製六

世宗特恩寬免以前積欠錢糧諭

雍正十三年

各省民欠錢糧十年以上者已於恩詔內概予蠲免其餘未完民欠尚係應徵者朕思
續緒方初惟當繼述我皇考惠養黎元之至意俾服疇力穡之人均沐恩膏積逋全釋
若未蠲之項尙事徵收民間不無煩擾茲特再行降旨於恩詔外將雍正十二年以前
各省錢糧實欠在民者一併寬免從前江南積欠錢糧內曾有官侵吏蝕二項乃從民
欠中分出者比時差往大臣官員辦理原不妥協亦著照民欠例寬免此朕仰體皇考
誠求保赤之仁深願吾民厚生正德之意各省軍民人等身受國恩至渥自應感動天
良屏除陋習明守法奉公之大義循則壤成賦之常經其爲良民免追呼之擾累倘疲
玩性成不知悛改則是吾民中最爲愚頑之人既無畏威之念亦鮮懷德之心國法具
在朕亦不能爲之寬貸也爾等即交部遵行欽此

許州志

高宗諭內閣

乾隆八年十月初一日

高弘 曆

朕恭謁祖陵巡幸盛京所有奉天府屬錢糧及各莊頭糧石俱已豁免尙有盛京等處
旗地未得沾恩著將盛京興京遼陽牛莊蓋平熊岳復州金州岫巖鳳凰城開原錦州
遼遠廣寧義州等十五處旗地應納本年年米荳草束免徵一半其乾隆七年以前積欠

與七年分因災緩徵之項俱着該部查明一併寬免再盛京尙維邦耿化祚名下壯子應交本年丁米及上年緩徵米石亦著一例免其輸納俾旗民一體邀恩普沾惠澤該

部即遵諭行

乾隆四十八年盛京通志編音一

高宗諭內閣

乾隆十一年八月二十六日

朕普免天下錢糧奉天省本年係輪蠲之歲各省定例祇蠲地丁銀兩米豆不在應蠲之例但奉天省地丁錢糧向來銀糧並徵其額徵米豆即係正賦著將奉錦二府乾隆

十一年應徵米豆一體捐免該部即傳諭該府尹知之

乾隆四十八年盛京通志繪音一

高宗特恩蠲免耗羨錢糧諭

乾隆十一年

朕愛育黎元格外加恩將各省錢糧普免一次以為休養萬民之計經大臣等酌議國家每年一定之經費皆取資於正賦應將各省分作三年蠲免則經費有賴而先後之間萬民均沾膏澤至於耗羨乃有司養廉及辦理公務之所必需應令照舊輸納朕已允行今思朕之逾格捐免天下正賦者所以藏富於民且使閭閻之間終歲不聞催科之聲也今正賦既捐而耗羨又令完納是官民仍有交關猶不免追呼之擾不若將捐賦之年應徵耗羨一併緩至開徵年按數完納使小民於交關之日完此些須不必兩次伺候於公庭亦體恤民情之意着該部即遵諭行並將公用不敷之處作何撥抵酌

議辦理各省督撫當董率有司善爲之勿因此又別生弊端也欽此

許州志

高宗諭內閣

乾隆十九年九月十三日

朕奉皇太后鑾輿再詣盛京恭謁祖陵禮成奉天所屬府州縣乾隆十九年地丁正項錢糧已降旨通行捐復所有各莊頭及旗地應納糧石草束等項自應一體加恩以溥愷澤著將盛京戶部各莊頭本年應交倉糧一萬餘石槩行蠲免盛京興京遼陽牛莊蓋平熊岳復州金州岫巖鳳凰城開原錦州寧遠廣寧義州等十五處旗地本年應納米豆草束免征一半其各莊丁應完本年丁米亦著免其輸納俾旗民均沾嘉惠用照

慶典

乾隆四十八年暨京通志繪音一

高宗諭內閣

乾隆三十七年正月初五日

本年輪蠲奉天等省地丁錢糧銀兩其米豆一項例不在應捐之內但念奉天省地丁錢糧向來銀糧並徵其額徵米豆即屬任土正供自當普予加恩俾得共樂盈寧益兆倉箱之慶著將奉錦二府乾隆三十七年應征米豆一體捐免以廣惠澤該部即遵諭

行

盛京通志繪音二

高宗諭內閣

乾隆四十八年八月

盛京爲本朝王迹肇基之地朕謁祖陵道出山海關經過各處城垣多有坍塌殊不足

以壯觀瞻而資捍衛著軍機大臣會同將軍弘晌查明何處最爲緊要應行修築妥議具奏候朕發帑興工並派員稽查督辦

盛京通志
繪音二

高宗諭內閣

乾隆四十三年
八月二十二日

朕自乾隆十九年再莅盛京迄今二十四年矣遼瀋爲我朝鴻業肇基之地風俗敦龐人心淳厚緬惟祖澤留貽食舊德而服先疇者久而彌篤比戶恬熙之象時繫於懷茲由山海關至陪京恭謁祖陵時當秋穫豐登蹕路所經村村殷阜而老幼歡迎扶携恐後尤見忠愛惻忱嘉慰之餘恩施宜渥啓鑾日業經降旨免所過地方錢糧十分之三著再加恩將奉天所屬府州縣乾隆四十四年地丁正項錢糧通行蠲免俾我留都士庶連年不事輸將益厚盈寧之福諭部即遵諭行

乾隆四十八年盛
京通志繪音二

高宗諭內閣

乾隆四十三年
八月二十四日

盛京爲本朝根本重地兵丁皆知恪守舊風嫻騎射以裕武備現亦校閱分別賞賚其讀書之士亦漸摩文化蒸蒸日上盛堪與畿甸比隆朕鑾輅所臨青衿獻詩趨迓絃誦彬彬具見膠庠樂育自宜一體加恩用彰作人盛典著將盛京滿合二號及奉天所屬各學科考廣額一次其向取六名以上者增額三名四五名者增額二名二三名者增額一名該府丞其悉心校錄甄拔殊尤副朕嘉惠士林至意

高宗諭內閣全上

朕恭謁祖陵禮成現降旨將奉天所屬府州縣乾隆四十四年地丁正項錢糧通行蠲免所有各莊頭及旗地應納糧石草束等項自應一體加恩以敷渥澤著將盛京戶部各莊頭本年應交倉糧一萬餘石免其交納所有各處匠役應需口糧著於舊存倉糧內撥給其盛京興京遼陽牛莊蓋平熊岳復州金州岫巖鳳凰城開原錦州寧遠廣寧義州等十五處旗地本年應納米豆草束亦著免徵一半俾旗莊均沾嘉惠該部即遵

諭行

盛京通志
綸音二

高宗諭內閣

乾隆四十三年
八月二十五日

向來變輅時巡每優賜高年粟帛以昭行慶况盛京諸處乃祖宗德澤培貽累洽重熙引恬引養尤徵仁壽之庥茲蹕路經行多有年踰耄耄龐眉皓首扶杖觀迎者宜沛恩膏以彰盛美所有奉天等處旗民男婦及官兵母妻七十以上者各給布一疋米五斗八十以上者絹一疋米一石九十以上者倍之百歲者加賞大緞一疋彭緞一疋用示優老引年至意

高宗諭內閣

乾隆四十三年
十一月十二日

本年輪蠲奉天等省地丁銀兩又因臨幸盛京降旨加恩將奉天所屬乾隆四十四

年地丁正項錢糧通行蠲免其米豆一項例不在應蠲之內但念奉天省地丁向係銀糧並納其額徵米豆即屬任土正供自當普予加恩著將乾隆四十三年四十四年該省應徵米豆一體免徵俾得均霑渥澤該部即遵諭行

高宗諭內閣

乾隆四十八年八月十六日

朕由熱河前往盛京恭謁祖陵所有經過直隸奉天各州縣著蠲免本年地丁錢糧十分之五該部即遵諭行

高宗諭內閣

乾隆四十八年九月初七日

朕自乾隆四十三年臨幸盛京迄今五年我朝根本之地風俗淳厚迥非他省可比緬維祖澤留貽至今勿替茲由熱河取道九關臺四蒞陪京恭謁祖陵蹕路所經老扶幼挈就瞻恐後尤見愛戴惻忱嘉慰之餘恩施宜渥著加恩將奉天所屬府州縣乾隆四十九年地丁正項錢糧通行豁免俾我留都士庶益享盈寧之福該部即遵諭行

高宗恩賞五世同堂諭

乾隆五十六年八月

本年屆朕八旬開袞年穀順成雨暘時若壽辰之前夕微風飄灑次日曦景晶瑩天氣開朗大和翔洽實爲渥荷天庥十一日命皇子皇孫曾孫元孫等山莊校射元孫載錫年方八歲五發三中朕心深爲嘉悅賜以黃褂因憶昔年朕隨侍皇祖三莊閱射朕連

中五矢仰蒙天語褒嘉慈顏大悅蒙賜黃褂其時朕年十有二歲今元孫甫及八齡即能連發命中仰見昊蒼篤祐家法貽庥慶澤延洪克膺備福現在八旬開袞元孫業已長成就傅計朕壽躋九旬又可見六代來孫同堂稱慶敬惟鴻貺駢蕃貽謀攸遠朕於於感荷之餘倍深兢業不敢以景運增隆稍存自足惟有勵精宵旰孜孜不怠益務敬天勤民仰酬恩祐從前因誕育元孫爲史冊稀有盛事曾命督撫等查明各省有五世同堂者據實奏聞特頒恩賚今思朕逮事皇祖皇考復得元孫朕已親見七代篤慶錫光更爲古今罕有著交八旗都統步軍統領順府府尹及各直省督撫詳察臣民中如有實曾親身上見祖父下遇元孫有指証者據實奏聞候朕優加恩賚以昭壽宇同登之盛欽此

許州志

仁宗特恩命查民欠以豁免諭

嘉慶二十二年

仁願 琰

朕自丙辰旦仰蒙皇考高宗純皇帝大廷授璽寅詔丕基兢兢業業旰食宵衣以勤求郵治所願者四海羣黎家給人足同臻康樂敬惟皇考臨御六十年普免天下錢糧四次漕糧三次湛恩汪濊淪浹民心朕嗣位以來亦思廣施闔惠大賚寰區始緣教匪不靖軍興孔棘繼以黃河泛溢屢舉大工十餘年間所費帑金數踰十千萬國家財賦歲有常經實有入不敵出之勢是以嘉慶十四年朕五旬正慶雖恩綸載錫而未能普惠

閩閩比年仰荷昊蒼垂佑稂莠蕩除萬方寧謐河流順軌久慶安瀾以正供所入謹制國用尙可無虞匱乏朕子惠元元深念損上益下之義俟將來府藏充盈仍欲覃敷渥澤明歲嘉慶二十四年爲朕六旬正壽宜先蠲除積逋俾小民戶免追呼共享含哺之樂所有各省節年正耗民欠及因災緩征帶征銀穀着各督撫詳晰查明按照該省所屬之某州某縣實欠在民銀穀若干速行開單具奏以次降旨豁免並着先將此旨臚黃宣示城鄉村鎮咸使聞知俾官吏胥役無從影射侵欺以期膏澤下民用副朕惠鮮懷保仁壽斯民至意該部即遵諭行欽此

宣宗特恩蠲免錢糧諭

道光十五年八月初八日

宣
宗
旻
寧

朕寅承丕緒撫馭萬方旰食宵衣無日不以勤恤民依爲念十五年中劭農重穀減賦停徵迭沛恩綸覃敷閩澤所願四海烝黎家給人足共享昇平之福因思各省民欠錢糧自嘉慶年間蠲免以後迄今又閱十餘年矣比歲以來仰蒙慈佑慶協綏豐民氣和樂本年恭逢聖母太后六旬萬壽欽維慈禧光被歡洽敷天允宜申錫無疆普蠲逋賦所有各省節年正耗民欠錢糧及因災緩徵帶徵銀穀並借給籽種口糧牛具及漕項芦課學租雜稅等項即着各該督撫將軍府尹等將道光十年以前實欠在民者詳晰查明按照各省所屬之某州某縣銀穀若干速行開單具奏候朕以次降旨全行豁免

免並著先將此旨膽黃宣示城鄉村鎮咸使聞知俾官吏胥役無從影射侵欺以期膏澤下民用副朕錫羨延釐普惠寰區至意該部即遵諭行欽此

右諭 共四十七篇

訓

清

世祖訓飭士子臥碑文

順治九年

世祖福臨

朝廷建立學校選取生員免其丁糧厚以廩膳設學院學道教官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列於後

一生員之家父母賢智者子當受教父母愚魯或有非爲者子既讀書明理當再三懇告使父母不陷於危亡

一生員立志當學爲忠臣清官書史所載忠清事蹟務須互相講究凡利國慶民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲必取禍患行害人之事者往往自殺其身常宜思省

一 生員不可干求官長交結勢要希圖進身若果心善德全上天知之必加以福

一 生員當愛心忍性凡有司官衙門不可輕入即有切己之事止許家人代告不許干預他人詞訟他人亦不許牽連生員作証

一 爲學當尊敬先生若講說皆須誠心聽受如有未明從容再問勿妄行辨難爲師長者亦當盡心教訓勿致怠惰

一 軍民一切利病不許生員上書陳言如有一言建白以違制論黜革治罪

一 生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

世宗上諭訓飭士子碑

國家建立學校原以興行教化作育人材典至渥也朕臨御以來隆重師儒加意庠序近復慎簡學使釐剔弊端務期風教修明賢才蔚起庶幾棧樸作人之意乃比年士習未端儒效罕著雖因內外臣工奉行未能盡善亦田爾諸生積錮已久粹難改易之故也茲特親製訓言再加警飭爾諸生其敬聽之從來學者先立品行次及文學學術事功源委有叙爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化驕盈之氣

文章歸於醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心不淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社邀盟乃如之人名教不容鄉黨不齒縱幸脫褫朴濫竊章縫反之於衷竊無愧乎况夫鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓頒茲訓言爾等務共體朕心恪遵名訓一切痛加改省爭自濯磨積行勤學以圖上進國家三年登造未帛弓旌不特爾身有榮即爾祖父亦增光寵矣逢時得志寧俟他求哉若仍視爲具文玩愒勿做毀方躍冶暴棄自甘則是爾等冥頑無知終不能率教也既負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宣傳集諸生多方董勸以副朕懷否則職業勿修咎亦難追勿謂朕言之不預也爾多士尙敬聽之

右訓共二篇

令

晉

令記室封裕

大將軍
燕王慕容皝

覽封記室之諫孤實懼焉君以黎元爲國黎元以穀爲命然則農者國之本也而二千石令長不遵孟春之令惰農弗勸宜以尤不修闢者措之刑法肅厲屬城主者明詳推檢具狀以聞苑囿悉可罷之以給百姓無田業者貧者全無資產不能自存各賜牧牛一頭若私有餘力樂取官牛墾官田者其依魏晉舊法溝洫溉灌有益官私主者量造務盡水陸之勢中州未平兵難不息勳誠既多官僚不可以減也待剋平凶醜徐更議之百工商賈數四佐與列將速定大員餘者還農學生不任訓教者亦除員錄夫人臣關言於人主至難也妖妄不經之事皆應蕩然不問擇其善者而從之王憲劉明雖其罪應禁黜亦猶孤之無大量也可悉復本官仍居諫司封生蹇蹇深得王臣之體詩不云乎無言不酬其賜錢五萬明宣內外有欲陳孤過者不拘貴賤勿有所諱

晉書一百九
載記第九

民國

大總統策令蒙藏院僉事李芳春

民國十四年
八月十四日

徐世昌

蓋聞下階上星太微聯於郎位分土辨等元士視於附庸是知表幹之身必重賢良之

選蒙藏院僉事李芳春守學彌篤當官無闕才既勝於吏事職當列於清班茲策命爲
上士合二十七慎以圖治陽教宜修食三十六人而倍加素餐自慄庶幾夙夜母廢司
存

右令共二篇

褒揚

民國

大總統題褒義縣蘇慶榮

民國八年九月

徐世昌

褒曰孝友傳家本儒生之常事慷慨好施乃任俠之遺風兼而有之難乎選已爾義縣
蘇慶榮內行純篤善量宏深吹笙譜束皙之詩白華潔養讓產話田家之樂紫荊敷榮
通乎神明皆關至性似此倫敦紀飭類孔奮之行冠州閭况復物與民胞如張子之存
心利濟具斯行誼宜予褒揚於戲敦百行者先乎孝擗題爭日月之光活千人者後必
封陰德隆子孫之報畀以嘉獎尙其敬承

右褒揚共一篇

告示

清

曉諭糧行

清光緒三十年
四月十六日

欽命晉義州處軍功
賞戴花翎城守尉 恆 裕

欽加三品銜賞戴花翎補用知府瑞 安
候補分府兼理事府署義州正堂

爲出示曉諭事照得案據糧行西李菸舖等共五十九家呈稱義州舊有糧市買賣糧石均行日出赴市公平交易不意於舊年間糧食缺少人情向上迺有貪鄙之徒舍集市而弗就入糧店而巧買一家破格衆戶效尤遂使糧石不分成色價值罔論高底由此百弊叢生糧店因之漁利農民雖有好糧難聲高價商民雖出原價難買好糧愈沿愈壞致使農人將好糧投運別城出售我城所來者盡係陳朽不堪之物甚至攪糠使水此欺彼詐農商均受其害糧店亦無可巧取况入店爭買稍有不遂屢動口角覩此情弊皆生畏心所以公同商議胥願力除積弊重整行規尤恐有涉偏私因又邀正直紳董秉公評論今所擬各款載明帳簿隨稟呈閱尤恐日久生懈復蹈前疢是以公同聯名具稟叩懇恩准立案曉諭俾使一律遵行等情據此查本城買賣糧石近因商民互相取巧以致流弊叢生今該商等據情援引舊制重整行規立市報行公平交易洵屬興利除弊即查閱條規亦尙周妥不特有裨商民抑且興旺市廛應即照准立案永遠辦理除將規章抄錄附卷備查原簿發還外合亟會同出示曉諭爲此示仰闔屬商民人等一體知悉自示之後爾等買賣糧石均應查照此次立定章程赴市公平交易

毋得仍蹈前轍私相巧買致干罰咎各宜凜遵切切特示

民國

勸民購買內國公債示

宿文奎

爲剴切勸募事照得民國肇興舉凡內政外交練兵籌餉諸大端需款浩繁向以借債爲飲鳩止渴之計方今歐戰旋渦國庫空虛萬厦千間非一木所能支千金狐裘非一腋所能集當此司空棘手徒仰屋而興嗟所願黎庶熱心急輸財而助國查內國公債章程洵美且良還本期定以四載發息定爲六厘人民享優勝之權利政府負完全之責任况天下之大匹夫有責古人著有名言毀家紓難實爲國民義務破產救時亦見同胞熱腸與其借外債以濟急需則利權失于外溢何如借內債以備國用則利益仍歸諸吾民爲此示仰閭邑諸色人等均抱急公之念國事一如家事各宏愛國之心債權即是利權自示之後迅速購買債票多多益善幸勿徘徊瞻顧轉滋疑慮有厚望焉特此佈告

佈告禁烟各種證費

中華民國十七年二月一日

義縣禁烟局局長

高永清

爲佈告事案奉奉天全省禁烟局禁字第三拾九號訓令內開案查本局應徵之各種証費因奉票價格低落於收入上損失甚鉅當於上年十二月間呈請省長將應徵之

証費改爲現大洋本位在案乃迄今核准碍難實行惟因近日奉票毛荒一日千里本總辦職責所在難安緘默若不急籌補救辦法損失有不堪設想者也茲由本年二月一日起將原定每兩藥料應貼銷燬證奉大洋兩元再加增一倍每兩須貼四元又戒烟證原定每張奉大洋二十元再加增一倍每張奉大洋四十元又許可證原定甲乙兩種計甲種奉大洋六百元再加增四百元爲一千元乙種奉大洋四百元再加增四百元總有八百元作爲臨時救濟辦法一俟前呈核准再行令遵除逕呈省署備案並分行外合亟令仰該局長屆時一律遵照實行此令等因奉此本局遵於本年二月一日實行增收除分行外合行佈告闔邑商民人等一體知悉仰即遵照增加之數來局購領各證切切此佈

右告示

共三稿

表

晉

勸進元帝表

晉元帝建武元年

慕容廆

臣聞天生蒸民樹之以君所以對越天地司牧黎元聖帝明王監其若此知天地不可
以乏饗故屈其身以奉之知烝黎不可以無主故不得已而臨之社稷時難則戚藩定

其傾郊廟或替則宗哲纂其祀是以宏振遐風式固萬世三五以降靡不由之伏惟高祖宣皇帝肇基景命世祖武皇帝遂造區夏三葉重光四聖繼軌惠澤侔於有虞卜世過於周氏自元康以來艱難繁興永嘉之際氛厲彌昏宸極失御登遐醜裔國家之危有若綴旒賴先后之德宗廟之靈皇帝嗣建舊物克甄誕授欽明服膺聰哲玉質幼彰金聲夙振冢宰攝其綱百辟輔其政四海想中興之美羣生懷來蘇之望不圖天不悔禍大災薦臻國未忘難冠害尋興逆賊劉耀縱逸西都敢肆犬羊陵虐天邑臣奉表使還乃承西朝以去年十一月不守主上幽劫復沈敵庭神器流離再辱荒逆臣每覽史籍觀之前載厄運之極古今未有苟在食土之毛含血之類莫不叩心絕氣行號巷哭況臣等荷寵三世位厠鼎司聞問震惶精爽飛越且驚且惋五情無主舉哀朔垂上下泣血臣聞昏明迭用否泰相濟天命無改歷數有歸或多難以固邦國或因憂以啓聖明是以齊有無知之禍而小白爲五霸之長晉有驪姬之難而重耳以主諸侯之盟社稷靡安必將有以扶其危黔首幾絕必將有以繼其緒伏惟陛下元德通於神明聖姿合於兩儀應命世之期紹千載之運符瑞之表天人有徵中興之兆圖讖垂典自京畿隕喪九服崩離天下囂然無所歸懷雖有夏之遘夷羿宗姬之離犬戎蔑以過之陛下撫徵江左奄有舊吳柔服以德伐叛以刑抗明威以攝不類仗大順以號宇內純化既

敷則率土宅心義風既暢則遐方企踵百揆時叙於上四門穆穆於下昔少康之隆夏
訓以爲美談宣王中興周詩以爲休詠况茂勳格於皇天清暉光於四海蒼生頤然
莫不欣載聲教所加願爲臣妾者哉且宣皇之允惟有陛下億兆攸歸曾無與二天祚
大晋必將有主主晋祀者非陛下而誰是以邇無異言遠無異望謳歌者無不吟誦徽
猷獄訟者無不思於聖德天地之際既交華夷之情允洽一角之獸連理之木以爲休
徵者蓋有百數冠帶之倫要荒之象不謀同辭者動以萬計是臣等考天地之心因函
夏之趣味死上尊號願陛下存舜禹至公之情狹由巢抗矯之節以社稷爲務不以小
行爲先以黔首爲憂不以克讓爲事上慰宗廟乃顧之懷下釋普天傾首之勤則所謂
生繁華於枯莖育豐肌於析骨神人獲安無不幸甚臣聞尊位不可久虛萬幾不可久
曠虛之一日則尊位以殆曠之浹辰則萬幾以亂方今踵百王之季當陽九之會狡寇
窺窬伺國瑕隙黎元波蕩無所繫心安可棄而不恤哉陛下雖欲逡巡其若宗廟何其
若百姓何昔者惠公虜秦晋國震駭呂卻之謀欲立子圉外以絕敵人之志內以固闔
境之情故曰喪君有君羣臣輯睦好我者勸惡我者懼前事之不忘後代之元龜也陛
下明並日月無幽不燭深謀遠猷出自胸懷不勝犬馬憂國之情遲賄人神開泰之路
是以陳其乃誠布之執事臣等忝於方任久在遐外不得陪列闕庭與賭盛禮踴躍之

上晉帝表

散騎常侍慕容皝

臣究觀前代之主若能親賢並建則政致昇平若親黨后族必有傾辱之禍是以周之申伯號稱賢舅以其身藩於外不握朝權降及秦昭足爲令主委信二舅幾至亂國逮於漢武推重田蚡萬幾之要無不決之及蚡死後切齒追恨成帝闇弱不能自立內惑艷妻外恣五舅卒令王莽坐取帝位每覽斯事孰不痛惋設使舅氏賢若穰侯王鳳則但聞有二臣不聞有二主若其不才則有竇憲梁冀之禍凡此成敗亦既然矣苟能易軌可無覆墜陛下命世天挺當隆晉道而遭國多難殷憂備嬰追述往事至今焚灼迹其所由實因故司空亮居元舅之尊勢業之重執政裁下輕侮邊將故令蘇峻祖約不勝其忿遂至敗國至令太后發憤一旦升遐若社稷不靈人神無助豺狼之心當何（一作可）極邪前事不忘後事之表而中書監左將軍水等內執樞機外擁上將昆弟並列人臣莫儔陛下深敦謂陽水等自官引領臣嘗謂世主若欲崇顯舅氏何不封以藩國豐其祿賜限其勢力使上無偏優下無私論如此榮辱何從而生噂嗜何辭而起往者惟亮一人宿有名望尙致世變况今居之者素無聞焉且人情易惑難以戶告縱令陛下無私於彼天下之人誰謂不私乎臣與水等名位殊班出處懸邈又國之戚昵

理應降悅以適事會臣獨矯抗此言者上爲陛下退爲水計疾苟容之臣坐鑒得失顛而不扶焉用彼相昔徐福陳霍氏之戒宣帝不從至今忠臣更爲逆族良由察之不審防之無漸臣今所陳可謂防漸矣但恐陛下不明臣之忠不用臣之計事過之日更處焦爛之後耳昔王章劉向每上封事未嘗不指斥王氏故令二子或死或刑谷永張禹依回一作違不對故容身苟免取譏於世臣被髮殊俗位爲上將夙夜惟憂罔知所報惟當外殄寇讐內盡忠規陳力輸誠以答國恩臣若不言誰當言者乾隆盛京志卷一百一十一歷朝藝文三

上西秦苻堅表

後燕國王慕容垂

臣才非古人致禍起蕭牆身嬰時難歸命聖朝陛下恩深周漢猥叨微顧之遇位爲列將爵忝通侯誓在戮力輸誠常懼不及去夏桓冲送死一擬雲消迴討郟城俘馘萬計斯誠陛下神算之奇頗亦愚臣忘死之效方將飲馬桂洲懸旌闔會不圖天助亂德大駕班師陛下單馬奔臣臣奉衛匪貳豈陛下聖明鑒臣單心皇天后土實以知之臣舉詔北巡受制長樂然不外失衆心內多猜忌令臣野次外庭不聽謁廟丁零逆豎寇逼豫州不迫臣單赴限以師程惟給弊卒二千盡無兵杖復令飛龍潛爲刺客及至洛陽平原公暉復不信納臣竊惟進無淮陰功高之慮退無李廣失利之愆懼有青蠅交亂白黑丁零夷夏以臣忠而見疑乃推臣爲盟主臣受託善始不遂令終泣望西京揮

涕即邁軍次石門所在雲赴雖復周武之會於孟津漢祖之集于垓下不期之衆實有甚焉欲令長樂公盡衆赴難以禮發遣而不固守匹夫之志不達變通之理臣息農収集故營以備不虞而石越傾鄴城之衆輕相掩襲兵陣未交越已隕首臣既單車懸軫歸者如雲斯實天符非臣之力且鄴者臣國舊都應即惠及然後西面受制永守東藩上成陛下遇臣之意下全愚臣感報之誠今進師圍鄴并喻不以天時人事而不察機運杜門自守時出挑戰鋒戈屢交恒恐飛矢誤中以傷陛下天性之念臣之此誠未簡神聽輒遏兵止銳不敢窮攻夫運有推移去來常事惟陛下察之

晉書百二十三
載記第二十三

魏

上表理慕容白曜

著作
佐郎成澄

臣聞經疆啟宇實良將之功褒德酬庸乃聖王之務昔姜公杖鉞開隆周之基韓生秉旄興鴻漢之業故能賞超當時名垂前史若闔外功成而流言內作人主猜疑良將懷懼樂毅所以背燕章邯所以奔楚至如鄧艾懷忠矯命寧國赤心皎然幽顯同見而橫受屠戮良可悲哀及士冶伐吳奮不顧命萬里浮江應機直指使孫皓君臣輿觀入洛大功亦舉讒書驟至內外唱和貝錦將成微晉武之鑒亦幾於顛沛矣每覽其事常爲痛心聖主明王固宜深察臣伏見故征南大將軍開府儀同三司青州刺史濟南王慕

容白曜祖父相資世曾東裔值皇運廓被委節臣妾白曜生長王國飲服道教爵列上階位登帝伯去天安初江陰夷楚敢拒工命三方阻兵連城岳峙海岱蒼生翹首拯援聖朝乃眷南顧思救荒黎大議廟堂顯舉元將百寮同音僉曰惟允遂推轂委誠授以專征之任握兵十萬杖鉞一方威陵河濟則淮徐震懼師出無鹽而申纂授首濟北太原同時消潰麤溝垣苗相尋奔走及回麾東掃道固銜璧盤陽梁鄒肉袒請命于時東陽未平人懷去就沈文靜高崇仁擁衆不朝扇擾邊服崔僧祐蓋次陽陳顯達連兵淮海水陸鋒起揚旌而至規援青齊士民恟恟莫不南顧時兵役既久咸有歸心而白曜外宣皇風內盡方略身擐甲冑與士卒同安撫初附示以恩厚三軍懷挾纊之溫新民欣來蘇之澤遂使僧祐擁徒弭旆効順軍門文靜崇仁棄城竄海次陽顯達望塵南奔聲震江吳風偃荆漢及青州尅平文秀面縛海波清靜三齊尅定逃彼東南永爲國有使天府納六州之貢濟泗息烽警之虞開岱宗封禪之略闢山川望秩之序斯誠宗廟之靈神算所授然抑亦白曜與有力矣及氛翳旣盡爵命亦隆榮燭當時聲譽日遠而民惡其上妄生尤隙因其功高流言惑聽巧僞亂真朱紫難辨傷夷未瘳合門屠戮鴻勳盛德蔑爾無聞有識之徒能不悽愴臣謂白曜策名王庭累荷榮授歷司出內世載忠美秉鉞啓蕃折衝敵國開疆千里拔城十二辛勤於戎旅之際契關於矢石之間登

鋒履危志存靜亂及方難既夷身應高賞受胙河山與國升降六十之年寵靈已極觀其立功足明機運豈容僥倖更邀非望者乎且於時國家士馬屯積京南跨州連鎮勢侔雲岳主將驍雄按鉞在所莫不殉忠死難效節奉時此之不可生心白曜足知之矣况潛逆阻兵營岱厭亂加以王師仍舉州郡屠裂齊民勞止神膽俱喪亡燼之衆不可與圖存離敗之民不可以語勇哉白曜果毅習戎體閑兵勢寧不知士民之不可籍將士之不同已據彊兵之勢因塗炭之民而欲立非常之事此愚夫之所弗爲也料此推之事可知矣伏惟陛下聖鑒自天仁孝宰世風冠宇宙道超百王開國以來諸有罪犯極刑不得骸骨者悉聽收葬大造之恩振古未有而白曜人舊功高嬰禍淪覆名滅國除爵命無紹天下衆庶咸共哀憐方之餘流應有差異願陛下揚日月之光明勳臣之績垂天地之施慰僵屍之魂使合棺定諡歿有餘稱選其宗近才堪驅策錫以微爵繼其絕世進可以獎勸將來退可以顯國恩澤使存者荷莫大之恩死者受骨肉之惠豈不美哉仰惟聖明霈然昭覽狂瞽之言伏待刑憲

魏書卷五十一
傳第三十八

上魏世祖表

吐谷
暉王慕容瑣

臣誠庸弱敢竭情欵浮禽僭逆獻捷王府爵秩雖崇而土不增廓車旗旣飾而財不周賞願垂鑒察亮其單款臣頃接寇逆疆境之人爲賊所抄流轉東下今皇化混一求還

鄉土乞拂曰連窟略寒張華等二人家弱在此分乖可愍願并勅遣使恩洽遐荒存亡

感戴

魏書卷一百一
列傳第八十九

上表陳時務

冠軍將軍
齊州刺史韓麒麟

古先哲王經國立治積儲九稔謂之太平故躬籍千畝以勵百姓用能衣食滋茂禮教興行逮於中代亦崇斯業入粟者與斬敵同爵力田者與孝悌均賞實百王之常軌爲治之所先今京師民庶不田者多遊食之口三分居二蓋一夫不耕或受其飢况於今者動以萬計故頃年山東遭水而民有餒終今秋京都遇旱穀價踊貴實由農人不勸素無儲積故也伏惟陛下天縱欽明道高三五味且憂勤思恤民弊雖帝虞一日萬幾周文旻不暇食蔑以爲喻上垂覆載之澤下有凍餒之人皆由有司不爲明制長吏不恤其本自承平日久豐穰積年競相矜夸遂成侈俗車服第宅奢僭無限喪葬婚娶爲費實多貴富之家童妾核服工商之族玉食錦衣農夫舖糟糠蠶婦乏短褐故令耕者日少田有荒蕪穀帛罄於府庫寶貨盈於市里衣食匱於室麗服溢於路飢寒之本寔在於斯愚謂九珍玩之物皆宜禁斷吉凶之禮備爲格式令貴賤有別民歸朴素制天下男女計口受田宰司四時巡行臺使歲一按檢勤相勸課嚴加賞罰數年之中必有盈贍雖遇災凶免於流亡矣往年校比戶貫租賦輕少臣所統齊州租粟纔可給俸略

無入倉雖於民爲利而不可長久脫有戎役或遭天災恐供給之方無所取濟可滅絹布增益穀租年豐多積歲儉出賑所謂私民之穀寄積於官官有宿積則民無荒年矣

魏書卷六十列傳第四十八

右表 共六篇

諫言

晉

上燕王言

晉穆帝永和五年

慕容同祖別爲氏 慕容輿根

用兵之道敵強則用智敵弱則用勢今中國之民困於石氏之亂咸思易主以救湯火之急此千載一時不可失也自武宣王以來招賢養民務農訓兵正俟今日若復顧慮豈天意未欲使海內平定邪將大王不欲取天下也

燕王名備

諫燕王

吳王慕容霸

趙爲暴虐王興師伐之將以拯民於塗炭而撫有中州也今始得薊而坑其士卒恐不可以爲王師之先聲

燕王名備

對晉帝言

晉成帝咸康七年

燕王號長史 劉翔

臣受遣之日朝服拜章自劉石構亂長江以北前爲戎藪未聞中華公卿之胄有能推

破凶逆者也獨慕容鎮軍心存本朝屢殄彊敵使石虎畏懼蹙國千里功烈如此而惜
海北之地不以爲封邑何哉吾非苟尊所事竊惜聖朝疎忠義之國使四海無所勸慕
耳

上燕國王言

給事黃
門侍郎申胤

夫名尊禮重先王之制冠冕之式代或不同漢以蕭曹之功有殊羣辟故劔履上殿入
朝不趨世無其功則禮宜闕也至於東宮體此爲儀魏晉因循制不納寫今皇儲過謙
準同百僚禮卑逼下有違朝式太子有統天之重而與諸王齊遠冠游非所以辨章貴
賤也祭饗朝慶宜正服兗衣九文冠冕九旒又仲冬長至太陰數終黃鍾產氣綿微於
下此月閉關息旅后不省方禮記曰是月也事欲靜君子齋戒去聲色唯周官有天子
之南效從八能之說或以有事至靈非朝饗之節故有樂作之理王者慎微禮從其重
前來二至闕鼓不宜有設今之鏗鏘蓋以常儀二至之禮事殊餘節猥動金聲驚越神
氣施之宣養實爲未盡又朝服雖是古禮絳構始於秦漢迄于今代遂相仍準朔望正
旦乃具兗寫禮諸侯族見天子不得終事者三兩沾服失容其在一焉今或朝日天雨
未有定儀禮貴適時不在過恭近以地濕不得納寫而以兗襪改履案言稱朝服所以
服之而朝一體之間上下二制或廢或存實乖禮意大燕受命倅蹤虞夏諸所施行宜

損益定之以爲皇代永制

晉書百十載記第十

上燕國王言

廷尉監常煒

大燕雖革命創制至於朝廷銓謨亦多因循魏晉唯祖父不殮葬者獨不官身清朝斯誠王教之首不刊之式然禮貴適時世或損益是以高祖制三章之法而秦人安之自頃中州喪亂連兵積年或遇傾城之敗覆軍之禍坑師沉卒往往而然孤孫煢子十室而九兼三方岳峙父子異邦存亡吉凶杳成天外或便假一時或依羸博之制孝子糜身無補順孫心喪靡及雖招魂虛葬以叙罔極之情又禮無招葬之文令不此載若斯之流抱琳瑯而無申懷英才而不齒誠可痛也恐非明揚側陋務盡時珍之道吳起二陳之疇終將無所展其才幹漢祖何由免於平城之圍鄧支之首何以懸於漢關謹案戊辰詔書蕩清瑕穢與天下更始以明惟新之慶五六年間尋相違伐於則天之禮臣竊未安

晉書百十載記第十

北朝魏

上高祖言

韓顯宗

進賢求才百王之所先也前代取士必先正名故有賢良方正之稱今之州郡貢察徒有秀孝之名而無秀孝之實而朝廷但檢其門望不復彈坐如此則可令別貢門望以

叙士人何假冒秀孝之名也夫門望者是其父祖之遺烈亦何益於皇家益於時者賢才而已苟有其才雖屠釣奴虜之賤聖皇不恥以爲臣苟非其才雖三后之胤自墜於皂隸矣是以大才受大官小才受小官各得其所以致雍熙議者或云今世等無奇才不若取士於門此亦失矣豈可以世無周邵便廢宰相而不置哉但當校其有寸長銖重者即先叙之則賢才無遺矣又曰夫帝皇所以居尊以御下者威也兆庶所以徙惡以從善者法也是以有國有家必以刑法爲治生民之命於是而在有罪必罰罰必當辜則雖箠撻之刑而人莫敢犯也有制不行人得僥倖則雖參夷之誅不足以肅自太和以來多坐盜棄市而遠近肅清由此言之止姦在於防檢不在麗刑也今州郡牧守邀當時之名行一切之法臺閣百官亦咸以深酷爲無私以仁恕爲容盜迭相敦厲遂成風俗陛下居九重之內視人如赤子百司分萬務之要遇下如仇讎是則堯舜止一人而桀紂以千百和氣不至蓋由於此書曰與其殺不辜寧失不經實宜敕示百寮以

惠元元之命

魏書卷六十八
傳第四十八

上高祖言

韓顯宗

昔周王爲犬戎所逐東遷河洛鎬京猶稱宗周以存本也光武雖曰中興實自創革西京尙置京尹亦不廢舊今陛下光隆先業遷宅中土稽古復禮於斯爲盛豈若周漢出

於不得已哉按春秋之義有宗廟曰都無則謂之邑此不刊之典也況北代宗廟在焉山陵託焉王業所基聖躬所載其爲神鄉福地實亦遠矣今便同之郡國臣竊不安愚

謂代京宜建畿置尹一如故事崇本重舊以光萬葉

魏書卷六十一列傳第四十八

上高祖言

韓顯宗

伏見洛京之制居民以官位相從不依族類然官位非常有朝榮而夕悴則衣冠淪於厮豎之邑臧獲騰於膏腴之里物之顛倒或至於斯古之聖王必令四民異居者欲其業定而志專業定則不僞志專則不淫故耳目所習不督而就父兄之教不肅而成仰惟太祖道武皇帝創基撥亂日不暇給然猶分別士庶不令雜居伎作屠沽各有攸處但不設科禁賣買任情販貴易賤錯居混雜假令一處彈箏吹笛緩舞長歌一處嚴師苦訓誦詩講禮宜令童齒任意所從其走起舞堂者萬數往就學館者無一此則伎作不可雜居士人不宜異處之明驗也故孔父云里仁之美孟母弘三徙之訓賢聖明誨若此之重今令伎作家習士人風禮則百年難成令士人兒童效伎作容態則一朝可得是以士人同處則禮教易興伎作雜居則風俗難改朝廷每選舉人士則校其二婚一宦以爲升降何其密也至與開伎作宦途得其膏梁華望接閤連甃何其略也此愚臣之所惑今稽古建極光宅中區凡所徙居皆是公地分別伎作在於一言有何爲疑而

闕盛美 魏書卷六十列傳第四十八

上高祖言

韓顯宗

自南偽相承竊有淮北欲擅中華之稱且以招誘邊民故僑置中州郡縣自皇風南被仍而不改凡有重名其數甚衆疑惑書記錯亂區宇非所以疆域物土必也正名之謂也愚以為可依地理舊名一皆釐革小者并合大者分置及中州郡縣昔以戶少併省今人口既多亦不可復舊君人者以天下為家不得有所私也故倉庫儲貯以俟水旱之災供軍國之用至於有功德者然後加賜爰及末代乃寵之所隆賜賚無限自比以來亦為太過在朝諸貴受祿不輕土木被錦綺僮妾厭梁肉而復厚賚屢加動以千計若分賜鰥寡瞻濟實多如不悛革豈周急不繼富之謂也愚謂事有可賞則明旨褒揚稱事加賜以勸為善不可以親近之昵猥損天府之儲 魏書卷六十列傳第四十八

上高祖言

韓顯宗

諸宿衛內直者宜令武官習弓矢文官諷書傳而今給其蒲博之具以成褻狎之容長矜爭之心恣誼囂之慢徒損朝儀無益事實如此之類一宜禁止 魏書卷六十列傳第四十八

上書魏主陳四事 太和八年

中書侍郎 韓顯宗

竊聞輿駕今歲不巡三齊當幸中山蠶麥方急何以堪命願早還北京以省諸州供張

之苦洛陽宮殿故基皆魏明帝所造前世已譏其奢宜加裁損北都富室競以第舍相
尚宜加遷徙爲之制度端廣衢路通利溝渠陛下還洛陽輕將從騎王者於闐闐之內
猶施警蹕况涉履山河而不加三思乎以爲陛下日對百辟心虞萬幾景昃而食夜分
而寢加以孝思之至隨時而深文章之業日成篇卷雖叡明所用未足爲煩又非所以
膏神養性保無疆之祚也伏願陛下垂拱司契而天下治矣

上魏主言

太和十
八年

中書
侍郎韓顯宗

以爲州郡貢察徒有秀孝之名而無其實朝廷但簡其門望不復彈坐如此則可令別
貢門望何假冒秀孝之名哉夫門望者乃其父祖之遺烈何益於時益於時者賢才而
已苟有其才雖屠釣奴虜聖主不恥以爲臣苟非其才雖三后之胤墜於阜隸矣議者
或云世無奇才不若取以門望此亦失矣豈可以世無周召遂廢宰相乎但當較其寸
長銖重者先叙之則賢才無遺矣又刑罰之要在於明當不在於重輕內外之官欲邀
當時之名爭以深酷爲無私迭相敦厲遂成風俗陛下居九重之內視人如赤子百司
分萬務之任遇下如仇讎是則堯舜止一人而桀紂以千百和氣不至蓋由於此又昔
周居洛邑猶存宗周漢遷東都京兆置尹春秋之義邑有宗廟曰都况代京陵廟所託
王業所基而可同之郡國乎謂宜建畿置尹一如故事古者四民異居欲其業專志定

也太祖創基日不暇給然猶分別士庶不令雜居工伎屠沽各有攸處但不設科禁久而混淆今聞洛邑居民之制專以官位相從不分族類夫官位無常朝榮夕悴則是衣冠阜隸不日同處矣借使一里之內或習歌舞或講詩書縱羣兒隨其所之則必不棄歌舞而從詩書矣故使工伎之家習士人儀禮百年難成士人之子效工伎容態一朝而就此乃風俗之原不可不察况今遷徙之初皆是公地分別工伎在於一言有何可疑而闕盛美又南人昔有淮北僑置郡縣仍而不改名實難辨宜皆釐革小者并合大者分置君人者以天下爲家不可有所私比來頒賚動以千計若分以賜鰥寡孤獨所濟實多今直以與親近之臣殆非周急不繼富之謂也

右諫言

共十
二篇

疏

晉

上燕國王疏

前燕
魏尹慕容德

先帝應天順時受命革代方以文德懷遠以一六合神功未就奄忽升遐昔周文既沒武王嗣興伏惟陛下則天比德揆聖齊功方闡崇乾基纂成先志逆氏僭據關隴號同王者惡積禍盈自相疑戮釁起蕭牆勢分四國投誠請援旬日相尋豈非凶運將終數

歸有道兼弱攻昧取亂侮亡機之上也今秦土四分可謂弱矣時來運集贊我也天與不取反受其殃吳越之鑿我之師也宜應天人之會建牧野之旗命皇甫真引并翼之衆徑趣蒲坂臣垂引許洛之兵馳解諛圍太傅總京都武旅爲二軍後繼飛檄三輔仁聲先路獲城即侯叙功必賞此則鬱槩待時之雄抱志未申之傑必嶽峙灞上雲屯隴下天羅既張內外勢合區區僭豎不走則降大同之舉今其時也願陛下獨斷聖慮無

訪仁人

晉書百十一
載記第十一

上燕國王疏

前燕尙
書左丞

申紹

臣聞漢宣有言與朕共治天下者其唯良二千石乎是以特重此選必妙盡英才莫不拔自貢士歷資內外用能仁感猛獸惠致羣祥今者守宰或擢自匹夫兵將之間或因寵戚藉緣時會非但無聞於州閭亦不經于朝廷又無考績黜陟幽明貪惰爲惡無刑戮之懼清勤奉法無爵賞之勸百姓窮弊侵昧無已兵士逋逃乃相招爲賊盜風頽化替莫相糾攝且吏多則政煩由來常患今之見戶不過漢之一大郡而備置百官加之新立軍號兼重有過往時虛假名位廢棄農業公私驅擾人無聊生宜并官省職務勤農桑秦吳二虜僻僭一時尚能任道捐情肅諸僞部況大燕累聖重光君臨四海而可美政或虧取陵外寇哉鄰之有善衆之所望我之不修彼之願也秦吳狡猾地居形勝

非唯守境而已乃有吞噬之心中州豐實戶兼二寇弓馬之勁秦晉所憚雲騎風馳國之常也而比越敵後機兵不速濟者何也皆由賦法靡恒役之非道郡縣守宰每於差調之際無不舍越殷疆首先貧弱行留俱窘資善無所人懷嗟怨遂致奔亡進闕供國之饒退離蠶農之要兵豈在多貴於用命宜嚴制軍科務先饒復習兵教戰使偏伍有常從戍之外足營私業父兄有陟岵之觀子弟懷孔爾之顧雖赴水火何所不從節儉約費先王格謨去華敦朴哲后恒憲故周公戒成王以嗇財爲本漢文以皂幃變俗孝景宮人費過千餘魏武寵賜不盈十萬薄葬不墳儉以率下所以割肌膚之惠全百姓之力謹案後宮四千有餘僮侍廝養通兼十倍日費之重價盈萬金綺縠羅紉歲增常調戎器費營奢玩是務今藏虛竭軍士無襜褕之資宰相侯王迭以侈麗相尙風靡之化積習成俗臥薪之諭未足甚焉宜罷浮華非要之役峻明婚姻喪葬之條禁絕奢靡浮煩之事出傾宮之女均商農之賦公卿以下以四海爲家信賞必罰綱維肅舉者溫猛之首可懸之白旗秦吳二主可以禮之歸命豈唯不復侵寇而已哉陛下若不遠追漢宗弋綈之模近崇先帝補衣之美臣恐頽風弊俗亦革變靡途中興之歌無以軫之絃詠又拓宇兼並不在一城之地控制戎夷者懷之以德今魯陽上郡重山之外雲陰之北四百有餘而未可以羈服塞表爲平寇之基徒孤危託落令善附內駭宜攝就並

豫以臨二河通接漕穀擬之丘後重晉陽之戍增南藩之兵戰守之備銜以千金之餌蓄力待時可一舉而滅如其虔劉送死俟之境而斷之可令匹馬不反非唯絕二賊闕閹乃是戡殄之要惟陛下覽焉

晉書百十一
載記第十一

上後燕國王疏

尚書
郎書婁會

三年之喪天下之達制兵荒殺禮遂以一切取士人心奔競苟求榮進至乃身冒縗絰以赴時役豈必殉忠於國家亦昧利于其間也聖王設教不以顛沛而虧其道不以喪亂而變其化故能杜豪競之門塞奔波之路陛下鍾百王之委廓中興之業天下漸平兵革方偃誠宜蠲蕩瑕穢率由舊章吏遭大喪聽終三年之禮則四方知化人斯服禮

晉書百二十三
載記第二十三

上南燕王疏

南燕
尚書韓諱

二寇逋誅國恥未雪關西爲豺狼之藪揚越爲鴟鴞之林三京社稷鞠爲丘墟四祖園陵蕪而不守豈非義夫憤歎之日烈士忘身之秋而皇室多難威略未振是使長蛇弗翦封豕假息人懷憤慨常謂一日之安不可以永久終朝之逸無卒歲之憂陛下中興大業務在遵養矜遷萌之失土假長復而不役愍黎庶之息肩貴因循而不擾斯可以保寧于營丘難以經措于秦越今羣凶僭逆寔繁有徒據我三方伺國瑕釁深宜審量

虛實大校成敗養兵厲甲廣農積糧進爲雪恥討寇之資退爲山河萬全之固而百姓因秦晉之弊迭相蔭冒或百室合戶或千丁共籍依託城社不懼燠燒公避課役擅爲姦宄損風毀憲法所不容但檢令未宣弗可加戮今宜隱實黎萌正其編貫庶上增皇朝理物之明下益軍國兵資之用若蒙採納冀裨山海雖遇商鞅之刑悅綰之害所不

辭也

晉書百二十七
載記第二十七

上南燕王疏

中書
侍郎韓 範

夫帝王之道必崇經略有其時無其人則弘濟之功必闕有其人無其時則英武之志不申至於能成王業者惟人時合也自晉國內難七載于茲桓玄逆篡虐踰董卓神怒人怨其殃積矣可乘之機莫過此也以陛下之神武經而緯之驅樂奮之卒接厭亂之機譬猶聲發響應形動影隨未足比其易也且江淮南北戶口未幾公私戎馬不過數百守備之事蓋亦微矣若以步騎一萬建雷霆之舉卷甲長驅指臨江會必望旗艸偃壺漿屬路跨地數千衆踰十萬可以西并疆秦北抗大魏夫欲拓境開疆保寧社稷無過今也如使後機失會豪傑復起梟除桓玄布維新之化遐邇旣寧物無異望非但建鄴難屠江北亦不可冀機過患生憂必至矣天與不取悔將及焉惟陛下覽之

晉書百二
載記十七

明

應天以實疏

賀欽

臣切見連年以來災異之作略無虛歲而今年爲尤甚自春抵夏或風霾屢日或黃霧障天或狂風怒吼或日月無光始則恒陰而少晴明繼則久旱而無雷雨陰陽失序氣候舛差天之降災莫甚於此得非人事不修之所致歟昔董仲舒對漢武帝言國家將有失道之敗天乃先出災異以譴告之者此之謂也於此見天心眷祐我國家仁愛我皇上欲其恐懼修省以享治安於萬幸也頃者禮部尙書姚夔等具陳災異之狀乞修內外之政綸音獎其忠愛且曰內事朕自處置外事便斟酌而行此陛下一念應天之實心也是以命下次日微陰噎頓然而晴明既而以久旱爲懼躬率群臣齋戒三日以答天譴此又陛下一念應天之實心也是以命下次日微雨應期而既降天人感應一何速耶然而自是以來風霾既息而復作旱勢日甚而可憂所以然者豈陛下應天之實心謹於前而怠於後耶抑羣臣無應天之實心以助陛下之格天耶不然何前日感應之易而今日感應之難也詩云敬天之怒無敢戲豫敬天之渝無敢馳驅言人君不可不致謹於天變也以今日言之天之怒而變也甚矣而陛下方且遊樂是從吶喊動地鼓炮震天其爲戲豫馳驅何以加之而所謂應天之實心果安在也詩又云天之

方難無然憲憲天之方蹶無然泄泄言人臣不可不致謹於天變也以今日觀之天之難而蹶也甚矣而在廷大臣以及群僚方且怡然自得恬不知憂惟務承順懼忤聖情陛下以爲可行彼亦曰可行陛下以爲不可彼亦曰不可習成諾諾之風全無諤諤之節其憲憲泄泄何以知之而所謂應天之實心以助君而格天者又何在也若然則今日感應之難非天道之難感固感之之心有未實故耳伏望陛下念天變之可畏憂民命之將絕痛懲前日既往之失渙頒省躬求言之詔篤格天之實心修格天之實德行格天之實政遊宴之樂非所以克謹天戒也必實絕之而不敢爲無名之賞乃所以暴殄天物也必實止之而不妄費內事之處置所以正大倫繁本支也必實謹其分而溥恩澤之施經筵之講學所以明天理窮道義也必實究其旨而求貫通之妙君臣上下之情不通則天地之否也必日御便殿延接群臣反覆治道而貫以通之君子或在野則天民之隱而當進也小人或在位則天事之蠹而當去也必參之於衆驗之於獨實以進之實以去之以至一政令云爲之際一出入起居之微無不實循乎天則之自然而無或違焉如是而復下詔以切責乎文武群臣斥其怠事廢職之罪開其悔過自新之途使各痛以自省而陳其既往之失勇以自改而勉乎將來之善務盡其實不事虛文或過而不改善焉不勉鰥官曠職妨賢病國者罷而黜之以勵其餘如是則君臣上

下同一應天之實心矣以是實心而齋戒以致禱則必如成湯之禱於桑林而大雨數千里必如周宣之靡神不舉而轉災以爲祥天心有不豫天道有不順天災有不息天澤有不降者臣未之信也臣猥以庸愚備員言責不能進盡忠言以裨朝政論列邪佞以除國蠹致茲災咎罪不勝誅夙夜憂惶無所容措若於此而復緘默不言則將來災禍必不止此雖萬死不足以償尸曠之罪矣因敢不避忌諱昧死冒陳伏願聖明採納而躬行之則天下萬世不勝大幸

辭職陳言疏

賀 欽

皇帝陛下丕紹洪基光臨大寶內閣大臣承順德意薦舉人材臣之愚戇誤居首列蒙恩授陝西布政司右參議當是時臣之舊疾未能全愈兼臣母郭氏年八十有六病臥在床日漸危篤實臣孤子無他兄弟方欲具本陳情辭職乞恩終養而老母以四月二十六日病故沒方浹辰而敕諭下臨感激悲愴莫能爲心伏乞聖慈收還新降參議恩命使臣仍以舊職養病守制雖然聖主難逢病軀難保誠恐一旦身先朝露莫報聖恩是臣身固不可冒禮以進而言則不可不及時而進也謹擇取切要重大者四事爲陛下陳之一曰資真儒以講正學人君之治天下欲求四海之治當盡爲君之道欲盡爲君之道當講聖王之學聖王之學大學者也明明德新民止於至善其綱也格致誠正

修齊治平其目也唐虞三代所以治隆於上俗美於下者由人君之得此學也漢唐以下所以治不古若壞亂相仍者由人君不得此學也是大學也經作於孔子傳出於曾氏程子表章而發明之朱子序次而補註之西山真氏又從而推衍其義實以經史無不備焉載之策簡昭然明白固無俟於後人之贅言而陛下亦嘗講讀之矣臣今復舉以爲言者蓋區區愛君之誠惟願陛下不泥於口耳詞章之習不感於古道難行之言不徒講明之而信之深不徒信之深而行之篤循其分明之節進其有序之功則大學明德新民止於至善之道不在方冊而在陛下矣而經筵勸講之官所謂師友之臣尤當訪求真儒以充其任也所謂真儒者學以爲已知而能行必能積誠感君開導有方涵養聖質薰陶聖性何憂聖學之不得君道之不盡天下之不治哉二曰薦賢才以輔治道臣聞帝王之爲治莫急於求賢人臣之忠君莫重於薦賢陛下即位之初詔求賢才以弼治化此可見陛下有願治之盛心得致治之要道孔子曰舉爾所知臣敢以臣所知者爲陛下薦之臣先年在科之日接見廣東新會縣歷事監生陳獻章天性高明學術純正非記誦詞章之流實躬行心得之士有格君之德有經世之才成化十五年以廣東布政使彭韶巡撫右都御史朱英前後具本薦其賢起送到京以身病母老陳乞終養蒙朝廷授以翰林檢討令其親終疾愈仍來供職迄今六載不知陳獻章前疾

已愈母養已終與否伏望陛下以非常之禮召之便殿問以治平之大道以觀其謀猷授以政事以試其才識若其賢果如臣言伏望陛下或任之內閣使參大政或任之經筵使養君德而太平之治可必致也或陳獻章身病未愈母養未終亦望陛下使之詳陳其格君善俗之道興利除害之方深信而舉行之是獻章身雖家居而其道則行於朝廷矣况陳獻章既賢其所知必有才良行修曉達治體者陛下令其一一舉之以充國用更乞陛下再諭內外大小羣臣悉心推訪各舉所知果才德學行殊常之賢或山林隱逸或庠序生徒或小官下職一皆以禮敦遣萃於京師依明道程子養賢之法置爲延英之院以處之豐其廩餼卹其貧乏以大臣之賢者領其事凡有朝廷典禮使與執政近侍之臣互相講論如學政則討論程明道之論學校程伊川之看詳學制如貢舉則討論朱文公之貢舉私議如經筵則討論程伊川之經筵奏劄必使今日之學政今日之貢舉今日之經筵一如程朱至當之定論以革近世浮華淺陋之習諸賢切磨日久德業益進陛下特賜召對以觀其才識器能則屢歲之間人品益分然後就其高下大小而任使之則天下賢才引類而進陛下德政之美雍熙之治端可比隆唐虞三代矣三曰遵祖訓以處內官臣聞自古帝王之治天下內則公卿大夫外有州牧侯伯一皆遴選賢才彌成治道若內官之設載之周禮曰內小臣曰闈人曰寺人曰內豎紀

其職掌不過正內人之禮事守王公中門之禁掌女宮之戒令與內外之通令而已未聞任用奄寺使之典政本而掌兵權者也秦漢而下時君失政奄宦小人投隙而進竊弄國柄傾危社稷自趙高亡秦以來宦官之禍無代無之載在史冊不暇悉數太祖高皇帝洞鑒前代之失創爲萬世之法內設五府六部都察院通政司大理寺六科十三道外設都司布政司按察司府州縣等衙門分理天下庶務其內府監司局庫衙門之設載之御製皇明祖訓內官之條紀其職掌亦不過灑掃供養并飲食諸物禮儀筵宴關防出入等事而已後來守法少疎宦官倖進內而職掌天下奏牘得預大政外而鎮守各處地方掌握兵權遂致黨羽衆多作威作福賣官鬻獄引用奸邪以致國體虧傷蒼生塗炭正統間則有王振喜寧景泰間則有舒良王誠天順間則有吉祥牛玉成化間又有汪直尙銘梁芳陳喜凡此之輩方其得志正漢史所謂舉動回山海呼吸變雪霜阿旨曲求則光寵三族直情忤意則禍不旋踵是以或陷主邊廷身叛賊境或主易儲君禁固南內或謀爲不軌賄易后妃或邀功起釁流毒邊徼或恃寵招權納賂不貲或引用左道蠱惑上心或導進淫巧盜虛府藏此其陷君誤國蠹政殃民昭昭在人耳目者也陛下遠遵帝王之制近守皇祖之規涖政之初百度爲正進賢退姦去讒遠佞奄宦之害政者屏斥流放不使在側於以見皇上眞大有爲之主也太和之治指日可期

天下臣民罔不欣忭伏望深鑒已往之弊永絕方來之禍漁發綸音昭示中外凡今大小內官一尊高皇帝祖訓凡分職監司局庫諸門者各昭註修其職掌不許干預朝政一應在外鎮守監槍等項盡數取回蓋既曰內官但應處內而乃布之四外殊非帝王之制皇祖之訓決當速改無可疑也若謂在廠訪事內官可以發官吏之奸贓各邊鎮守內官可以防邊將之奸究此又不然自古帝王明四目達四聰使天下臣民皆得進諫中外之情毫髮不蔽姦贓官吏自不能容未嘗以訪察之權假之奄宦況其假公正之跡遂奸慝之私所訪之奸贓常小而自作之奸贓常大所訪之奸贓雖祛除於目前而自作之奸贓實遺禍於久遠成化年間汪直之輩可以鑒矣各邊將官既有巡撫之都御史又有巡按御史凡有奸究足以關防今乃處處設立內官徒使蠹壞兵政殘虐軍民將官之賢而知兵者爲其牽制往往有喪敗之患將官之庸愚奸貪者則以賄賂相交結成私黨肆無忌憚蓋鎮守將官既賂鎮守內官而鎮守內官則常以良馬金寶賂其在朝擅權之黨類一有言將官之不職者則主上左右前後之人誰不爲其幹旋其根愈堅其惡愈肆害擾黎庶不得安生刻剝官軍若無所訴其至隱匿邊機妄報邊功以有爲無以虛爲實欺誑朝廷致誤刑賞莫有爲陛下言者使各邊無此內官其爲將官何所倚仗而敢如此乎大抵內官類多邪惡雖千百之中有一二忠謹者然亦

不可使之犯分以干國軍之政惟陛下遵祖宗之制而一一革之明著簡冊以示天下後世則禍本永絕天下幸甚四曰興禮樂以化天下臣聞帝王之爲治必以正風俗爲先經云安上治民莫善於禮移風易俗莫善於樂二帝三王治隆俗美臻於太和者由禮樂之得其正而天下爲一也後世之治化陵夷風俗壞亂者由禮樂之得其正而紛亂無統也太祖高皇帝當治定功成之時制禮作樂固極盛矣然由粗以入精因略以致詳不能不有待於後聖者皇上丕紹洪基達聰明目聽納忠言罷黜浮屠妄誕之邪術舉行朱子喪葬之正理眞所謂守成業而致盛治之聖主也但異端邪術雖曰罷黜而僧道寺觀充塞朝野者無異往時妖經邪說惑世誣民者尙如昨日病根未拔日當漸長喪埋正理雖曰舉行而有奢豪不律者尙多故違國法幡幢之制僭擬朝廷奠禮之奢十倍諭祭或飲酒食肉竊作佛事或乘喪嫁娶明用鼓樂若此之類不能枚舉他若冠婚祭祀諸禮有祖法之所當申明者有家禮之所當舉行者今未見一一行之以教化天下而習俗之弊則日新月盛子猶飲乳已加巾帽而昧夫童子之禮及其既長則終於愚騃而不知成人之道此冠禮不行之弊也聘娶之禮以庶民而上比公卿論則之風以中國而下同蠻貊夫以僭越之心徇財利之誘則凡竊奪之事力可及者何所不爲此則婚禮不行之弊也至若祀禮不修雖縉紳之家莫不徇俗苟簡況於庶民

小子豈知尊敬祖宗故爲木主者少而懸紙燈以標題者多以祭禮者少而招師巫以惑亂者衆至若祀邪神於家禱淫祀於外棄父母之孝養舍當務之人倫者尤不可勝數此皆朝廷祀禮不修故無以定民心而一民俗也若夫士子無廉恥之節官吏多奔競之風商賈日志於奢華工藝日趨於詐僞至於回回之類久處中國者尙多不遵王化固守陋風道友師巫之流詭於正道者率皆聚徒傳法惑亂黎庶此又朝廷禮法之未行也自朝廷之樂言之用於郊廟之類固皆太常雅樂古淡和平無可議者至若教坊司之樂其聲容節奏已非雅樂之比而司其事者皆無愧恥失人倫淫邪鄙陋之徒夫以朝廷之上根本之地而所以爲樂者如此以故淫邪之聲不正之樂海內成風莫覺其失甚至高建戲台歛財作戲致使少長聚觀男女雜處虛費民財壞亂民俗是豈聖朝之美故也又如京師及各處娼樂所服者錦繡之衣所用者金寶之器淫邪之聲響徹街衢妖艷之色照耀道路雖文武官員庠序士子亦往往墮此陷阱之中况膏粱子弟經營商賈遊倉惰民一賭此物隨風而靡廉恥既無資財耗盡上不顧父母下不畜妻子柔弱者至於乞食道路剛强者至於刼財殺人積習既久後來之禍可勝言哉且天子以四海爲家海內之民皆爲赤子如養民則不可使一夫不獲其所如教民則不可使一民不全其倫凡此娼優同爲陛下赤子奈何以禽獸畜之使其子子孫孫

永陷聚塵之惡而略不傷憫之乎惟陛下於教坊司之樂有未善者則求知音律之人而改作之至院本雜劇決可革者則著爲定法而永革之典樂淫邪之人或使改行從善或使散處爲民京師及各處娼窰無夫者則盡令從良有夫者則禁止淫亂使其務紡織以謀衣食習廉恥以全人理則淫穢消除化爲良善矣公卿以下祭祀宴飲之類朝廷舊無頒降之正樂今當次第制之以化天下而於不正之樂一一革之如此則正禮雅樂自天子出國不異政家不殊俗而風俗自美民心自善天下之治可與唐虞三代比隆矣所陳四事實愚臣二十餘年靜居林下千慮之一得惟陛下察納而決行之則聖學盡而大本立矣賢才用而大政舉矣近習殊而大病除矣禮樂修而大化行矣雍熙泰和之治端復見於今日實天下萬世之大幸也

開義州木市疏

萬歷二十五年丁酉

進士李化龍

環遼皆敵也迤北土蠻種類多不可數近邊者直寧前則長昂直錦義則小歹青直廣遼瀋則把兔炒花花大直開鐵則伯言煖免其在東邊海西則猛骨孛羅那林索羅卜賽皆與遼地頂背相望竝牆圍獵則刁斗聲相聞蓋肘腋憂也自那卜被勦數年東陲無事去年把兔伯言戰死炒花花大一敗塗地今伯言子宰賽受罰入市廣寧遼瀋開鐵間警報漸希所未馴伏者惟小歹青與長昂耳小歹青素兇狡雄長諸部西助長昂

東助炒花大舉動以數萬小竊則飛騎出沒錦義間自周之望柏朝翠戰敗無敢以一矢加遺凌河上下方數百里野多暴骨民無寧宇遠慮者每以河西不保爲虞今乃叩關求市臣遍詢將領及彼地居民僉云木市開有五利河西無木皆在邊外叛亂以來仰給河東以邊警又不時至故河西木貴於玉市通則材木不可勝用利一所疑者於歹青者無信耳彼重市爲生路當市時必不行掠即今年市而明年掠我已收今年不掠之利矣利二遼東馬市成祖所開無他賞本聽商民與交易木市與馬市等有利於民不費於官利三大舉之害酷而希零之害輕而數小歹青不掠錦義零竊少矣又西不助長昂東不助炒花則敵勢漸分即寧前廣寧患亦漸減且大舉先報不得預爲備利四零竊既希邊人益得修備利五疏入從之

附化龍尋以病去木市亦停止其後總兵官馬林復議開市與巡撫李植相左論久不決小歹青遂復爲寇云

右疏

共八篇

奏

清

理藩院郎中馬喇奏

康熙十四年
夏四月辛丑

喀喇沁多羅杜楞郡王札什云近奈曼王札木山遷於察漢郭爾河布爾尼移營就之

二人已合二旗外別無叛者

上因賜札什御用盔甲以旌之

撫遠大將軍信郡王鄂札奏

康熙十四年夏四月丁巳

臣等帥師往征察哈爾於是月二十一日次岐爾哈泰偵知賊屯達祿臣等以輕騎前進二十二日抵達祿布爾尼設伏山谷閒悉衆列陣以待臣與副將軍圖海等分布滿洲蒙古官兵進擊歷山澗賊伏發撓亂土默特兵我軍擊之盡殲焉布爾尼親領大隊擺列火器相拒我兵奮擊賊不能支遂大敗察哈爾下都統晉津率其族於陣前降布爾尼復收潰卒接戰兩次我軍乘勝衝殺連敗之斬級甚多獲馬匹器械無算布爾尼兄弟僅以三十騎遁垂札布等亦皆散走二十三日臣等聞郡主留居瓦子府東三十里遣官兵迎歸布爾尼部下佐領五人兵三百餘名隨侍衛塞梭來歸

得旨嘉獎下部議叙

撫遠大將軍信郡王鄂札等奏

康熙十四年五月辛酉

上命科爾沁和碩額駙沙津率所屬五旗兵會剿布爾尼達祿之戰沙津失期未預因至札魯特境壁於貴勒蘇特會布爾尼兄弟逃奔山後知沙津兵至因使科爾沁從嫁二人送羅不藏妻並告以戰敗欲逃之故蓋羅不藏妻沙津妹也沙津於是留其妹率兵至山後圍之布爾尼豫遁羅不藏云布爾尼去矣余來乞命沙津曰爾欲乞命當招

爾兄來遂遣三十騎同往羅不藏亦遁走更遣其副都統布達里潛聞於其兄沙津兵
內有孟克者追及之爲布達里刺死沙津怒身率兵追射羅不藏與布達里皆死益窮
追布爾尼明日及之布爾尼十二騎併力拒戰沙津盡射殺之

得旨沙津感累朝厚恩親統所屬
馳追布爾尼兄弟斬之克繼祖父

忠貞深爲可嘉大兵
凱旋日著議具叙奏

議政王大臣奏

康熙十四年
五月癸亥

布爾尼反既伏誅其父阿布奈見禁盛京應立斬妻郡主歸伊父安親王岳樂其子於

軍前正法女入官

得旨阿布奈改
爲立絞餘依議

撫遠大將軍信郡王鄂札等奏

康熙十四年
五月乙丑

教布爾尼造亂者阿雜里喇嘛僧額渾津噶爾馬色冷布達里破翁巴達里巴呢陳特
塔爾噶爾昭噶爾馬薄托和也布達里破翁巴達里巴呢塔爾此五人與布爾尼兄弟
同死陳特爲亂兵所殺噶爾馬薄托和等或死或逃尙無的耗其子女皆在卓禮克圖
親王處阿雜里喇嘛僧額渾津噶爾馬色冷亦爲卓禮克圖親王解送軍前候旨處分

得旨阿雜里喇嘛等悉於軍前正
法其叛人妻孥賞給有功官兵

撫遠大將軍信郡王鄂札等奏

康熙十四年
五月乙丑

阿雜里喇嘛諸叛逆之子及近族兄弟俱在科爾沁其僧額渾津之弟尼塔爾當布爾

尼未敗即投科爾沁卓禮克圖親王處俟卓禮克圖親王解到日俱行正法家產妻孥

入官 得旨尼塔爾即於未破布爾尼之先投入科爾沁著免死勿分其產

議政王大臣等奏 康熙十四年五月己巳

察哈爾布爾尼兄弟背叛授首理應懸示額駙沙津為國效力應行優叙邊外率兵協

助之諸王貝勒貝子公台吉等俟大將軍信郡王旋師之日一併議叙獻布爾尼首級

之昂阿爾住爾應授為三等達爾漢世襲罔替賞給蟒服銀幣鞍馬同來土謝圖親王

之頭等護衛綽石希等亦分別賞給 得旨布爾尼首級本當懸示但念係公主所生之子朕心不忍布爾尼並羅不藏俱令收葬於公主墳旁餘如議

奏請順天鄉試房考官閱卷仍應迴避 乾隆三十三年

翰 林王 猷

臣為請順天鄉試房考官閱卷仍應迴避以防弊竇而慎掄才仰祈聖鑒事竊維國家取士大典所關綦重不可不杜漸防微以遠嫌疑而矢公明其禮闈閱卷迴避一節於

考官士子雙為有益讀乾隆六年頒降御旨於指定滿漢皿號同考官閱卷迴避則例

理至明而法至正更於嚴禁之中厚寓恩澤之意聖天子慎重右文大矣哉惜行之未

久旋經言臣奏請停止按條陳者或謂以旗籍本分駐直省與各該處土著之人不無

同鄉戚友之誼其閱卷官勢難但以其旗籍迴避之也又謂皿號士子大都宦家子弟

因宦於遠省援例貢監逕入京闈藉取鄉會近便者為多其閱卷官又勢難惟以其本

籍迴避之也若此其閱卷之迴避只是具文云云臣以其條奏似是而實非查禮部議奏同考官閱卷迴避則例云同考官南省人迴避南皿卷北省人迴避北皿卷邊省人迴避中皿卷滿洲漢軍人迴避滿字合字卷法至嚴也總令考官士子其有籍隸關係不入本房亦無從照應之可能究之同考官閱卷仍應迴避况鄉會試事同一例會試房考閱卷既迴避本省鄉試何獨不當迴避本籍乎理至明也是以謹將順天鄉試房考官閱卷仍應迴避以防弊竇而慎掄才各緣由理合具奏是否該當懇請天裁伏乞

皇上聖鑒

奏請河工漕運變通辦法

道光二十一年庚子

進士趙廷熙

臣奏爲請河工漕運變通辦法以節國帑而舒民困仰祈聖鑒事竊漕運乃國家要政河道爲海內巨工其蜿蜒千里綿亘數十城處處堤岸岸壕壩關津渡口綆筏橋樑水利興弛所關綦重宜如何研究整頓端求上理以事交通而免不虞仰承聖諭諄諄三令五申垂念東南帶礪山河之至意惟集恩積慮鞠盡職司以冀答高厚鴻慈於萬一臣觀由政鑑察以水鑑按水性圓活處方則方處圓則圓攻堅和弱流而就下故導之則逝而入海激之則可使在山迎之抗之明水勢迫而水力暴因之順之則水勢平而水利緩是故昔人治水皆因水之勢而順水之性鑿龍門因其勢也掘江河順其性

也明水之勢知水之性方可治水汜鑑無而洪水已良有以也今擬定河政辦法數條敬爲我皇上縷晰陳之法在黃河兩岸建築坡式土壤種植毛類水草草長根固一經泥水蕩漾坡面自然光滑水至草例隨波逐流因勢順性可免冲刷其禦水能力視諸堤防迨有過之而無不及比諸舊法足可事半功倍待辦有成效酌將河工之船改充漕運之用所有民船蓋免應役實一舉而兩得之辦法也簡章細則另繕清摺恭呈御覽是否宜當敬候諭旨遵行是以謹將河工漕運變通辦法以節國帑而舒民困各情形理合具奏伏乞皇上陛下聖鑒

右奏
共九篇

議

清

理藩院遵諭議覆

康熙八年五月己未

阿布奈無藩臣禮大不敬應論死革去王爵不准承襲（得旨阿布奈理應依議處死但向經恩遇姑從寬免死著革去親王嚴禁盛京）

議政王大臣等議

康熙十四年五月甲子

從嫁公主諸人經布爾尼之亂產業蕩盡請量留數戶守公主祠其餘悉令還京內原

隸八旗者仍歸本旗佐領原隸內務府者仍歸內務府

得旨義州為邊陲要地從嫁諸人停止還京俱著披甲著長史辛柱管轄鎮守

議政王大臣等議

康熙十四年五月己巳

札木山法無可赦妻孥應沒入官

得旨札木山東身請罪著從寬免死革去王爵仍留家口牲畜令其自給

議政王大臣等議

康熙十四年閏五月乙巳

昔垂札布之父根敦貧不聊生無以自立於喀爾喀納款來歸皇上優禮之擢為上公

俾瞻養於察哈爾為附庸是以得延至今布爾尼反垂札布不即以狀聞反附逆助戰

逮敗遁無歸始率屬乞降請革垂札布爵所屬人口分給八台吉台吉託伊等既豫投

科爾沁卓禮克圖王請留其職銜人口應歸何旗伏候敕旨

先是歸併察哈爾之喀爾喀公垂札布附布爾尼反台吉託伊等率四佐領兵

奔科爾沁及布爾尼敗垂札布無所歸投誠軍前上命併託伊等佐領於土默特濟斯札布餘依議

遵旨會查奉天各屬應修城垣議

于敏中

本月初八日欽奉諭旨盛京為本朝王迹肇基之地朕恭謁祖陵道出山海關經過各

處城垣多有坍塌殊不足以壯觀瞻而資捍衛著軍機大臣會同將軍弘晌查明何處

最為緊要應行修築妥議具奏候朕發帑興工並派員稽查督辦欽此臣等伏查奉天

各屬惟盛京城垣每年立有歲修章程現在崇墉完固無庸修葺外其餘各屬城垣俱

久未繕治實多傾圮其必應修築者共有一十八處但各城同時鳩工興作工匠既不

敷用稽查亦難周到臣等公同酌議請就應修各城分爲三次修葺先將駐有官兵之錦州府熊岳鳳凰城並大路經行之寧遠州廣寧縣遼陽州六處較爲緊要者爲第一次次將中前所中後所巨流河義州鐵嶺縣開原縣六處爲第二次又次將撫順海城縣岫巖廳蓋州復州金州六處爲第三次其餘屯衛堡驛雖舊有城垣而地方僻小無關緊要者均毋庸修葺並請簡派督辦大員隨時往來稽查并遴派熟諳工程之員每處一人會同將軍臣弘晌及府尹督率各屬估計工料奏明請帑擇日興工仍各預行度地開窰燒造磚料務期厚實堅緻足資鞏固所有臣等遵旨會同酌議緣由謹繪圖繕摺具奏伏乞睿鑒

右議 共三篇

檄

晉

檄青州諸郡

南燕司徒慕容鍾

隆替有時義列昔經困難啟聖事彰中籙是以宣王龍飛於危周光武鳳起於絕漢斯蓋歷數大期帝王之興廢也自我永康多難長鯨逸網華夏四分黎元五裂逆賊辟閭渾父蔚昔同段龕阻亂淄川太宰東征勦絕凶命渾於覆巢之下蒙全卵之施曾微犬

馬識養之心復襲凶父樂禍之志盜據東秦遠附吳越割剝黎元委輸南海皇上應期
大命再集矜彼營丘暫阻王略故以七州之衆二十餘萬巡省岱宗問罪齊魯昔韓信
以裨將伐齊有征無戰耿弇以偏軍討步剋不移朔況以萬乘之師掃一隅之寇傾山
碎卵方之非易孤以不才忝荷先驅都督元戎一十二萬皆烏丸突騎三河猛士奮劔
與夕火爭光揮戈與秋月競色以此攻城何城不剋以此衆戰何敵不平昔竇融以河
西歸漢榮被於後裔彭寵盜逆漁陽身死於奴僕近則曹疑拔扈見擒於後趙段龕干
紀取滅於前朝此非古今之吉凶已然之成敗乎渾若先迷後悟榮寵有加如其敢抗
王師敗滅必無遺燼稷下之雄岱北之士有能斬送渾者賞同佐命脫履機不發必玉

石俱摧

晉書百二十七
載記第二十七

右檄

共二
篇

序

明

贈金德容之任石州序

賀 欽

弘治丁巳仲冬吉月古宜金德容之石州幕友人戶科給事中賀欽時病居於家令其
子士諮書贈德容曰當官三事古今所尚德容平生自誓曰居官取賄天罰其嗣又能

謙謙自牧不忤於人自遊京師十數年來安於儉約常假貸以自遣若是者可謂有志於清慎勤者矣况德容歷事刑曹國朝憲章擬議熟矣讀書讀律修己治人尙可謂無術者耶茲行也首舉一州與賢太守相可否布善政以蘇窮民必有可觀者焉程子曰一命之士苟存心於愛物於人必有所濟況操一州之幾要者乎德容勉乎哉勿若俗吏惟讎怨於齊民而竭智力於鞭朴也州之侍御崔公武選陳公欽之故人也今不知歷何官已投老否德容倘往拜而請焉必有善言也德容勉乎哉巡撫都憲侯公大參前兵部亞卿張公欽之同年友也今不知遷轉否德容爲之治屬進謁之際必有善教也德容勉乎哉孔子曰事其大夫之賢者友其士之仁者此之謂也又何患善政之不布而窮民之不蘇哉若然則病夫亦與有光矣德容勉乎哉

重刻醫閭賀先生稿序

陳天錫

賀先生三十登進士三十一官給諫災異乞罷免其最沉痛之言曰但今所謂修省惟陛下一人耳三十二歸讀書醫閭山疏薦陳曰沙宜居宰輔任經筵懸像靜室率子弟拜之廿載事母薦起不赴尋覲艱上書陳四事劾內鎮守甚力執政迂之公輒自忖不學無術盡削其草剛毅類羅一峯一峯先生年友也事之亞于白沙教人先小學敦古禮革習俗義州化之寇不敢犯其里見先生且羅拜止殺歲庚午余承匱司業上然大

司成馬言有旨本雍坊翰會議孔廟從祀公最無間知其人不讀其書可乎是書得之前屯賀訓導君卿以選貢捍危城率先道義及進香河令勤政凜操撫恤遺黎公賢子孫也乞余序以傳先生於義州古曰宜州醫閭山居其右余奉使遼東都司即其地今移而之寧遠矣初高皇帝命功臣龍虎上將軍都督馬公雲葉公旺自登萊渡遼招附經營設都司焉東廣寧南錦州西大寧北一面鄰敵耳自從大寧諸城人民盡予朶顏此州兩面受敵緣邊最要害云先生亟稱王中丞九臯創六馬營堡弘治王參戎銘修建大清堡而大寧太平康大定堡踰年皆復多者七百少者四百授之堡田耕且守而又亟稱遼當世祠莫如馬葉二公大都開創衛所建立學校報德報功何可忘也公嘗言洪永間遼兵八分農種二分守城以八養二今竟反之銀糴中鹽尙苦不足亟反之八農守之數使戰兵雖少而精不求給於農種之外邊防無虞大費亦省至哉言也予憩寧遠屯計工而分粒土甚沃美公言猶信公以銀的教射語人曰進不爲朝廷用退不爲卿里益吾恥之雖老病不敢不勉又稱懷柔伯念久雨治水口旣僞工設酒筵所部將士有禮節其守臺貼臺不習於射官軍半私鬥敵至如入無人而爭買漢首以充級則齒牙憤裂各記姓名俟天道報復又念此方之人不習蠶織於是教家人紡績以及城堡公於貼臺守臺勸耕勸績用心如此躬行君子不虛耳嗟嗟中山王垂老薊門

經營九載而從海之役屬之二將薊遼可兼中山兼之矣高皇帝必使中山兼之矣意者山遼海關外金城遼海相注灌遙呼山東舒叨近控薊門張翼遼薊各自爲而全體相首尾耶意者大寧一失兩受敵兩受牽左枝右梧情形迫遽昔離之乃合今合之乃離耳苟求其故宜閱此書苟求其故而不得宜閱此書揣公之心若曰爲人臣不保疆土保父母保鄉里以貽君父之憂豈人也哉茲余評閱意也

許氏家譜原序

萬曆十五年

衡州府知府前戶部湖廣司郎中許倬

自古稱宦業之盛若漢之袁楊宋之呂韓未有不自上世之積善忠厚勤儉以培植其基者我許氏自元帥公始居靈寶仕信府君以上有隱德若高祖存何氏之遺孤活河夫之疫衆高祖母焦太夫人天性至孝姑老病臥床手滌便溺朝夕扶掖躬自饋啜曾祖事親克盡孝敬撫幼弟終身不異財產養姨母二十年如一日種種懿德不可殫述至祖襄毅公清忠直亮位冢宰不私恩怨不計功利恢復絕國活哈密八百人命事功風節表著一代惟祖宗是則焉及伯父莊敏文簡父恭襄三公荷上寵眷典密勿列六卿其主持國是愛惜人材著述明道勘定禍亂亦未嘗敢外祖宗家法其爵位愈隆而謙抑愈加榮顯益極而心行益謹誠有古人循墻履水之意是以歷時彌久而天不厭人不忘海內之士無不羨慕者何哉皆由其積善忠厚勤儉足以感動其樂善之心

耳倏叨守衡郡政暇緝像譜贊傳壽諸梓嗚呼祖宗淑軌芳譽美而傳矣凡我後人當恪遵遺範盈滿是懼驕奢邪巧是戒砥德礪行庶可以克紹先業不然驕則肆奢則蕩邪則悖巧則戾其不背祖訓以抵于敗亡者鮮矣嗣之孫子其知所勉哉

附族譜序跋例言

親族紀於堯典黎民致於變之休追遠詳於魯論民德成歸厚之俗而所以親族追遠尤在族譜之修明有以觸之故眉山蘇氏廬陵歐陽氏之譜序迄今爲藝文之一

種若縣志藝文列族譜序跋則見於安澤縣志

岳陽趙氏族譜山西布政司參議范士髦爲之序並跋

亦以勗孝思於

後來而藉感一邑爲孝友之鄉我邑鄙處邊隅非比安澤修譜之家甚屬寥寥採謹錄族譜序跋數則藉爲吾邑人士或冀親族或思追遠者作之引而作之型即於綱常名教世道之心亦未必無小補云

十七年二月二十一號鶴識

清

梁氏族譜序

清康熙七年戊申

舉程可則

吾友同舍梁君震先奉尊人大參先生之命編其族譜成屬予爲序予受而卒閱曰嗟乎人才之與世運相維豈不信哉維遼左爲業始基一時佐命之英遭逢運會雲台景從著勛天室者何可勝數而君之先以文學起家二十餘年來彈冠振衣後先相望若

守令若內外臺陟郎署禁近者十有餘人可謂盛矣君家系與程同出安定自伯益之後封於夏陽爲梁伯此子孫得氏之始又其後散處四方於是梁氏之族偏天下然考秦漢以來以文章政事著稱當時載在史冊者多矣若遼左則未聞也君自言其先本濠人自二世祖乃遷遼歷百有餘年耳蓋自古賢豪奮興當區宇再造之日必萃之於一方梁本非遼族天欲啟其後人顧使之流離轉輕去其鄉若先自處於應運之地以待休明之會豈偶然哉我故謂人才與世運相維觀梁氏可信也雖然家之有譜所以述祖德示來茲不獨以記爵位名號而已每見世祿之家不爲久遠之計數傳而降有不能自稱其先澤者自非譜牒之淪缺不至此梁氏之嘉猷懿績旣顯於朝而又傳於家君子以爲知本務矣先是君之尊人岐山先生爲大參將時予從淮揚得見顏色君之兄從先與予同登辛卯賢書今爲五臺令而君與予共直西掖後先垂十年素心晨夕因習知其世德甚厚竊謂梁氏之盛正未有艾詩曰思皇多士生此王國先之曰凡周之士不顯亦世吾於君之族有厚望焉今天子庶政聿新人唯求舊他日或如唐太宗詔撰氏族志以重冠冕未可知也而梁氏之譜不益有徵於後也夫是爲序

梁氏家譜現藏於褚氏家

梁氏族譜序

清康熙七年戊申

浙江通省糧儲道右參政梁鳳鳴

宗之有譜也所以序世系別支派也世系序則不敢冒崇韜拜子儀墓下前史譏之謂

冒也然古者宗法修明之時即無譜而世系瞭然支派并列後世宗法不講而故家巨族猶能各自爲譜分者折之合者聯之則譜正所以維宗法之衰乎至於譜濫而宗法之分錯舛譌殆不可言矣余嘗私心致慨於此而男顯祖繕成宗譜以進按先世籍江南鳳陽府壽州之五里村枌榆之社代隔綿渺即世次不可得詳矣今譜之則斷自高祖諱士私者始一傳生曾祖諱鉞曾祖兄弟二人再傳生王父諱東魯王父兄弟五人其二人則曾伯祖諱欽出也三傳生父諱權父同產兄弟三人從兄弟十一人父生不肖鳳鳴從兄弟十九人不肖生九人及曾孫歷八世矣其餘名爵序次則於顯祖譜詳之余覽之而幸其毋或紊也毋或冒也亦毋或濫也雖然余又有感焉昔眉山蘇氏作族譜而老泉自爲文以記之兢兢焉深戒乎怙勢位者而以敦睦相勸我梁氏之爲是譜非徒使後之人按籍披圖知所自出也余念吾高曾以來培養世澤傳之子孫何以續承不墜則今日之述祖德而貽孫謀者是必有在余文誠不及老泉而願我同宗皆知保守之匪易本支之宜厚如蘇氏族譜之所云不敢以告鄉人而私以戒宗人者是余之志也夫是余之志也夫

梁氏族譜續序

清康熙七年戊申

梁顯祖

周禮小史掌邦國之志奠繫世辨昭穆古者宗法修明承祧繼統之制皆官爲之經理

故奠繫世以識其源流辨昭穆以別其序次夫是以人皆重本羞墜家聲而一時朝廷亦收忠愛之益唐宋以來古制寢失士大夫家各自爲譜以紀其世系所思來而因以申其敦睦孝友之思當時大儒如廬陵歐陽氏眉山蘇氏皆自立譜牒自著記叙數百年來衣冠閥閱之族莫不做而爲之此亦所謂禮以義起變而不失其正者歟夫宗法五世則親盡用義所以裁恩之過而譜例則五世以外皆得備列其支派以識其水源木本之所出則不忘似續之繁而不瀆則必有譜以記之且吾梁氏之在梁子姓頗多及遼破後亡者什之七八又自義州而一遷高巖墻再遷蓋州三遷太子河四遷娘娘寨五遷通遠堡六遷鳳皇城地經數徙余益懼其久而失傳也此族譜之作之尤不可以已歟按梁氏舊有指揮使官其所從來亦不可攷承襲以來傳以六世而失而列於縉紳仕版者則自吾父與伯父及余兄弟輩始嗚呼一世以傳百世人所至願也迺其因親以制服者僅五世而遂止藉令不爲之譜以載其世系則五世以外將遂等於路人乎彼大宗之所以百世不遷者則又何也若夫修譜之事宗子之責也余於世次且不得繼禰寧敢分而妄譜吾族但以職叨中秘爲文翰近侍之臣是以父兄皆諄諄命之而不能違耳因法古人之所爲宗支圖者具列於前復按長幼房分拆於後而仍歸吾族之爲宗子者掌之不敢僭也爲梁氏子孫者按籍而觀知今日支派雖分本源則

一各盡孝友共勉敦睦以不尋先人且念當日流離播遷跋涉險阻而今者享有寧宇不敢一日少自即於荒則余之序譜之意庶可以告無罪矣至於仕官之或略或詳年齒生忌之或全或闕則皆本歐蘇族譜之例而竊師其意云

汝寧府志序

康熙三十四年
乙亥仲夏月

知府陞福
建縣傳道何顯祖

國家版章孔厚漸被所訖遠過前代而豫州居天地之中故古史載筆特書具有圖籍稽往昭來非志無徵矣汝南舊志其文省省慮其多佚也前輩李少司空以燕許手筆起而編纂成書繼修於太守山陰金公較前詳而備矣僅止壬寅歲而止近三十餘年間聖天子御極廣運舉萬邦之利弊而興剔之悉窮岩邃谷之疴癢號啼而撫摩噢咻之如天之無不覆也如地之無不載也至幸闕里以重文教恤災荒以覃皇仁府事修和百度維新矣四方風動矣烏可無志以紀太平盛業哉茲則內有賢宰執正笏平章外有股肱臣分猷旬宣我大中丞顧公簡命益殷事權加重討軍實繕河防貞憲肅僚日不暇給乃檄下汝南搜羅全志以襄國史此與杜元凱註左氏於帥襄之年張茂先誌博物於鎮幽之時殆後先同揆歟何學之優而才識之高朗也重修河南通誌雅馴典則史裁宗匠大巫在前操觚者其難之矧賦資弇鄙媿乏三長曷克荷茲大任然伏而思之汝郡境接冀兗荆雍四州之域星占角亢房心室璧柳張之野提封千有餘里

歐陽永叔知蔡州所云惟古豫之名邦控長淮之右壤風土渙厚文物豐饒者矣豈無望古遙集之士出於其間爰是咨訪耆碩以備編纂幸二三同志小心翼翼以匡不逮若建置沿革山川疆域戶口田賦之類昔時書缺有間矣今則討論覈實多補其所略職官自分郡邑而後一體同紀揆之義例漢唐五代金元時命官之名不一或府或州或縣肇自勝國以來而前代蒞茲土者如端木爲宰兼之產是邦者如漆雕大賢世代相望別爲名宦鄉賢二款以槩之如藝文一志重在循實不循名舊多人地混淆非所以崇真儒重文學也上自周秦漢魏下逮唐宋元明賦序歌詩碑銘傳紀時時見於他書雖不能討索無遺亦庶幾十之八九至於方技之以術見長流寓之以賢著稱亦惟天實生材不得執一途以槩天下士也大抵紀合郡十四屬之都鄙田里旣古人地理食貨之遺乎官秩人物義夫烈士孝子節婦即古人世家列傳之旨乎直書無隱筆則筆削則削春秋之意寓焉矣今之志亦猶行古之道也顯祖風塵鞅掌吏敬遵憲檄以襄國史於以見我皇上三十四年來生聚教訓先有致乎此也美哉保世滋大始基之矣但詞不爾雅終有慚於作者猶之士衡草賦見左太冲三都輒輟筆云爾

梁氏增脩族譜序

康熙五十二年癸巳

梁顯祖

先大夫命繕緝宗譜時予方簪筆薇省日事繙譯退食之餘次第編紀是時計止八世

而今又閱一世矣吾視昔加支派愈分冠蓋愈多非重加纂輯何以揚祖烈貽孫謀乎予總總慮之爰取向所成宗譜續詳訂焉世之爲譜者例有列傳及載誥勅碑銘等項予唯是崇質去文有行實可考者節取其要久而遺妄者仍詮次其世系總歸於確實傳信不敢效世俗徒尙粉飾以誇耀於人而列在九世者第書其名字誌其自出觀覽之下爭自奮勉以紹述前人此予脩輯之至意也繼自今邀我祖宗垂庇俾箕裘勿替而瓜瓞延綿則取是譜而脩明衰大之端有望於後之人云

許氏家譜序

雍正九年

浙江錢塘縣
儒學生員

孔衍佑

從來萬物本乎天人本乎祖故有能致身通顯功名赫奕者未不由其祖功宗德積累所致也第世祿之家鮮克由禮往往以公卿之子降爲皂隸不數傳而後致先世之功德委諸草莽者蓋不乏矣惟我容翁許老憲臺以宦室名裔爲當今柱石跡其行事當藏器待時之際倜儻風流光明磊落固非俗下靡靡所能望其肩背及焉朝廷擢用不矜材不恃智夙夜靖共恪守乃職以故歷仕兩君不次陞轉錫以大位粵自戊申春欽承簡命來蒞吾浙督理龍袞上供天府興廢除弊人懷其德己酉五月又奉特旨兼管關鈔裕國計恤商旅善政更不一而足階玉家大阮從事左右深沐雅愛視爲股肱之寄因得晨夕晤對當政務餘閒談及其家乘久未脩輯時以爲念今辛亥秋出其先

人圖贊行狀以示予叔欲加纂訂以示來茲叔因持歸命予以筆墨之役夫予下里儒
生也何敢妄綴高賢然予展讀之下見其遞傳以來代有偉人或則豐功駿烈不愧大
臣風範或則隱德奇行皆爲良士規模其所以佑啟後人者蘊釀深厚世澤之流芳源
遠且長也至觀憲臺自記一則少年練達位冠諸卿凡所動作更爲出人頭地即以方
於古之鄭僑亦無多讓予心竊敬慕之因聊志數言稍伸景仰之忱况又承叔父命其
敢以不文辭耶爰將其世系圖譜與予季式文細爲核校自院公而後各據其事而附
以傳以見憲臺之策名當宁勳業日隆者固有由來而其所以克紹箕裘光大前徽者
亦惟憲臺之樹立不凡也至於積德之家慶垂百世將來之子若孫瓜瓞雲仍簪纓接
武更能光前而裕後焉此固理數之必然亦予之所可預決耳

重刻許氏家譜序

雍正九年

督理杭州織造內務府郎中
兼理南北兩關稅務加一級許夢閔

余以涼德菲材厚蒙聖朝擢用自問謏劣何能膺此揆厥由來實祖宗種德數百年積
累所致憶自十世祖莊敏公承先啓後治國刑家制誥所頒傳贊所記卓卓人羣歷歷
具在數傳而下迨至吾祖吾父俱有不次功德昭人耳目第自倖公纂刻襄毅公父子
四尚書圖像而後家譜久未修輯其間宗派不無迷錯予於雍正六年間蒙特恩授爲
杭州織造府郎中次年又命兼理南北兩關稅務公餘之暇慨念先烈誠恐世愈久遠

事愈湮沒後有來者茫無所知因將世系重加考訂付諸梨棗以傳後世并自吾父而上遠溯前代祖孫父子嫡派相傳及予親支兄弟叔侄另爲一本更便觀覽又思予自幼至壯承家訓膺主知雖無出人事業而君父之殷勤訓誨撫息豢養至意身受之下實深感激情所難忘故據實直書著有容齋自記一則附載於左但予性豪放酷嗜騎射久疏翰墨其間詞意或有不能藏其固陋者亦聊以信今而傳後非敢云揚芳而擢藻也至於後之子孫能有克繩祖武繼我家聲者則更予之所厚望焉耳

趙氏家譜序

清乾隆十四年仲冬之望

賜進士出身長蘆都轉鹽運使司鹽運使勅管鹽法滄州

昱

先世積德累仁天厚其報傳之子孫綿綿延延以嗣以緒寢昌寢熾如河之出崑崙江之出岷山經千百里而支分派別浸漑無窮無他其源盛也顧導江河者必溯其源而實舊德者不求其本則尊祖敬宗之義缺焉是固仁人孝子之所惕然靡寧者也余乙卯同年友盛京義州趙君握臺性純而學富居常本力行孝友之稱人無間言余自丙辰通籍後官京師獲從握臺遊戊辰夏來司長蘆轉而握臺適典廣積庫因得晨夕相接粹然玉節金和無愧儒者詢及家世知其先自山左遷於昌黎由昌黎遷於義州已十四世子孫繁衍代有偉人爲義巨族歷世久遠滄桑變更十四世以上宗譜散失莫可追考握臺時以爲恨而尤念十四世以下雲仍相繼系牒未明今之聚族而處者尙

於親殊遠近長幼尊卑之分有茫然莫辦者更傳之數世支益繁而派更遠疇昭疇穆疇大宗而疇小宗當更無自勾稽豈所以衍宗功而綿祖德乎爰是與其羣季巾涵顯屏輩索之碑碣徵之族老諮謀諮詢是究是圖積有年所輯爲家譜一書其間考世序詳名諱記事實述官爵信者傳信疑者存疑一開卷而千支萬派瞭如指掌燦若列眉彬彬乎以良史之才而成家乘蓋誠善也乃握台之意尙有歎焉曰十四世以上莫可追考也余以爲不然族者務從其厚作譜者必核其真世士大夫托影希風誇張前烈乃至胄援費宰墓拜汾陽既貽於先靈徒見嗤於有識於義何取握台之譜亦既詳於十四世矣由是推先世雖名字失傳行實無據莫非祖宗積德累仁之厚故至於今嗣緒昌熾乃如此也易曰積善之家必餘慶固信而可徵矣記曰明德之後必有達人公侯之裔必復其祀余將於趙氏觀其盛也是爲序

趙氏家譜序

清乾隆十四年十二月穀旦

候選知縣王國樑

世系之有譜如崑崙之水綿延千萬里而支分派流洞若觀火夫尊祖敬宗之義大宗小宗之辨序昭序穆之別非譜而何以瞭如指掌也乎趙君握台予乙卯同門友也孝友無間於鄉黨忠厚盛稱於吾輩常恨世遠年湮譜牒失傳難以稽考念自山左而昌黎自昌黎而義州十有四世尤可搜採遺牒諮詢族老願捐薄俸勒成一譜授之梓人

命余作序余雖譎陋愧辱斯文然敦睦之行有心共賞今日握台之苦心即後世子孫之幸事敢以鄙俚自諉哉是爲序

趙氏家藏

義州王氏宗譜序

清嘉慶二十年乙亥

候補知縣鍾廷瑛

譜牒之所係重矣而在官遊四方不克聚守其宗祧者爲尤重漢氏之東名家世族家有系述魏書氏族之志唐書世系之表尤其統會者也蓋自當塗立中正九品而寒族被抑江左以來崇尚門閥拓拔魏文遷洛有分氏十姓三十六族九十二姓之分至唐貞觀迄元和蓋以姓望相高如太原王與崔盧李鄭所謂甲族五姓者皆與唐相終始良以聚族而居昭穆秩然雖百世可知也歲乙亥王子芷堂兩馳尺書以譜序見屬書云霖奉天義州人也太高祖而上聞自寶坻遷樂亭代遠年湮無可攷康熙間先祖父中憲公始自樂亭遷東爲義州人霖生於中州南召隨任挈挈南北今來山左五年年二十有四矣未曾旋里族人多有未識慨自高祖兄弟三人而中憲爲長支子所謂二支三支者或居連山或仍居樂亭其各字官代亦多懵焉大懼萍蹤靡定數傳而後或不能舉其宗派則兄弟而等於途人如昔賢所譏譜之不脩爲罪滋大今擬以太高祖爲始祖牘列高祖三支之諱履歷纂爲義新譜以存梗概敢祈弁言用光家乘瑛維芷堂以名家子承其大久廷尉公之貽訓英年玉立負俊異之才行且策名雲路爲梗枏

杞梓今以官遊之故首以宗譜爲汲汲可謂敦本溯源知所先務者矣瑛衰慵久疎鉛
素辱誣諉之殷不敢以不文辭謹序

王氏
家藏

吳登蟾

王氏年庚譜序

清嘉慶二
十年乙亥

歲乙亥客歷下奉天義州王君芷堂與余世交雅相善也一日出所著年庚譜屬序於
余余故不諳鉛素而不獲辭觀其譜自曾王父以下迄本身生年月日官塔大小與夫
外戚世閥無不一一登註瞭如指掌誠仁人孝子之用心也余目之有感矣自風尚以
綺靡相誇銘誅系述假手名流往往連篇累牘銜布當塗而按之事實或相柄鑿咎安
在哉後之人藉以博聲聞而與前人無與也昔歐陽文忠少孤家世中落既仕有年譜
牒未見於世迨身入樞密褒封三世始自表瀧阡其先崇公太夫人魏國享以及登進
累封之歲均悉以詳天性之純流溢言表見者皆爲感泣以爲仁孝誠敬之至千載上
下可一二數也芷堂于今二十有四矣署名仕錄蓋亦有年顧自總角隨任歷陳宋魯
諸名勝跡其交遊豈乏宗匠而獨以斯事體大不妄假人一文一字必面承庭訓躬親
纂紀以訂爲斯譜之意以年庚起例干支比列首重誕彌而繫之諱名字氏附以履歷
可謂詳矣夫芷堂生長中州未旋故里而世譜之作編年紀月之詳不啻萃數世於一
堂遞相告語豈欲以此求知當世哉特以萍踪轉徙瓜瓞紛披懼後之有泯認也故條

件縷係質言無文書此以常目在之示勿忘而已然而仁人孝子之用心見於此矣嗚呼噫嘻芷堂勉乎哉春秋方富玉立英英他日顯揚正未可量余於斯譜知根之培者實可峻實之大者聲必宏行且以文忠後塵爲之擁慧焉謹序

王氏宗譜序

清道光二年壬午

浙江浦江縣典史

王霖

世家大族之立譜系也固將推源一本以聯同氣之誼而或以閱閱相高誇示久遠然遠而無徵曷若斷自近者之得其實也吾王氏自康熙癸巳由樂亭遷義州迄今百有餘年聞先世世居寶坻因避明季兵燹遷樂亭比著籍義州則由寶坻再遷也夫由寶坻而始遷樂亭者我太高祖良臣公也由樂亭而再遷義州者我曾祖中憲公也傳世未四而家室屢徙而我高祖乾吉公兄弟三人又一居連山一住樂亭嗚呼此昔人所云蕩析離居固有定極者殆亦時勢使然歟及霖而六世矣中間不無仕官通籍而譜牒未脩未必非職是之故也嘉慶二十年歲乙亥霖隨我嗣父司馬公任於山左慨然念先世名諱官爵僅得之面命耳提而按譜考系則缺焉恐後之日就湮替也爰敬錄一册即以我太高祖爲始祖高祖乾吉公兄弟三人分爲三支三支之人以素所悉知

錄知其名字履歷各編次三支之下命曰義州新譜然亦略誌梗概而已迨丁丑己卯庚辰三回義州故里徧詢族黨備悉昔年起末暨各支支分派別與夫諱名履歷之詳

始知前譜不無缺漏故復踵事而增脩之而寶坻舊譜則鼎革之後凋零而磨滅什不一存蓋故族之中落久矣嗚呼不能紀於遠而紀於近今茲新譜之作斷自樂亭不敢遠溯之不可知世其亦區區此意也夫

麟見亭先生鴻雪因緣圖記序

清道光二十一年辛丑秋七月

進士趙廷熙

道光辛丑秋七月見亭夫子出鴻雪因緣圖記見示前後俱八十圖圖繫以說第一卷祁春圃尙書已爲之叙矣其第二集蓋陳臬河南握節黔楚及總制河南時所作熙喜奉音塵頓開眼界敬申喞引用附瓣香竊聞稟以獄之精者其氣必引星辰而上懋鼎鐘之績者其福必綿江海而長繫古簪筆之臣綴文之士擿華揚藻研都揀京大抵杼聞見之恢奇撫山川之參闕然而蜀程紀行未攬九埏之勝吳船著錄終輸五嶽之游未有著作八州集稱一品悟金粟之前因範模山水印雪泥之舊爪供養烟雲如我見亭夫子之紀續舊遊圖成新製者也以夫子金源世胄鐵券家聲蚤掇巍科洊躋華省自東郡趨庭南陔奉職寧惟問俗露冕觀風東長生請雨之歌趙廣漢鋤筒之頌固已風行列郡圖畫百城矣進尹河南時陳臬事喜鵲巢之似鼓當燕寢之凝香叙庚郵而弁語新題編乙部而繪圖更始李鄴侯本神仙風度謝太傅有山澤閒儀時則彤廷述職丹陛趨風朝頒御瑞溫綸宏錫類之恩衣染鱸香優詔上先人之冢遂及訪洛下之

耆英謁山中之宰相遊記南池古隸重摹釋續居尋東院新詩競和尖文日照榴花之色鑿丹忱而口獄反沉風傳塔寺之鈴鑄精鐵而閣成平等小隊弓刀射期門之狡兔大河牲玉觀音守相之蜚魚旣而白鹿夾車綠熊憑軾伊闕龍門膺此日屏藩之任蘭膏鳳髓酬當年孟琰之靈詩編名媛選樓備采中聲記訪叢臺碑式旁參大統迨使節星移士林雨泣父老百錢競攀轅而臥轍詞人一齣爰叙德以抒情洵足以記蒿少之遊補夢華之錄已然而盧笙銅鼓地無三里之平瘴雨蠻煙天有十旬之漏難携僊眷莫奉溫輿采赤萁而星繁望白雲而天遠溯旗鈴之誕降美旌節之重臨黃襪保母話往事而龍鐘白首門丁述迎親而雀躍碑墜淚而龜跌宛在蕉覆隍而夜夢依然滄浪覓渡緬山甫之遺封古洞尋源指淵明之舊宅峽轉空舸穿石猶傳馬援匯參明月遺經足証桑欽已過湘女之詞遂抵竹王之廟椎髻桶裙坐鎮直同於黔國沙行繩渡叱馭遠過乎王尊雲生足下龍從蚤度嚴關泉落山巔虬箭如浮刻漏聽妖女之歌秋延甲秀說生公之法厄解丁庖觀燈水口遙知西嶼之明霞演武華廳書選南天之赤羽虎嶺獅峯改土歸流者鮮知耕種蠻花佬鳥褒忠教孝者悉被旌揚當行省之移旌屬扶風之祖道酌橘酒而詩成座上戴椰瓢而淚墮杯中亦復搜珠洞之奇覽月潭之勝羽陵仙蠹穆天子之藏書木篋懸壺迴道人之寄跡鳶站水而蛇蛻巖灘聲攪夢魚秤

水而鴉唼食湖水流花五營烙印先歌考牧於荆門九澤安瀾允踐成功於息壤又不
僅考湘之逸事續委宛之餘編矣且夫江漢朝宗同受尾閭之洩淮黃濟運上通星宿
之源帝念宣防勅監都水乃甫拜皇華之命遽興風木之悲憫王事之賢勞降天章之
優渥隴卜紅簫致呦呦之馴鹿林森孝筍瞻啞啞之慈烏蓋身許馳驅心存蘊結福賜
奎章雅合園名清晏衡平心秤欣看插定天然故纘思禹服頌平成者不伐不矜名戴
河圖銘福興者告謀告至遂使桃花激浪竹箭通流人歌砥柱之功戶仰宣房之築乃
偶借公餘嬉諧翰墨水木清華建青雀白鷗之舫沙堤貞應飾明璫翠羽之詞戮神魚
於東海不同鐘鼓之祀爰居獲玉馬於西園匪緣風雪之停校獵商館題襟亭放鶴而
臺戲馬普門留照翅金鳥而指天龍金山月湧儼留帶以鎮山門鐵甕天低偶坐石而
談將苑慕孔愉之放生鼉更應鼓仰焦先之却詔蝸舍題名別門洞壑最宜菴號松筠
小隱華陽信有樓觀滄海訪法嗣之團蕉翛然高詠跂風流於司李渺矣長春由是勞
謙悅豫靈河繪工貝之圖積厚流光休應協神祇之夢雖復恩承賜綺宴賞簪花猶且
居營築塢立神燈而子午針懸井取勞民禮聖塔而庚辰鑱靖帆隱中流舊雨悟注江
之義花爲四壁清風喜積案之釐不徒和綠英之韻梅嶺探春書絳縣之年麥邱進祝
也試看魚星協兆鑿寅衷而雨澤滂流蜃氣成樓觀亥市而江淮底定大衍錫九疇之

福延齡拜三壽之恩才量玉尺獻歌謠者雅管風琴墨流金壺讀賜書者錦罽緗軸秉鈞衡之重任握使相之新權叙官箴則文武兼資籌鹽萊則公私並濟登綠野之堂鶴觴選勝修紅橋之禊龍樹參禪水鑿臣心煮茗憶山東之墅波騰士氣臨江觀北府之兵修敵臺之舊礮念厖衣榭設沙漫之慈航舟通柁載所由智水交流信風效順三錫而倍隆天眷八年而屢荷神庥優聞愾見奉先既宛見慈容錯節盤根寫照亦躬延孝子是則九叙九歌方興未艾一官一集相引彌長行見玉燭調元金甌贊化圖形宣室畫列雲臺三百六旬之纏度上相文昌二十四考之中書令公僕射重摹爪印普入勝緣此日袞衣繡黼先歌安宅之鴻他年藻繪丹青更立程門之雪

趙氏家藏
並錦縣志

趙氏家譜序

清道光二十五年乙巳

賜進士及第翰林院編修禮部尚書祝慶蕃

趙蘭友觀察余同年友也甲辰夏由淮海乞病來京辰夕相追陪每逢談次輒拳拳以重修家譜爲念逾年出家譜囑余爲之序時又與蘭友相愛結爲姻親何敢辭因披閱舊譜見諸位前序知握臺太年伯肇修是譜不援華胄致蹈墓拜汾陽之誚務求徵實以盡世守宗仿之心用意已良厚矣至追溯趙史所由始惟楊公之序爲最詳吾因知趙氏素稱望族也雖代遠派分莫可稽考而蘭友之先世由日照而昌黎後由昌黎而義州子孫之緜延已曆十有八世矣尊卑有序昭穆秩然夫父子之傳之數世漸至無

服至傳之數十世漸如途人其所去者遠也至推而上之則同祖且推而上之則同親其所系者一也蘭友存繼述之懷於百餘年後而續修之以慰先之志誠無愧尊祖敬宗敦親睦族之義也且俾世世子孫知先疇之未遠舊德之未湮得有所感發而興起抑何存心之深且遠哉查舊譜乃昌黎毅發及義州握台二公所肇成握台公即蘭友之祖父也並聞現與蘭友同修新譜者係昌黎桂林又毅發公之嫡孫也祖創於前孫述於後相去百年世繼其美而蘭友服官中外所歷有聲桂林公亦子孫繁衍家世平康何莫非尊祖敬宗敦親睦族之報後之觀是譜者孝悌之心有不油然而生者哉則家聲曰上賢哲挺生可於操券而斷之是爲序

趙家之藏

趙氏家譜序

清道光二十七年仲夏

賜進士出身體仁閣大學士管理兵部事務

卓秉恬

山左趙氏實維望族始徙居於昌黎繼分支於義州溯其譜系至今十八傳而瓜瓞之緜延雲祲之蔚起雖本支百世者無以過之何其盛哉有自來也甲辰夏蘭友同年乞假寓春明與一二老友杯酒話舊嘗稱述先人之德輒不禁垂涕交頤如在左右居數月促裝歸林下逾年喆嗣迪齋刺史奉其續修家譜來問序於余余觀舊譜序中記載綦詳並今時祝蘅畦

宗伯已爲撰續修序固無待余之贅述矣余獨佩夫蘭友之才與學所以能光前裕後

者爲不可及也蘭友幼而失怙太夫人手授書英年成進士官徽省有名游曆農曹出爲司馬擢淮海觀察河流順軌鹽務肅清勳業爛如中外咸仰而蘭友性恬適急流勇退引疾歸田夫豈等軒冕於泥塗哉蓋其至性肫篤惓惓與水源木本之思而外至之顯榮莫然無所動於中也觀是譜之輯可以知蘭友之質行矣易曰積善之家必有余慶禮曰有其舉之莫敢廢也祖宗創造維艱傳之又久年湮代遠子孫弗克肯構肯堂而使泯沒無徵者何可勝道今趙氏派分三支地之相去千有餘里而子孫皆班班可考聚若一家謂非譜系所輯有以聯之歟蘭友膺顯仕文章治績卓然可傳而其族人亦能敦孝悌重力田以弗替家聲則皆其祖上之積累啓之也異日族愈繁傳愈遠雖殊鄉異井得考其家乘秩然不紊以毋忘事業則皆藍友之克繩祖武之所致也吾因知趙氏之寢昌寢熾正未有艾也因有辭而爲之序

趙氏家譜序

賜進士出身戶部陝西司主事翁學濬

世之膺高爵享厚祿者往往薰心於勢利之場而於尊祖敬宗之義缺焉不講即老而致仕且輕去其鄉祖宗邱墓置若罔聞亦退林下必將買負郭之田開別墅之圃以爲優頤養而鄉里同井一本之誼視爲途人此所以名家望族不數世而失其傳顯官豪富不數傳而斬其澤也則譜系之輯所關豈淺鮮哉寅伯蘭友先生以名進士爲淮海

觀察政聲所訖安瀾普慶年未七十而引疾歸方其歸也喆嗣君迪齋心泉昆季以同譜老友咸聚京華遂購於琉璃廠之西偏爲佚老計迨先生至居數月慨然命駕挈眷返錦州與二三父老桑麻話舊恂恂若子弟偕昌黎族兄桂林以續脩家譜爲急務蓋其篤於宗祏而情切於報本非慮夫富貴不歸故鄉如衣錦夜行而欲焜耀鄰里也今夫善始尤貴善終莫爲之創雖盛而弗傳莫爲之述雖傳而弗永褚墨無不朽之時而宗祖無不祧之勢所望者子孫賢耳則能紹先人之業者必能繼先人之志者也能聰聽先人之遺訓者必能垂裕後昆之貽謀者也歲丁未迪齋將之官黔中以續成家譜急付梓並促澹綴言簡端澹與迪齋心泉交最久且深而因以知先生行誼之樸誠學養之深邃有非當世縉紳所能及者夫人而忘本則雖文章經濟燦然可觀而識謂學無根柢已今觀斯譜序昭穆別長幼遠近尊卑秩然不紊親睦之道既洽繼述之義斯隆於以世濟其美永固罔替則豈獨爲後嗣法抑亦可爲有位風矣異日迪齋心泉棣鄂輝映而且如孫鳳毛蔚起犀角羣標咸克繩祖武是又可操券而償者至如譜中徵什闕疑釐然各當則諸序已詳毋俟贅述云爾

趙心泉先生石琴鐵硯軒餘稿序

清同治乙丑

舉文 吉

心泉先生少時隨侍江淮敏而好古壯年淡於仕路性嗜詠吟吉乙丑春初守凌川因

得朝夕聚晤硯席盤桓花天月地酒綠燈紅誼既契乎芷蘭交更深於肺腑茲以蝴蝶詩成誣諉綴言集末所不敢辭盥誦廻環有以頓挫勝者有以刻畫勝者有流連風韻情景逼真者有抒寫性靈塵縛盡脫者三日工夫三十首珠玉語多寄託不愧儒將風流意無遁飾足徵雅人深致其勇敢有爲之慨盡發揮於反手行步間矣爰綴數語以誌欣賞也夫

趙心泉先生石琴鐵硯軒餘稿序

清同治丁卯

進士 文 格

心翁世丈襟懷曠達霽月光風幼而好學至老彌篤其品學爲鄉里所推重每逢花晨月夕吟詠極多其所向往與其所寄託迥然超乎時俗之外予引疴在錦時相過訪得見所詠蝴蝶詩三十韻千變萬化無意不搜俊逸清新淋漓盡致蓋先生抱有用之才讀有用之書年逾花甲遯迹林園閱情縷縷觸緒紛來厲之於詩託之於物其取物也雖小而可悟乎大其命意也似奇而不離乎正或亦莊子之寓言也抑心翁之所以自

况歟

趙氏家藏並錦縣志

懷芳閣留刪小草序

光緒四年十月

生 耿慶泉

仲溥許孝廉諱文惠予忘年友也自門人王伊亭館於其家授以學業予始得以相晤觀其氣藹和風懷澄霽月骨重寒山竊爲伊師伊亭慶得人之樂既而徐觀其行誼敦

孝友飭廉隅重道義即士林中所稱齒德兼優者未必能然而顧得於世家中瀟灑之少年焉難矣予固知其父兄師長善於陶成然以天生美質而不自棄者耳抑尤有深契於懷者予非伊師而以敬師者敬予並以親師者親予相見依依若有前因入泮後因伊師王公歸理家政即負笈予遊聚首一堂論文數載已極相得之樂乃於丙子之重陽名登桂籍旋於丁丑之九日詔赴玉樓計花甲則甫經半周列賢書則僅及一稔嘆伊無祿與我長辭由此以還睹其片紙集字輒不勝人琴之感茲蒙伊兄孚久公下榻相招出其生前所著留刪小草一卷欲付剞劂求序於予亦足以見友于之至意矣予乃一把卷而重不釋手欲卒讀而慘不成聲展玩再四如見其人之氣藹和風也懷澄霽月也骨重寒山也抑且積厚者流自光實大者聲必宏其敦孝友飭廉隅重道義之實行無不於字裏行間想見其大槩然則仲溥固未嘗死也予亦不必悲也即乃兄孚久亦無庸想念也爰述巔末以誌不忘竊愿讀是卷者即以是識仲溥之爲人是則予之所深冀也夫是則予之所深幸也夫

王及時家藏

學竹山房詩草自序

防禦辛保

予雖學詩有年終居門外自開原乞退歸田肆力耕種久已束之高閣無心筆墨今復起用承乏白土厰邊門防禦品級章京政簡身閒日坐無聊值西席赴試同鄉世弟李

君子延代館朝夕引導因習舊業以期自遣未及兩月旋即撤帳遂將所作函祈族姪雅峯先生斧伐指示經閱年餘始覺得窺門戶聊見一斑雅峯又行殿試仍不敢閉門造車故就正於子延弟奈山川遙阻往返實難數年不得一面想亦無緣深造或讀書果前無事耶書此以誌顛末云爾

李氏世譜序

林馬芳田

古之所謂立德立功立言三不朽者上之有光于史冊下之有光于家乘家之有譜猶國之有史其人雖往而其嘉言懿行不與俱往所以世系之源流賢哲之心迹必爲之反覆考辨者士大夫敬宗睦族不當如是耶吾義邑南關李氏遷由順直歷百餘年之久傳家忠厚戶口蕃昌道咸間有玉華翁諱珠者性質渾朴事親孝治家勤訓後嚴爲善篤先嚴爲西席成莫逆交余以嘗親承父執至今猶記當年情事如昨日每念切功名抱濟世志見邑之人有拔萃輒欣羨流連而不能置後於丁酉科喆嗣子瑞果膺選士第一天之報施善人固不爽也亦甚巧也今子瑞修家譜家傳既成問序於余一爲披讀乃歎其考据詳明論列允洽敢本輯族之悃誠流溢楮墨間尤足使後人觀感興起於不盡況每遇本派旁支內務其中委折不堪言狀子瑞必二代理敢言敢行無所顧忌不惜心力焦悴日夜籌圖初猶齟齬扞格終則無不歸其轂中而化怨以爲德無

他其氣雖烈其心至平將見德門衍慶緝緝繩繩共勉爲仁孝之行儼知家法之可畏譜牒所關豈其微哉是書一成不惟有光於族黨比閭戚友亦與有光焉用懽欣踴躍而樂爲之序

李氏宗譜序

貢拔
李芝齡

夫人誦詩讀書猶欲知人論世如龍門公作史記世家三十本紀十二列傳七十俾古人姓世里居行事出處歷歷如遇目前豈有一本之親上下源流茫然不知則兄弟幾等途人無乃不可乎故歐陽文忠公有言子孫不知姓氏所從來以昧昭穆之序者禽獸不若也審是則譜之不脩爲罪滋大予謂譜之不脩非愚者之過實自負爲賢者之羞何則人類之衆不啻恒河沙數藉非賢智之生乎其間雖一族聚九牛之毛終與蔓草枯楊而同歸朽腐顧吾人自命爲何如人而甘自安於腐朽耶吾李氏自乾隆庚寅由順天遷東而來迄今百有三十六年世僅六傳于茲矣曩者或有叩予家系幾世幾年先人原籍何州何里往往緘口低頭幾無以對嗚呼噫嘻人生蒙昧至此恥孰甚焉於是首以脩譜爲汲汲恨予生也晚去祖云遙太高祖而上聞自寶坻遷寧河代遠年湮旣無可考先曾祖由寧河遷義州雖得之先考在日面命耳提然其年月亦不甚詳况予當少不更事罔知所係者重過而輒忘則聞如未聞苟憑臆撰即欲信今而傳後

也得乎是譜之作雖有其志而無所措手欲作中止實有難安乃於無可如何之中勉力爲之因外摹先塋之碑銘內考家堂之木主徧詢族黨互相參証而譜之規模略具今擬此譜不敢遠溯之不可知之世流於荒渺乃紀於近今斷自義州即以我高祖治喜公爲始祖也曾祖諱財公兄弟四人分爲四支四支之人年庚邱墓與夫官階妻子一一考核詳明各編次四支之下命之曰李氏世譜略存梗概以冀永傳俾我後人將上以知一本之生下以聯同氣之誼敬宗睦族庶不負作譜區區之意也夫

李氏家傳序

前人

昔歐陽公表隴阡陶淵明傳五柳自此相承沿爲故事則予今日之傳家世其來有自矣慨自風尚以綺靡相誇銘誅系述假手名流往往連篇累牘街布當途而按之事實百無一當此徒藉以博聲聞既失前人之本真而與後人無與焉予之立私傳也上起高祖下逮文孫世歷七傳人幾百口但即本支宗派極盡榕羅直探方寸隱微詳加品隲特欲使後世之雲祲得窺祖宗之實錄也尤知斯事所係者重故不敢輕假人一文一字粉飾家聲必兢兢焉躬親纂述質言無文凡前人年庚履歷字氏官階與夫外戚世閱無不一一登註瞭如指掌是不啻萃數世於一堂遞相告語豈欲以此求知當世哉然或謂君子隱惡揚善立論尤貴從長況以後人而述前人義在稱美不稱惡子今

者妄論前人雌黃黑白無乃大不敬乎予曰否否以予所聞不若是也夫予之所聞前人無其美而稱者謂之誣有其美而勿稱者謂之蔽誣與蔽皆非君子所敢出也况聖人筆削不無褒貶之詞大舜蓋愆莫掩頑囂之迹與其節短炆長難消真鑒曷若黜華崇實有所折衷也是所望有識君子從而諒之

李氏家藏

民國

張仲景傷寒論正解序

民國元年五月

吳景玉

元人替至聖曰先孔子而聖者非孔子無以明後孔子而聖者非孔子無以法此言誠確論也余謂醫家仲景張機於醫道亦然蓋自羲農軒岐以來所著天元玉冊靈素諸書皆有法無方後學無所遵從且辭義簡奧學者亦不易領會惟仲景氏傷寒論金匱要略二書無義不精無法不備方按君臣佐使藥辨寒熱溫涼證察寒熱虛實脈詳陰歸表裏真能闡發古聖不傳之秘開悟後學無限靈機誠聖書也但世遠年湮傳寫多訛得叔和無已諸賢創傷寒論註林億字彪徐彬尤在涇創金匱要略註繼之者代有多人二書始得昌明字內無如註家太多各發一義學者難窺全豹且不便誦讀今值我義州開創醫學研究會成材達德者固有多人而其中蒙學亦復不少苦無簡易明顯善本以便初學誦讀景玉年登花甲腦力減損眼目昏瞶誠不足開悟後學但承邇

安吳君子儒趙君及李韓白劉諸君推爲醫會科長經監督趙州尊認可景玉不獲固辭遂不揣固陋因於療病之暇將仲景傷寒論金匱要略二書重加註釋俾淺而易讀繁而不複簡而易明不敢唐突古人亦不敢抄襲古人又將進賢瘟疫諸書較其孰是孰非竊附己意務使有當於理寔愜於心俾臨症獲效毫不悞人編輯成書以留研究會諸君參閱但其間有詞義未當處祈諸君賞加筆削不致獲罪時賢此則景玉之幸也是爲序

雙城縣鄉土志序

民國五年十月

舉人魏紹周

聞之志記也積記其事也國有事省有事國志與省志尙焉國爲省之積省爲縣之積縣事即省事亦即國事也無以志之將何所考雙城設治百餘年其事迹大凡僅附見於吉林通志語焉不詳而二十年來政治變遷典章損益戶口耗登疆域離合風俗厚漓文教振委物產貧富生計裕蹙因道財化之故迫於追俗爲制之端書缺有間紀述無聞庸詎非守土者之責也耶用是輒忘謙陋躬率椽屬徵攬士紳網羅舊聞參証經驗以冊籍爲取材紀事之資以例目爲別類分門之準事必求其翔實文務期其簡約沿革之迹視之而可知演進之機察之而足審集思廣益不敢蹈刊落事實之失別識心裁斬少免抄取計簿之誚敢謂經邦稽古竊仿馬鄭之規庶幾補闕拾遺用備輜軒

之採是則區區纂修是志之微意云爾

雙城縣
鄉土志

義縣立師範學校全校同學錄序

民國九年
月日

左郁周

世界一大學校也世界之人同營事業於其中即不啻同習事業於其中是一大同學也顧合言之則世界之人共成一學校晰言之則世界之人分建衆學校共成之學校其人之姓字里居則以版圖載之此見之於周禮分建之學校其人之姓字里居雖不必以版圖載之要不可不以籍冊書之此謂之同學錄我邑前設完全師範兩級客歲增設講習所一級敝校長學淺才庸辦理時虞顛越幸講習諸生學有淵源而復加以磨礪嗣後出而應世或不至有覆餗之憂惟是與諸同學聚處己一稔有餘一旦天各一方能無露白葭蒼之感故刊同學錄誌里居誌姓字以備嗣後一展卷而如見其人然吾尤有進焉者蓋見其人尤不若見其行之爲愈也諸生於別離之後果能由錄而見人由人而見行則某也行可爲法某也行可爲則由是取人之長補我之短則斯錄也不惟可爲記念之資亦且於學業事實皆有裨益斯則敝校長之所拭目望之者矣

其一二

民國九年
月日

關賡龍

予主講斯校之第四年值講習所第五級將屆畢業之期諸生相別在即有刊同學錄之舉屬予爲之序予本不文烏敢當此然魏太子云何言相遇易此歡信可珍則予與

諸生之相聚不亦爲世間之最可寶貴者耶此後諸生中已畢業者固將各任乃是風流雲散而其未畢業者亦必離別有時理難久聚若然則臨別贈言予又烏得緘點自安乎按同學錄之刊刻其用有二一曰惜別留作紀念也諸生同學相處多則五載少亦經年今茲作別有不黯然銷魂者况人生不相見動如參與商則此後聚首未卜何年不有一物焉以繫彼此之情而留作紀念則吾人絕難滿足且吾華舊習姓名之外有字有號有別號焉此外若年歲若住址積以歲月輒便忘記今有此錄雖丁年分袂皓首相別然一憶及前塵則展卷快讀曰某也吾同學某也吾摯友歷歷不差不啻一肖像焉其歡暢爲何如乎二曰其別後可互通聲氣也學生爲國家社會之中堅而中國未來之主人翁也在校之時僅爲修養時代一離校門則投身各種事業正如曉日之出海曙而方興未艾也然事業之舉貴在合羣知識之周在於互換雖云吾人道處皆可定交以資臂助然究不若同學之相結於總角且相處既久情感自密別後雖天涯地角各在一方然苟欲通詢問者則一檢夫此錄住址立得於是而研究學問討論事理無所不可則互助之效可立收而音問自難久梗矣諸生既學師範將來自多致力於教育事業而教育之開天下爲公其有賴於羣策羣力者尤多此雖區區小冊子而將來之互換思想改進教育皆於此焉是賴其重要爲何如乎諸生既有刊刻之舉

對於以上二端自能明瞭本無俟予之喋喋然予猶欲有言者欲諸生貫徹其初志而
收實効云爾

其三

民國九年
年月日

郭廣慧

同學錄者何錄同學之姓氏也同學而必有錄者何示不忘也夫千載論交書成尙友
同榜登第錄有題名胥此意也夫豈僅慕范泰之氣詣謝澹結雲霞之交書密友於簡
編戴宏重金蘭之譜哉民國九年冬我縣立師範學校之講習生畢業擬修同學錄屬
慧紀其事於簡首爰不揣譎陋用掇數言常人於事過則情易遷昔年之契友迨經闊
別或數百里外或十數年間一回首焉則其姓氏里居往往不能省記勢必待追維溯
想始得恍然茲者彙集一錄則每於風瀟雨晦課畢功餘盥手焚香一爲展覽則平素
之連床共榻一游一嬉之形容歷歷如接之目前不其休乎然慧私心竊慕焉諸君抱
范謨之通明君游之朗爽凡張華之勵志江總之修心早已見於平時矣茲復研究乎
教育講貫乎科學夫豈空疏無具者可比耶異日者經綸大展人見其雲路風搏九萬
里之扶搖直上而豈知其霜晨雨夕一二載之攻苦獨深哉此尤慧之所欣羨無已者
也凡勗勉之辭期許之言胥不贅懼煩也

其四

民國九年
年月日

吳廷聘

同學之有錄由來久矣昔杏壇宏樂育集門爐者三千鄒邑大裁成侍函丈者數百使無同學錄何以三千數百之侶皆噴傳於當時彪炳於後世也哉我縣爲興教育計曾設完全師範兩級復於客歲設講習所一級迄於今光陰荏苒歲月蹉跎講習諸生已屆蟾光圓滿碩果成熟之候爰於今歲杪舉行畢業式復刊同學錄求余言以爲序噫嘻余在講習所忝任國文科凡所欲言者課餘靡不言之茲尙何言哉回憶諸君在校與同人互相切磋固相得益彰矣畢業後風流雲散天各一方能無離羣索居之感乎此同學錄所以作也特是作則作矣若視同具文則雖作與不作何殊伏願諸君自今以往以神相交以心相印一睹錄間凡同學疇昔之相與箴規相與砥礪相與接膝談心者莫不紛至沓來畢現於耳鼓眼簾之內則斯錄也非獨藉以詳里居誌姓氏而展卷之下且可以與於墻見堯於羹見舜同呈効用焉斯則不愧作錄之意也

右序 共三十
二篇

叙

明

醫閩先生集叙

都御
史 李承勳

予昔從伯氏世卿子大崖山中讀書至古之學者爲已大崖慨然嘆而問曰今天下有

若人乎予未能對復嘆曰白沙陳先生公甫醫閭賀先生克恭真其人也吾將焚舉子業從之遊越數載還自白沙稱其緒論以爲人心通塞之幾生生化之妙有非見聞所及者必深思而自得之未易言也白沙之學以自得爲宗喫緊工夫全在涵養端居靜坐不爲私妄間隔至心虛氣靈天理流通大本立矣喜怒未發而非空萬感交集而不動舍是則滯礙於形器支離於咕嗶力愈勞而心愈亂不足以語道矣故其詩云吾能握其機安用窺塵編先生之學亦出陳氏在諫垣時聞爲已端默之旨篤信不疑謝病歸搆小齋讀書其中隨事體驗未知其要潛心玩味杜門不出者十餘年乃見實理克塞無間化機顯行莫非道體事物各具本然實理吾人之學不必求之高遠在主敬以收放心勿望勿助循其所謂本然者而已故爲臣必盡其忠爲子必盡其孝推之家庭里閭間冠婚喪祭服食起居必求本然之理而力行之久久純熟心跡相應不期信於人而人自信有邊將撲殺獻績者見先生即吐實曰不忍欺也城中亂卒焚劫不入其坊人扶先生往諭之衆見即羅拜而泣曰吾父也遂解散待罪城賴以全非盛德能至是乎嘗並而論之二先生之學均於爲己白沙資質高明而虛靜涵養之益爲多故其見高妙至其德立道尊體任自然從容和易不事矯飾不善學者見其暮年氣象之可親而不知其早年自治之甚力慎深思而欲徑造自然怠克治而欲妄效和易

故多流於放蕩先生性本篤實其學主於躬行循循然自下學治法地之下以固其基
法地之廣以聚其業如是而自治如是而誨人如是而始如是而終篤實之積光輝發
外傑黠者心服而獻誠叛亂者醉德而革面予昔撫東土訪先生之間見其子進士士
諮文行不忝所生又聞有老門生百戶胡深者亟欲招致匿不肯見先生之風高矣遠
矣今夏士諮輩錄先生言行詩文奏議共若干卷遺余於戲先生之學本不可以言語
文字求今先生往矣舍言語文字何以見先生之心謹叙而傳之先生諱欽世爲定
海人以戌籍隸遼之義州衛登成化丙戌進士任戶科給事中養疾回隱居醫閩山下

克恭其字也遼之無老少貴賤至今稱爲醫閩先生云

乾隆元年盛
京通志藝文

清

知不足草堂叙

翰林浙
閩總督李鶴年

昔歐陽公謂詩人少達而多窮又云詩必窮而後工是說也人或疑之或信之余謂工
於詩者其人多邁俗少可如登高望遠別有瞻矚視人世齷齪米鹽筐篋之徒不難以
氣凌之及其出而仕也常有一官之意昂藏蹕厲一意孤行芻豢之美簪組之榮
世人所覬覦欣羨不可必得者一切視若弁髦而不必干其慮苟以行其心之所安雖
困折而不悔人見其如此多非笑之以爲怪迂不可近故所如齷齪不合而卒至於窮

是豈詩之能窮人哉亦工於詩者之自有樂於窮也吾鄉黎秣塘先生工詩而窮者也先生以名進士出宰滇南彌勒縣有政聲久之忽有所不樂以運銅入都歸途出武昌愛其山水清美流連觴詠遂不赴官及阮文達公總制雲貴稔其才馳書招之先生以阮公名臣幕中多方聞魁壘之士應其請乃先生至滇阮公已去卒以格於例不獲開復先生亦無意於世惟以吟詠自娛而已道光甲辰乙巳間復遊京師與先大夫相友善余時方少曰侍側聞其談說先生已七十有餘而議論娓娓不倦後益困先大夫薦主東安書院久之遂卒先生於詩不落前人窠臼出語雄偉有奇氣類李太白兼工書法適勁險絕自成一家吾鄉人猶傳寶其翰墨云今世人習爲八比熟軟庸俗之文以規進取苟以得官而已何有於詩旣得矣則冀得膏腴地肥囊橐飽妻子民事一切興廢利害漫不經意幸數年無事則夤緣得美除否則擁貲歸耳先生豈矯情以鳴高哉蓋高世奇偉之士莫不欲有所自見於世其所欲見於世者雖不必有非常之功必求異乎衆人之所爲故往往度其才之所宜與其時之所遇雖爲世所譏訕笑罵而甘心於寂寞之道而不悔夫世人之所謂窮方自以爲有大樂者存故不以彼而易此也然則少達多窮窮而後工之說以先生觀之尙何疑信之不決哉余老不諧俗戢影林下迴憶聆先生講論忽忽將四十年今先生曾姪孫耀曾出手錄遺集屬爲編次因釋

歐陽公之說以爲之序蓋不勝嘆息云

民國

三字經註釋會纂叙

中華民國十一年九月十日

優附 王鶴齡

客有問於予者曰三字經腐敗之書也新學家所不齒多烘學究各相持以餬口而熬

費兒童腦力者也與百家姓千字文共同不足注意何事碌碌爲之詳解引據而自尋

苦惱也余曰否三字經宋儒王應麟

字伯厚宋慶元府人九歲通六經清祐初進士中博學鴻辭科官至翰林學士禮部尚書所著書三十餘種

先生所著歷

元明清三朝坊本俱有增益近至中華民國又改增入清順治據神京至十傳宣統遜

舉總統共和成復漢土民國興八句上起三皇下迄民國並附載漢中衰偽國漢末創

據各地及其人晉魏間五胡十六國

祖魁芳公著有五胡十六國紀年事略

隋末唐初偽國五代十國

祖魁芳公著有五代

十國紀年事略宋時僭國元末明初掘起明末清初僭號各梟雄誠一簡明完全中國之歷史也

他如孟母斷機燕山教子黃香温席孔融讓梨仲尼師項橐中令讀魯論老泉發憤梁

灝對廷祖螢八歲咏詩李泌七歲賦碁神童劉晏文姬道韞兩女子以及披蒲削竹懸

梁刺股囊螢映雪負薪掛角各故事脩身書中往往援引及之至於知某數識某文算

術國文之學也匏土草木石金絲竹音樂之學也六穀六畜蠶絲蜂蜜博物之學也三

才三光四方四時天文地人文各地理之學也是三字經雖爲舊學書而新學家未

始不滛注於此也余前編有三字經解字一本計十六頁今課徒之際翻閱及之字雖各解未能俾兒童如學話然能自了然於其說也因重加註釋細爲引證逐字集添詳解每字下引集解釋數種按句串成白話每十二句串成白話一組以便兒童講究庶不至字有詳略句有明昧三閱月告竣名曰三字經註釋會纂非敢以問世也聊以自便課徒云爾書既成爰叙始末於書首

右叙共三篇

義縣志中卷之十三藝文志上終